



龜巢彙卷六

詩

雪巢爲馬仲良賦

馬鞍山高數千尺考槃之阿環大澤梅花爲屋雪爲巢窗戶玲瓏
室虛白諸公衮衮登雲梯若人奚獨能幽棲澹然素志絕華藻要
令樸俗還標枝藍關策馬官遠謫居延牧羝毳盡齧何如雪飲樂
巢居更與党家風味別犁雲無夢清如許膝上兒郎賦冰柱此生
此樂慎勿移聽取龜巢老人語

次韻答許西溪

憶昔送別黃花秋烏紗破帽霜滿頭別來作詩屢問訊夢中載酒
時遨遊兵戈同歷二十載鴝鷓夜啼雲靄靄全家老穉幸逃生又
閱桑田變滄海啟榮之樂今有餘勿謂此榮年不如峴山一望三
太息襄陽耆舊晨星疏

次韻自述

百年有限恥求仙數口無飢賴薄田菰米熟來連日雨菊花開到
小春天方從易外窮義畫無復詩中泥鄭箋客至酒杯時一舉開
籠放鶴舞蹀躞

送婁主簿赴京考績

吳霜如雪點征衣匹馬之京小隸隨鸞棘特書良史筆鳳臺重覽
謫仙詩天開景運崇文治年少多才際盛時野老送行無贖物梅
花折去臘前枝

寄張以誠二首

入城一度一相尋爲愛論詩識趣深歲晏杜門寒不出折梅要寄

隴頭吟

蘭陵市上厭囂塵藥杵聲中樂隱倫兒輩荷鋤今日去一枝添種

杏林春

雪舟棹歌并序

湖南潘公珍仲寶自號雪舟以耆艾之年監稅江陰縣洪武戊辰

冬赴京考績語予曰今將告老於朝得旨則扁舟載雪而歸矣
雪舟之興蓋與山陰王子猷有不同耳吁昔者陸公紀官滿鬱
林歸舟載石使當苞苴有物則奚用是石爲哉公之雪舟意蓋
如此若夫鴟夷子皮之舟裝以重寶復竊取傾國之尤物隨之
汗屨五湖遺臭千古其視吾載石與雪者不啻霄壤今雪舟之
歸雖未可必然其志氣高潔如此雖在市朝亦必爲清白吏是
亦不歸之歸也予嘉之故爲作雪舟棹歌三章以道其樂云

歌曰載雪兮孤舟帆江風兮中流蘭橈歸兮無恙吾將老兮滄洲
再歌曰剖肉兮藏珠抱玉兮求沽悵斯人兮非吾徒尋鷗盟兮侶

樵蘇

三歌曰舟搖搖兮江水長五老玉立兮遙相望解吾纓兮濯湖湘
樂吾之樂兮未渠央

送王主簿赴京考績

三年一枝此鸞棘一息萬里方鵬程長安西日舉頭近匹馬北風

行色清朝廷考績垂令典臺閣交薦蜚英聲鄰封野老頭雪白也
折梅花作送行

雪巖詩爲江陰李縣丞作

瞻彼雪巖太行之陰玉樹瓊林纖滓勿侵雪巖峩峩巖有薜蘿有
美君子居巖之阿峩峩雪巖薜蘿如昔時止時行不泥其迹雪白
而清巖靜而深曷其似之君子之心始終一節謂予不信有如巖
雪

寄希物先楚蘭江二禪老

優鉢花開五百年連枝香徹九重天恩承雨露移金刹語帶煙霞
漱玉泉虎踞龍蟠多古迹燕來鴻去自新年老夫嬾著遊山屐空
仰崔嵬夕照邊

過烈塘祖墓里人牧羊於壘上以詩呈郡邑

鳳橋之西烈塘東我祖我禰馬鬣封向來松柏蟠蒼龍灰飛煙滅
兵前風十年天造開鴻濛恩沾萬國生育同壘頭萌蘖春蒙茸藤

枝棘花雜青紅牛羊斧斤集如蠶一年一度一掃空白頭遺孤抱
哀恫麾之不去欺龍鍾無階上天訴天翁吞聲躑躅淚滿胸府公
賴有渤海龔琴堂長貳明且聰令行如風偃蒿蓬樵夫牧人乃絕
蹤將來宰木蔽幽宮九原感戴恩無窮嗚乎九原感戴恩無窮

懷成都監倉趙執中三首

擲去任公舊釣竿龍墀拜命卽之官丈夫志在功名外蜀道行來
自不難

七千里外芙蓉城四五月閒鷓鴣聲月俸支來賸沽酒莫遣閒愁
取次生

公餘訪古碧雞祠官柳野梅皆可詩我欲見詩知雅興如何黃耳
到家遲

寄熊元修

五湖三泖一癯仙心骨俱清地更偏睡鴨燒香書屋裏閒鷗結社
釣磯邊絕憐芳草無塵土又喜黃楊閱閏年熱客不來清晝永南

山相對兩悠然

晚香亭爲蔣公勉作

維莫之秋百草不芳維菊有花晚節之香君子擬之金玉其相願
願印印氣凌風霜回視春葩綺羅靚妝及茲冷秋埽跡窮荒菊也
特立澹乎坤裳我佩爾紉我帶爾纒厥德之馨匪食其英亭有三
徑里猶柴桑亭亦有池永同南陽宜爾父子眉壽無疆矧有佳客
盧駱王楊高堂起居階庭趨踰玩物適意其樂洋洋鄙人作歌以
侑稱觴

題龔景良傍梅書舍

南昌山水非不佳卜鄰直欲傍梅花花開歲晚香滿屋清致不減
林逋家三閒茅屋大如斗四壁圖書雜蝌蚪腹笥便便不自多汗
竹之編長在手有時門外雪三尺羣籟無聲人絕迹梅花立雪似
游揚不作桃哀憔悴色春風滿面笑相看知我鐵心同歲寒他日
稱居玉堂署應有品題稱二難洛陽牡丹春比屋日夜沈酣沸絲

竹何當聆我讀書聲亦若聞韶解忘肉

次韻答毛雲莊并簡太希先生

吾聞天台之山冠東南蔚有清氣非雲嵐山高一萬八千丈石頭
毛髮青毳鍾靈仙釋踵相接求爲世用疇能堪不知三綱九法
是何物浪說千巖萬壑能窮探雲莊先生隱君子非仙非釋棲苔
龕胸中冰滿壺頭上雪一簪羲皇以來書盡讀熱官不要詩仍湛
草堂侶有北山鶴菊泉飲比南陽潭清風日埽三徑竹寒霜歲熟
千頭柑齊名子陳子不受功名酣坐談風月只松塵臥遊山澤非
桃驂老夫恨臂不羽翼翩然飛去時相參四壁同馬卿一禪如阮
咸猶喜盤餐菜有二十七生世年踰八十三忘機頗覺室生白造
道尚欲青於藍向來行路如棘澀今乃茹茶猶薺甘小山老叢桂
滄江倚枯栢愛君傑作神氣壯睠我孤陋顏色慚蘭陵府主蓮幙
客皆云此詩壓倒方雲庵赤手鯨牙力可拔薰人雞舌香微含餘
波及我老孤研清入肺腑蠲焚煖一朝怪事出幕府口不忍語非

三緘令威到家能自談

常郡經歷鄭玄禮吾友天台陳太希之門人到任數月家人至而
玄禮病疫而沒寡妻稚子遑遑無歸予作二詩以哀挽之

盲風歛起怪禽呼吹折琅玕樹一株何事天公渾不管生年多賦
道傍樗

琅玕樹折鳳巢傾膽落鷓鴣雛抱母鳴故國欲歸雙羽弱哀哀啼作
杜鵑聲

延陵野老歌送張太守

延陵野老巾滿霜送侯入朝歌道傍歌中不解說循良但云三載
安農桑官無煩苛歲豐穰飢有菽粟寒衣裳我侯興學扶綱常授
經諸生踵陳襄一鼓士氣弛而張劍井亦復騰輝光訟庭春來莎
草長風行四邑方泱泱九重天語星使將五車夜趣天官裝黎明
馬出金斗坊羣氓猶挽青絲韁銓衡郡才進巖廊將見列郡皆龔
黃連步拾級登廟廊佩鳴珩璜謹趨蹌掖垣紫微花自香甘棠之

愛民弗忘大江東流青海洋我思悠悠渠未央

寄呂教諭覓惠山泉

木屐上山老無力茶鐺覓泉猶累人目光直射九龍角胸次欲浣
三斛塵冰符分竹果如約石牀焦桐堪作琴君當知我鄙肉食一
瓢不厭平生貧

寄袁子英

橫山東望崑山遠江水西來海水連每辱手書論著述猶如面晤
奉周旋微陽喜復飛葭管大有重書汗竹編若問老夫兒女事曾
孫又抱小春前

謝余提學摘橐集

虛譽何人說草玄雄文爲我冠蒲編諸公共美金聲擲兒輩爭誇
石刻傳窮裏小團陽羨月瓶封新汲惠山泉故鄉風土殊蕭瑟聊
作梅花寄海邊
挽吳母

賢母無復見孤兒痛若何絳紗空幔在彤史闕文多林竹冬猶筍
廛氓巷不歌蹇子妻子輩垂涕憶婁佗

又代王尚綱

澗山湖上辟兵時總角曾聞阿母慈霜墊不教兒子出冰池竟得
鯉魚知生前冠冕升堂拜死後芬芳婦德碑愧我不才俱靡及抽
毫遙寫楚些悲

次韻賈教授暮春言懷

琴有微音劍有光惜哉江海老張蒼且將濁酒供瓢飲何必明珠
用斗量壇杏作花紅樹暖泮芹抽葉翠波香鼇山遙在天東北時
復瞻雲首一昂

寄萊陽縣丞蘇偉正

觸熱訪而翁萊陽書適至而翁釋離憂吾儕慰馳系青雲發軔初
甘雨隨車沛早歲竟豐穰天意更汪濊塵氓九衢舞海市百靈喜
魁然英妙年際此太平世蹇予八十翁懷人二千里哦松公務餘

殮槩珍味比魏公百韻詩仕學有餘軌

錢孝女詩

斷臂恥受汙矧目示守節斷髮割耳鼻亦截忍棄夫家甘毀滅嗟
哉錢氏女孝心亦如之剜肉於股療阿嬰想當持刀入手時精誠
默感天翁知百靈搗呵走神醫肉乃化作藥石糜洩際淋液腹除
癖如以湯泉澆雪釋嬰無呻吟女弗戚鄰翁里媪皆歎息予生慕
忠孝老去仍惓惓每見返哺烏如甫拜杜鵑願言屏鴟鴞不與同
戴天竹林寒筍冰池鯉澤中薰菜籬根米天其垂恩錫孝子董狐
盡爲書青史

和江陰鄭教諭登樓

爲愛居山好每登樓上頭一氈渾不冷有酒更何愁歲月江流急
人生泡影浮興來歌舞罷倚檻看天不

次韻答陳推官

珍重新詩遺華於翠織成立哦天似洗連日雨頻傾大府羣英集

清朝列爵榮正須康濟力膏澤被蒼生

和陳推官過余公祠

公諱闕字庭心元進士安慶路總管守城死洪武初敕建元忠臣廟諡忠宣公

砥柱迴瀾屹呂梁安知誰武復誰湯六年守戰孤臣死一代文章萬丈光草木荒城威肅肅丹青遺廟貌陽陽悲歌沃醑知何日北斗持來挹酒漿

殷孝伯挽詞

憶昔羈旅中片言識醜蔑十載忘年交兵戈正騷屑

知子早卓越春秋參五傳窮源見澄澈經時陵谷變遵養臥巖穴洪武更化初絳車聘高潔辭勞忤當路一命萬里轍志違烏鳥養淚忍啼鵲血咸陽火方燼教雨沃餘烈奐輪周孔廟駿奔遵豆設庭生書帶草青青比蘭茁孤雲日在望縮地恨無訣遄歸一覲省亟去兩踰月老夫獲晤語清風濯煩暑著述亦已多討論心愈切安知一疊歌竟作千秋別招魂賴遺孤魂歸母垂絕於乎世之人賦命何優劣或厭飫八珍子獨茹冰雪或穩步康莊子獨蹊阨隍

行行止於斯矩步踵先哲崑山雲氣慘婁江水聲咽誰為有道碑

修名罔磨滅

哭盧知州二首

諱熊字公武

東帛三徵出薜蘿雲階步武正透迤飄風動地須與靜奈爾琅玕遽折何

雪手灘流理繭絲一襟華藻竟何施秋風夜月華亭鶴又作悲聲

似昔時

送浦良之安陸府代父從軍

秋風涼秋夜長往哉讀父書超然出戎行詩書元帥古來有搢紳先生今汝望

寄徐伯樞縣丞

逐客多焚畫錦衣謫仙喜得夜郎歸古來白雪詞難和此去青山志不違洗馬池邊楊柳老臥龍岡上豆苗肥獨憐棣鄂秋蕭瑟又見西風旅雁飛

某巢居病瘡有客自青山門來者語予曰賢太守過道鄉佳城以
弔以酬且爲之扶植仆碑添土舊封又將築周垣而護之殘山
賸水皆有德色某聞之喜不覺其疾頓愈起坐午窗老硯濡墨
筆是詩以紀盛事洪武十年歲在丁巳七月十日也

世有文潞公乃立明道表明道表不立斯文尚幽眇時有孔北海
乃稱通德門通德門不稱大儒曷推尊古人今人同此心當風正
欲披其襟嗟予東家子騶子傳道龍門天下士一朝叩天關獨立
批龍鱗祇恐綠衣黃裳誤人主安知炎煙瘴雨危其身萬里投荒
挺霜竹歸來青山竟埋玉迄今二百九十年陵谷幾番經變遷折
角麒麟臥荆棘復見藩侯駐熊軾鬣封添覆烏銜土頽碑扶起龜
馱石先生九京知不知名在人閒益輝赫孔北海文潞公今人古
人將無同青天高高不可問白楊爲我叫西風

題夜潮圖

昔子夜醉錢塘酒看潮八月中秋後銀山湧出海門來潮聲殷若

雷霆吼此圖之作知幾年當時景物皆依然雲山兩岸淡籠月雪
浪一江高拍天一觀頓覺毛髮立再觀祇恐衣裳溼扁舟漁子任
掀舞別渚鷗鳧自翔集奔騰澎湃無足驚人閒平地風波生乘桴
尼父果浮海從遊我亦跨長鯨

郭府判惠佛面竹杖蓋以佛狀而名之矧夫節有交互之異旁生
兩枝末復爲一視他杖殊不同詩以謝之

頽然此君生越裳化身無乃是空王生來丈六紫金相復現太乙
青藜光孫枝並出能比秀老節交錯成文章只恐化龍飛入海尚
煩垂念瞽偃偃

呈府官求刊思賢錄

忠公神遊白玉京鳳皇無復朝陽鳴寥寥二百九十載其文況忍
成漂零某也東髮頗嗜學四方掇抬手不停珠聯璧合綴方冊字
字句句含芳馨向來辟地東入海挾書幾落長平坑還家暗投科
斗壁何異寶劍埋豐城郡公宣化重名教斯文要俾晦復明顛呼

鐵筆寫堅木彷彿中郎鐫石經螢窗雪案人快覩妙語炳如懸日
星顯忠不須庵忠鄒無用亭牽裾伏蒲想儀刑儼然見我鄉先生
題徐良夫耕漁軒

我本耕漁人喜子與同志子居中吳山水窟比我延陵更佳致太
湖三萬六千頃七十二峰連紫翠山皆可耕水可漁無復紛紜嬰
世累朋遊日接慎威儀酣酒賦詩時適意客來遣我金蘭集儼然
承顏依玉立因以今人思古人與客評論重於邑輟耕莘野赴阿
衡後人嘒嘒疑割烹擲去漁竿佐周武鷹揚之勞亦良苦當今盛
時伊呂多幽棲正宜安薜蘿山中小草或浪出千慮鮮能無一失
願言養高持素心百鍊不改堅如金相過未擬聆蛩音寄言時復
相規箴

生日口號二首

餘生重作太平民雪色麻袍阜葛巾兒業經鋤能養志家居瓢飲
不憂貧屋頭箇箇慈烏喜階下翩翩舞鶴馴此日誰爲湯餅客孟

光相對鬢如銀

秋菊春蘭各有時頽然老我一書癡脚跟不識青雲路頭髮空成
白雪絲怕醉有時曾止酒遣閒無日不吟詩旁人若問今年幾八
十年前五歲兒

送聰上人

蘇州有卽常州有今雨來時舊雨來鐵限門前人立雪寶華臺上
鼓鳴雷九州禹貢包時橘十里吳王醉處梅請與淡翁論古意老
夫朝暮亦浮杯

送僧歸四明省母二首

同根華萼兩連枝甘輒能供老阿嬈不用睦州蒲織屨睦州因得
賦歸遲

吳霜如雪滿袈裟正月闌珊可到家別有一般清淨供高堂說法
向摩耶

送鄭教諭進表之京

東甌鬢舍跨征鞍奉表朝家慶履端虎拜三呼稱萬壽龍顏一笑
宴千官酌來天上葡萄酒洗去胸中苜蓿盤官樣文章新製作老
夫刮目待歸看

過天寧寺 行中和尚澹居藁知其邃於易學兼長於詩故寄此
西來祖業繼箕裘旁入儒林託泳游二雅什中歌矩度九師注外
易 流松堪受記皆摩頂石解知音亦點頭逸興飄飄誰足擬白
雲飛度楚江秋

次韻陳推官元旦作

東風楊柳驛橋邊香雪沾來斗十千早飲屠蘇還舊俗遙瞻闔闔
賀新年萬方人樂昇平世五色雲開咫尺天廊廟器成今未晚著
鞭姑讓祖生先

正月十四日代簡招鄉中親友

上元之前日將午相邀諸公聚環堵山瓢持作鸚鵡杯畦蔬擷取
龍根脯兩兒肅客衣襜褕老夫鶴立梅花檐照天蠟燭夜有月勿

謂寒舍無燈相棄嫌

寄管伯齡兼呈陶星甫

前年詩寫心聲去此日人來口信通一自初交經世變兩無相笑
坐文窮崑山冰柱軒窗外笠澤煙波賦詠中更憶 龍頂竹曾

畱東走鹿皮翁

張伯仁兄弟濠梁蒙恩還鄉

客行二月初三日詩到千墩寄二難且喜江南春氣早不聞濠上
雨聲寒花時多釀醪酒芳館重修芍藥欄往事真成塞翁馬正
須招集笑相看

簡伯仁里中親友七人

臨濠人歸去年夏故園花開今兩春看花把酒應共樂訪竹題詩
毋厭頻紅塵車馬跡不到滄洲魚鳥人相親老夫遙瞻德星聚乘
興幾回車欲巾

聞趙朋南免官還家作此代簡并以孝女傳求詩兼寄毛世延熊

元修

水村先生冰雪姿一襟清氣溢爲詩不同不異頗奇崛步趨李白仍委蛇夜郎歸來脫塵屣濯足淞江太湖水雞壇有盟知弗渝書或浮沈况杭葦衰年萬事皆遺忘詠歌之樂殊未央請觀側陋出純孝援筆爲揚蘭蕙芳毛公世業詩三百白華補亡求必獲更煩鷗社語閒叟定有隋珠照方冊

舊冬十二月初四日次子林赴京初九日入覲十三日授開封新鄭縣學教諭即日之任時雨雪連數日寒甚眷焉於懷久而不釋

兒別雙親到日邊承恩徑著遠遊鞭一千里外汴梁路十二月中冰雪天楊震未期堂有鱸鄭虔何愧坐無氈只今偃武修文日正欲鸞膠續斷絃

服霞道人歌

服霞道人本仙骨隱居琴川山水窟朝看鼎食暮鼎烹富貴於人

果何物道人忘世味祇服山中霞卻青精棄胡麻八珍視同泥與沙扶桑飛出金老鴉氤氳五色搏精華响噓呼吸閒入腹皆河車手持九霞觴頭戴三朵花松風爲作洞仙曲絕勝金谷鳴箏琶一經不學乃無術麻姑送酒徒相誇吾服吾霞吾自足安知世有萬羊祿夷齊餓死良可憐畱得清名傳汗竹秦人采藥尋蓬山好兒好女無復還漢宮空設承露盤銅仙爲之淚沈瀾玄霜本非霜絳雪亦非雪請從服霞道人逍遙遊指點崆峒授真訣

貽五牧劉永貞

昔賢五牧家何在今爾幽棲地甚偏種秫歲供彭澤酒煮茶時汲惠山泉錦鳩呼婦雨聲歇丹杏作花春正妍堪笑老夫頭似雪興來尋戴過前川

雲牧詩爲楊同知賦

廬陵美山川穹林古喬木雲樞三十年遵養卑自牧靜言求放心雞犬常在目竭來陟雲衢半剖桃符竹牧民如牧羊四郊春草綠

豐年羊茁壯亦有抱眠犢豈無敗羣者其藩或輕觸約之鞭用蒲
所履繼前躅置身埒青雲岳牧聯佩玉佐主牧天下庶類賴蕃育
雲牧懋厥功吾言比芹曝

王叔明雲峰圖

王郎多學畫最工筆法似舅松雪翁松雪之書妙天下以書爲畫
妙亦同想當灑墨成雲峰豪氣壓倒陳元龍層巔峯律摩蒼穹咫
尺可論千萬重嵐光翠滴天無風若有微籟鳴杉松於乎此時此
畫復誰有我爲此甥懷此舅

秋林讀書圖

春風不著長安鞭秋風讀書年復年百篇蝌蚪自爲寶三足蟾蜍
誰與憐目光爛爛走金電口角泠泠飛玉泉老我東家兔園冊尚
分鄰燭教曾玄

題村田樂圖

老人村老瓦盆常作雞豚社不識州縣門阿翁醉倒阿婆笑膝上

咿鴉弄乳孫

六月八日得次子詩并書久旱高田未秧是夕連雨三日喜而和
之

新鄭書來劍井邊方將陰石捶荆鞭雷霆夜坐三更雨江海寒生
六月天不惜空囊沽綠螿從教破屋溼青氈北窗風響綠蕭竹如
聽南薰奏五絃

去冬送鄭教諭如京詩爲天監聰公沈滯至今年六月轉託發還
故作此并元詩寄鄭

一詩代折送行柳半年竟墮無何鄉祇應沽酒謝不敏尚謂道術
能相忘高堂談經多士集澄江濯纓清晝長爲問襄陽兩者舊歌
鳳曾無說楚狂

寄謝楊純夫兼簡陳高士

客來飲客北海樽客去送客東陵門不嫌襍穢畱信宿各出肝膽
聆話言三日雨救赤地旱百川水作黃河奔賦詩爲別并志喜兼

簡太邱賢祖孫

聞袁子英著書作詩寄之

我所思兮耕學翁壯年氣欲吞白虹眼看陵谷一變改此心乃與
寒灰同硯田筆耒耨經史不稼不穡勤於農我衷我彝得所養錫
類且欲來羣蒙恭唯至聖草六籍爲世大法垂無窮楊墨溺人甚
洪水孟氏距之成禹功秦以申商漢黃老六朝接跡淪虛空緇黃
愈出愈荒誕冠冕鞠躬趨下風韓歐閒出數百載鳳鳴朝陽羣羽
從中閒洛建繼洙泗卓彼二子能折衝雄詞至今凜生氣宜從孔
道追遺蹤東將入海乘濛朧長江大河無遏壅老夫獨恨雙眼矇
不與觀日扶桑東

贈衡隱居

我昔母年垂九十帶經犁鋤粗供給伊今有母八十餘孝養之聲
動鄉邑堂前晔晔忘憂花屋頭翩翩返哺鴉林宗若識茅季偉薦
徵定徹天王家

題漁人扳罾圖

大橫峴東芙蓉湖水村高樹屹兩株漁郎曳罾坐樹下短衣緇撮
赤髭須此圖無乃貌此景東鄰西舍皆菰蒲吾嘗過此看春水桃
花雨晴春日晡漁郎含笑語厥子鱖魚肥似松江鱸街頭米貴魚
亦貴賣魚日糴供家脯只愁水面重租課風飛健卒頻追呼逋租
畢輸榜捶脫前村有酒仍須沽猶勝祿食致奇禍坐受斧鉞連妻
孥夜來湖上好明月醉吹蘆笛歌烏鳥人生之樂有如此此身安
用紆青紫漁郎漁郎知我乎我亦煙波老釣徒

溪居垂釣圖

磻溪老父興西周釣竿棄擲鷹揚秋富春先生赴東漢羊裘幾被
朝衣換人生出處各有時如魚飲水魚自知釣鉤無餌釣清泚若
人彷彿玄真子好山滿眼青孱顏清風綠樹滄洲灣悠然意態極
瀟灑豈是尋常釣魚者浮波之龜如出洛漁郎睨之龜弗卻賣卜
覓錢人正多七十二鑽將奈何不如且曳泥塗尾相伴幽人弄煙

水細看元在畫圖中多言莫笑癡獸翁
管伯齡惠書并和詩故復次前韻答

芙蓉湖照橫山影蓬蘽門開曲徑通半載目昏渾不出一經頭白
未能窮論交半是漁樵者訪舊多於夢寐中說與故人能信不頽
然黃鵠化鳧翁

維揚王有恆辟亂居東吳三十餘年所至寓舍以聽雨蓬名之多
學能琴而善飲醉則鼓琴自娛故自號曰醉琴然鄉土之思亦
嘗於琴發之予蓋相聞而未之識也吾友釋仲翔專書爲求二
詩遂爲之賦

聽雨蓬詩

昔年家住揚州市雨聲不入絃歌耳居吳聽雨三十年客舍如蓬
臥蓬底蓬窗晝暝雲抹漆滴滴點點疏復密絕似瀟湘夜泊時半
襟風波想蕭瑟有時聲急如建瓶有時珠玉聲琮玕屋山使作舵
樓倚兩耳洗來心骨清心骨之清豈不好一點鄉心忘未了天中

玉樹無雙花夢魂日夜長飛遠只今二十四橋月依舊玉簫聲不
歇一帆風送到瓜州聽雨孤蓬聲又絕

醉琴詩

張顛草筆常醉揮以頭濡墨愈神奇醉琴之妙亦應爾穎師乃爲
徵吾詩琴中佳趣知者誰麴生爲我同襟期千鍾百斛追古聖五
音六律洞玄機一襟宇宙春熙熙七絃冰雪風颼颼得之於心應
於手如魚飲水非人知鈞天廣樂醉鄉境悉以所樂鳴金徽高臺
自傾池自廢雍門枉爲田文悲我歌醉琴行持贈醉琴叟小春多
釀梅花酒我來與君酌太斗濯足滄波太湖口時聽醉琴爲醉友
海華爲詢無言作

大海多風波浮萍蔑根蒂嗟爾海上萍似我人閒世前身白楊花
寺不墮泥滓化生江漢閒朝宗隨眾水出沒幾沙劫全此清淨體
所以無住著默契宗乘旨芥子納須彌吾知同妙理
挽王氏祖母

母在重闈鶴髮垂孫爲能吏鶚書馳二三百里去鄉國七十五年
稱母儀李密陳情方有表張林紀德未成碑斗城昨夜西風急吹
折萱花帶雨枝

次韻酬陸子文見贈

故鄉不願衣錦歸亦不願入承明廬願言結交天下士腹有五車
今古書還家十年空兩手釣竿之外餘何有白雪如雲橫滿山薛
蘿三閒大於斗浪川雙鯉來新吟詩中意與秋俱清雄豪氣敵劉
夢得喜無郊島愁窮聲嗟哉風雅久不續老我山林成朽木金盤
秋露玉壺冰洗去胸中塵一斛覓官應笑明河篇託物可擬石鼎
聯先生識趣出塵表鞭策後進追前賢東望吳門長太息舊俗繁
華復因襲太湖三萬六千頃七十二家湖水側何日攜將麴秀才
登臨共醉姑蘇臺眼前一事特可喜湖山清氣鍾羣才先生三薦
胡不起耀髮滄洲弄煙水遙遙裔出華亭侯甫里高風更無比只
今奕葉多流芳東牀嬌客名尤香呼兒整我遊山屐早晚去從潘

孟陽

次韻答集講主二首

欲尋石上三生約姑待梅邊十月春結社東林無奈遠寄書南雁
豈辭頻平生賴得詩書力朋輩多如骨肉親元伯九泉呼不起擬
將雞黍一沾巾

千墩南浦水迴環一颿西風路不難骯髒曾於堂上坐褊袍能禦
客中寒可憐學劍身今老祇有湛書興未闌傳語心知數君子小
春來借早梅看

冬至卽事

一簾紅日雨初晴客屢駢羅送復迎賀節本非三代禮隨時且喜
一陽生齊奴金谷財爲害楊相冰山勢易傾可似酒杯長在手青
山相對適閒情

冬至前二夕憶次子林不寐枕上賦詩將成忽其母夢中作聲憾
而覺覺而喜言夢林烈塘舊居作湯餅畢垣居室事權甚因用

其語爲是詩結句云

去年臘月初九日發軔天階又一期鄭校頗聞衿佩集歐詞應作
送迎詩久無書信來黃耳每有親朋問白眉阿母夜來曾夢汝甘
分仍在舊西枝

送楊純夫歸琴川

杜子客長安行囊本枵然得錢沽酒覺鄭虔不嫌官冷寒無氈邇
來六百有餘載世道多隨陵谷改身爲今人心古人清風高誼依
然在嗟我如鄭貧蒙君愛如杜雖無三絕才樗散頗自喜一從傾
蓋意相得頭髮不知誰白黑衝寒觸熱每見過愛我西窗好山色
援毫或和龜巢編解纓或濯龍井泉常言好古絕類我外物多忤
中彌堅低頭甘立矮屋下高論直到羲皇前朝來賣得凌雲賦麴
生車載來相顧門前尺雲凍不消風木吼如虓虎怒宿宿信信傾
腹心言欲拏舟抵家去呼兒更酌罄餘懽贈別殷勤抒情愫我昔
居吳十年久君歸煩君訪諸友吳山醉處好湖山鄉人來作輓腳

局且對春風開笑口街頭米賤酒亦賤一百青蚨滿雙斗儘拚連
日醉如泥百憂盡付無何有人生窮達各有時阿衡元是扶犁手
詩書豈徒守章句言行正須傳不朽珍重林居慎厥修好音慰我
思悠悠

雪蓬爲蔡子堅作

鷗夷船載西施去遺臭五湖煙水路嘉爾吳淞雪一蓬江水曾無
尤物汗蓬窗洞開天雨花梅樓屹立冰爲柱鵝鴨不驚柔櫓鳴鷗
鳧渾在平沙聚非熊無夢釣無餌如琴無絃得琴趣虎頭能爲畫
漁蓑驢背無勞覺詩句潮州阻雲八千里抗書直諫曾何補殘甍
鬻雪十九年使節堅持亦良苦雪蓬之樂樂於天雖欲同人人弗
取獨有山陰王子猷清興頗堪同日語

過顯慶寺

六載重來釋氏家一甌新啜趙州茶杏花風後春何冷柏子庭前
日未斜拄杖賴能扶潦倒闕文煩爲補楞伽要聽說法頻來往且

喜平橋路不賒
書潞城樵舍壁四首

燕子來如舊雨桃花笑爲何人竹下青苔不埽恐教鶴步生塵
一室四壁立壁六孫三已歸妻猶喜老萊舌在不妨矮屋頭低
拔木狼無跋窺絕糧道阻周流天眼或開或闔人心何怨何尤
讓東讓西農晦巷南巷北人家白露秋香禾黍綠雲春靄桑麻
劉德祥監稅江州客有誤傳其子死者遣人回家并寄書吾孫詩
甚酸苦予因賦詩代簡
九江相去二千里一別於今五六年盡道國恩容告老安知家信
有訛傳山連楚尾青天外潮落潯陽夕照邊遙想此時公務隙鐘
峰相對思悠然

題趙行素佩韋齋

綵衣翩翩童艸年佩鞮佩觴庭闈前鐵馬紛紛戰爭日佩犢佩牛
江海邊幽蘭初佩非不好獨醒未欲追前賢謁來佩韋不佩弦常

以輔我氣質偏視韋之緩我之急如餌良藥沈疴痊世事多因忙
後錯緩不及事理亦愆不疾不徐發中節秉彝庶得全吾天巖廊
鳴玉似高步江妃解珠人浪傳貪榮可笑蘇季子佩六國印扶危
顛何如茅齋但安坐且有竹風堪醉眠青山於人少知者白雲與
我同悠然韋乎韋乎心日懸得魚吾豈忘吾筌
贈黃仲器

予觀道書謂洞庭山有林屋洞天仲器以避兵居之既而過雲間
適海上復還常之橫林閱歲月三十年距洞庭三百餘里仍以
林屋自號示不忘也徵予詩故歷敘其遊息之概如此云

一自九州皆戰場避兵林屋水中央林屋仙人不知處橘井委棄
青霞漿木奴包金亦致寇人乃隨雲出巖岫五湖三泖放孤舟遵
海幽尋采三秀堪輿再造隔兩塵故鄉來歸能幾人芙蓉湖上大
橫峴煙連綠樹橫林春解裝付與箕裘子管領春風桃與李幅巾
自作逍遙遊別有行竊修竹裏一童出入長相隨款段之馬亦不

騎林屋別來陵谷移時望白雲猶賦詩膏梁文繡俱不喜猶曰愛之心未已堪笑老夫同此心白首論交結知己何當呼起李謫仙每飲一斗吟百篇殺青盡伐南山竹賸錄好詩娛暮年

悼許君善

谿西老人山澤癯一生祇以詩為娛常言愛詩入骨髓好詩鈔藏千百紙七言近體尤懽作不費工夫細瑣削嘔心每笑李家兒牛鬼蛇神何足奇老夫初焉未相識數篇不知何處得稠人廣眾誦吾言說項過於楊巨源一朝傾蓋千墩下膠漆相投不相舍西鄰假館兩年春買宅移家情轉親此時吳門正堅壁張角未死人相食雲梯轍作霹靂聲狼煙暗天血滿城吾徒幸若王官谷朝夕同吟紫芝曲桑田變海噓吸閒死欲邱首歸橫山暮雲春樹勞遠憶十載詩筒仍絡繹重來桑梓甚蕭條巷有索租人叫囂骨冷九原呼不起一酌殮歌續蒿里嗟哉時俗貴輕肥如子愛詩人亦稀贈王仲昭父子

扁舟入吳空載月間邱虎邱俱不謁停橈再拜范公祠楊花正落祠前雪義田義宅二百年義聲洋洋天下傳嗟爾吳之人胡不踐遺躅貪夫婪婪昧盈縮前車後車屢顛覆下牀兩屨內雙足奚用領軍鞋一屋我來訪舊無所將贈以范公博施之義方家傳更須授賢郎福澤將來未渠央吳淞江水長藍青毋我忘

挽吳逸庵

廓然一襟涵宇宙鍾氣會稽山水秀春秋高似伏生年岐伯諸書口傳授浙水西來家屢遷名與杏林俱不朽老去居吳抱雙膝四顧狼煙暗如漆兒能負米百不憂有酒卽呼人共喫常時隱几看青山醉則齁齁枕琴瑟廿年同飲淞江水通家之交親戚比別來恨無縮地術時復論心書一紙只今祇與阿戎談翁在九京呼不起

李明善慈竹軒

吳淞江南盆浦曲慈竹軒開薜蘿屋了無花木鬪紛華一徑波光

照猗裝纖塵不滓蒼玉叢枝葉葉皆清風一年一度冬夏筍冬
生其外夏其中德哉此竹美如許子母交相禦寒暑嗟哉人爲萬
物靈溫清幾人能似汝吾知吾友此軒居朝夕奉親來板輿母慈
子孝默相契更喜君子能威如樹萱堂上分甘樂諸孫錦棚如錦
籜家僮笑指青琅玕少長喜與俱平安令名亦同千古垂咄彼鴟
鴞兒人面刀劍腹不學返哺烏頑然忘顧復嗚呼吾不知其見此
烏兮何面目爾何日兮視吾竹

簡湯道原曹予壽

予生頗好古恐兒輩不能繼述敢請二賢相與語之吾兒觸屏煩
爲警省旦夕稍閒煮茶專待

要學劉伶死便埋隨行負鍤欠輿臺螢生腐草光能幾蠹在南柯
夢易回一笑預言身後事兩賢聊共掌中杯貧居何處堪鋪席流
水窗前好綠苔

過橫山龍祠作

橫山龍母祠前路人說今年祭龍苦前期邑有阜衣來督遣丁夫
翦榛蕪里胥中有豪家郎搜攫如鷹噉如虎編氓一呼六十人棄
擲犁鉏行或沮十家之甲最可憐背血淋漓遭捶楚囊無一錢供
百需肥腴豚如買烏牯手傾麥斛比珠斛剜肉成瘡誰爲補胥常
大嚼過屠門今乃閭閻割鷲股吾聞此語三太息郡邑安知弊如
許祠官稽古垂令典穆穆緝熙由聖主聖心寬仁重民食三年兩
度蠲租賦天生感孚和氣洽日暘而暘雨而雨報功於龍歲有祭
禮若迎貓恩更溥龍兮龍兮知不知如此嗟來食應吐

皇恩蠲租詩

洪武庚申天下秋糧欽蒙全免今年壬戌秋糧夏稅又皆免徵征
繇聖恩寬大亙古無比故耕稼之民歌謠滿野而某則並以區
區所聞者作詩以紀盛事

漢紀蠲租半遷書汗竹奇大哉今聖主全以惠羣黎量與乾坤合
恩同雨露垂豐年魚有夢丹詔鳳重來庶富民生遂敦寬俗習移

微眈皆鼓腹窮士亦揚眉古制成均法新頒釋奠儀雅音諧律呂
名教浹華夷茅茹今朝拔英髦靡一遺八荒仁壽域萬世太平基
水有清河日山無爛石時時雍民皞皞年耄我蚩蚩不作輸芒蟹
真成曳尾龜倚牆歌此曲擊壤付吾兒
林在新鄭縣學六月公文來取其子視疾七月初四日塏言別而
行付家信外寫此

一聞汝有河魚疾三宿心如野馬馳遠阻恨無人縮地吉占賴有
卜言龜眇生稠漆黏雙眼身兀枯株坐有胝預寫蓋棺遺囑去好
傳經業佐明時

送沈居士同塏往新鄭

二千里外視吾兒重九日前期汝歸坐臥待看黃菊綻往來相伴
白雲飛郵亭歇處如飡飯客路涼時早袂衣無限老懷言不盡臨
歧目送思依依

賀袁一泉陳大方新任道紀司官

山中宰相古來有地上仙官今更清夜半光生雙劍出秋高氣感
九鐘鳴丹霄拱極星辰近黃道經天日月明玄札書中多妙理政
須獻納佐隆平

賀聰聞極正心印新任僧綱司官

象法提維付偉人聖皇綸綍命諄諄手持正印天龍護身著方袍
雨露新旭日斗城衙有鼓清時漏浦鏡無塵牆東病叟頭如雪也
喜曇花並得春

贈天寧寺無學長老二首

報恩扶起法幢來鐘鼓天寧講席開道出語言文字外卓然聲價
自崔嵬

麻衣疏屨古人風儷葉駢花一掃空八萬四千修月手斧斤隨入

象王宮

賀府官重修多稼亭

朝家重下蠲租詔郡圃聿修多稼亭一帶金湯增氣概四郊禾黍

勝丹青甘棠風作婆娑舞橫峴雲開翡翠屏斤斧聲中勸農意爾
農豐樂正須聽

周節婦詩呈府縣官

瀟湖水出白鶴溪大江潮來溪口西江潮湖水接連處節婦姓陳
周氏妻良人早世舅姑歿抱雛日夜號空閨盡拈套具易喪具衣
有淚血髮無筭績麻絡絲紡且織破窗夜雨風淒淒孤燈照影伴
寂寞寒風夜雨聲酸嘶煙塵遠避東入海兒方長大能鉏犁時清
歸守舊桑枝荆布蕭瑟茅茨低青絲兩鬢變蒼雪皎如玉樹無纖
翳前年縣官帖鄉里核實上府文可稽老夫近聽路旁語聖皇德
與唐虞齊天語諄諄為天下求賢悉上青雲梯問閭未見旌表節
門前草沒青苔蹊願言宜聖化郡邑罔俾側陋薰猶迷旌善亭中
名一題恩同璽書封紫泥仁看俗習接武皆麟蹠

再贈衡志道
世俗以甘旨奉養者為孝溫清定省之禮鮮能之今寒區衡氏兄

第三人皆善養其母其伯兄志通禮意之勤老而彌篤冬月則
以身溫枕席雖大風雪母不知寒能此一事可配古人況為美
乎故作續前所贈詩以補其闕云

雞鳴雪屋起居安魚出冰池食飲懽最喜兒能溫被席慈闈冬盡
不知寒

寄馬馱沙陳糧長

老龜獨巢蓮葉秋元龍高居百尺樓長江只隔衣帶水佳景宛在
蓬萊邱一年時序換新曆四海弟兄懷舊遊竹君寫我歲寒意聊
作梅花寄壟頭

送曹德昇赴批驗茶引所

山無猛獸水無蛟邑里春來樂意饒部集茶商新箬籠添酒旆
古溪橋赤心報國年方妙黃耳還家路不遙珍重清時用刀筆平
陽遺澤豈寥寥
謝新鄭縣官助葬亡子並以志略送去

去年孟秋初天旱火雲熱吾孫奔父喪病眼淚行血陸行二千里
踈蹕若跛龍歸來秋盡時黃埃滿衰經詢言父襄事從頭爲細說
一衾覆黔婁家人影單子喪具百無措宿儲瓶亦竭幸逢賢縣令
賙贈意切切擇木製美棺敦匠夜不輟寮案同哀傷祭奠豐且潔
青青諸佩衿感化重禮節是猶風偃草弘綱賴提挈吾知賢令心
高誼等前哲無錢及元振有則與同列無麥及堯夫有則與合轍
悲哉我中子忝教兩期月眷言古東里圖經自來缺編蒲載前言
辛苦磨硯鐵草創十八九放筆成永別手澤存於家歲久恐亡滅
鈔書送琴堂公餘賜披閱韞櫝皮費舍無爲醬蒙設會有作家手
織錦爲補綴姓名蠅附驥九泉應感悅矧知葬埋恩益無報銜結
老夫懷謝言縮地恨無訣殘喘苟朝莫烏能見醜蔑坐馳仰崧高
心聲吐嗚咽

述懷

雙眸半瞎耳全聾年及新豐折臂翁孤陋一生棲白屋虛靈方寸

炯青銅人如禽憤真堪恥家有詩書未是窮但願太平田野樂九
原高臥聽松風

人日和前韻二首

曾聞社酒可治聾裨楹分來謝里翁才子儘磨龜硯石貴人多佩
虎符銅人前出語羞稱好杯後爲文錯送窮連日昏昏如病蠶不
知春到棟花風

林居鶴髮老癡聾彷彿忘機海上翁留客但沽鄰舍酒鑄錢安用
蜀山銅一年春色花無幾千古川流水不窮誰謂東家錦衣樹龍
顛虎臥夜來風

寄南澗海萃二講主

東土西天今幾華南能北秀本同家門前弟子齊腰雪案上經文
五色霞袖拂古墩行傍柳瓶分春水坐煎茶遙憐丈室俱清絕屢
夢幽尋適興賒
寄張仲安舅甥及邵濟民許叔遠

去年艤棹千墩浦澆酒伯倫墳上土伯兮伯兮呼不醒仲也愛予
仍眼青最喜諸甥多似舅戀戀之情無不厚東陵瓜田兼種藥杏
林仙人與同樂箕山之瓢今貯詩雞林賈人知不知老夫別來八
九月憂患多端鬢添雪負米不歸悲中子我益又鼓酸風起傷春
不欲向人言恐人忍聽哀號煩最苦雙眸失巖電近日看書渾不
見兀如枯蟬壁常面隙有微明濟且眩阿兒呼來滌塵硯代筆題
詩簡羣彥

無錫華景章以牆東陸先生所序乃祖玉溪義士之文徵予詩故
有此作

猗歟古聖賢饑溺視由已聖賢久不作人多饑溺死天曆年中歲
薦饑老夫身親耳目知操壺枕藉委溝壑烏鳶飽食狐狸肥適逢
郡縣無良吏狎弄文移等兒戲義倉和糶百蠹生殊失先民救荒
意吁嗟玉溪翁高義孰與儔黔敖之粥活鄉里立解倒懸危急秋
指困不結當世交易量不效前人尤盡令菜色作喜色如渡弱水

登蓬邱嗟哉玉溪翁往事誰紀述鄉人口碑傳四方牆東老手春
秋筆老夫知名五十載更喜牆東文字在義聲洋溢流至今又閱
桑田變滄海天生孝孫念厥祖禮樂趨踰繩祖武丈夫不憂無萬
鍾要爲顛厓救辛苦

唐君舉挽辭

早年讀律如五經案頭夜照練囊螢學成能展四方志當路縉紳
俱眼青神州赤縣坐蓮幙贊畫雖勞意磅礴青雲拾級步徐徐腰
纏不跨揚州鶴邯鄲夢斷楊花春桑田變海宇宙新歸來東陵剪
荆棘故侯誰識瓜田人竹林小阮差可喜爲箕爲裘奉甘旨青松
宅邊紅稻畦白雲亭上烏皮几四時花木手自栽客來看花常置
醴有時寂無語蒲團醉逃禪有時曳鳩杖朗誦逍遙篇得鹿門龐
公之安比濟南伏生之年生平有如此死去真悠然薤露歌或可
鐫此歌便作碑銘傳

過無錫口號

客舟無錫道中歸聽唱吳歌淚溼衣泰伯墓田耕穀鯨偃王祠廟
走伊威二三策在遺芳遠千百年來舊俗非詩寄瓢齋老詞伯吟
邊同爲一歎歎

題魚樵共話圖

爾樵斫青山爾漁釣滄洲世事百不聞此心兩悠悠道旁馳擔渚
泊舟促膝面語何綢繆想論會稽人衣錦或訝桐江棄羊裘人生
窮達各有分曷不嗒然自作逍遙遊

贈醫士錢伯祥

杏林老仙山澤臞幅巾逍遙曳長裾逢人善作青白眼有子能愛
岐黃書酒對玉峰傾鑿落丹成金鼎養芙蓉焦桐挂壁斷絃久藥
杵聲中樂有餘

題扇

青山滿眼氣蕭森茅屋人家煙樹春客星多擲漁竿去誰復扁舟
釣碧潯

題子昂竹石圖

玉堂歸來鬢欲絲漚波亭中清晝遲竹君石丈意相得不時爲作
無聲詩

安安道人歌

僧坊旅宿崑山縣夜讀安安道人傳似將秦鏡作斯文道人肝膽
都能見早年學劍欲有爲車塵馬足曾驅馳蕉隍夢斷竟失鹿葑
田乃耕東海涯安知逃名逃未得射弓旌招論觀德諸生遊藝集
如雲儼如風詠從曾哲歸來自喜安其安一室視同天地寬鹿門
龐公與同志妻子不知行路難傍人問我安心訣非佛非仙非臆
說纖雲不滓沈寂天水湛霜潭照秋月家居四壁莓苔青柴門雖
設晝亦屨年來豈獨樂吾樂堪輿俯仰真清寧有時得錢卽沽酒
明月清風作三友胸澆磊塊去卽休不學淳于論石斗嗟我碌碌
者婆娑歌無勞赤松遊只在青山窩挂瓢樹下蹣跚舞歌聲
繚遶青桐柯羣雄自奏卷白波安居之樂奈爾何

遠錄亭爲惠聚寺瑞芝年作

道人愛山常目接無復經緇貝多葉碧天低處見絕頂蒼石爛來
知幾劫清風一灑六合塵須彌芥子等法身諦觀有色若無色大
地盡作曇花春

宿崑山延福庵

葉舟來訪漁樵社蘭若適逢龍象羣屋近玉山多潤色林藏寶地
絕塵紛玄壇坐到三更月高枕眠分半榻雲鐘鼓聲中鳴般若老
夫堪笑耳無聞

題崑山縣主簿先塋圖

舊家衣冠麟角族陰陰榆柳連鄉曲佳城父祖馬鬣封鬱鬱松楸
在吾目養親弗及奉庭闈居官豈敢懷蕨薇二六時中公務畢三
千里外歸心飛出言不作雌黃口臨事不爲高下手琴堂喜得佐
絃歌俸米支來供俎豆高懷炯如寒露壺連步陟彼青雲衢兩塋
銜土集義烏更遣丹青添畫圖

題竹枝雀圖

覆車之粟眾喧呼爾獨忘機入畫圖枳棘叢邊林有竹一枝何異
鳳皇梧

題玉峰書舍圖爲俞彥智作

婁江水接東海洋崑山玉立摩穹蒼江山城邑美如畫之子卜宅
山之陽邯鄲夢斷歸來後詩三百篇長在手尚將古疏補蟲魚復
以今人校蝌蚪門前小溪流水清略約不通車馬行奚童甕汲供
茗盃鷗沙席坐尋詩盟才多轉覺讀書好春雨庭生書帶草時稱
狂客醉鄉遊罔俾四明專賀老

題畫魚圖

魚在在藻或在淵隨波泳遊同一天會得莊生濠上意畫圖詩史
總難傳

題畫竹

顧挺之子作

父作子述爲竹傳神筆意古淡靈犀絕塵品題者誰龜巢老人

題雪竹圖

此君立雪清復清老夫見之雙眼明琅玕恐折驚棲鳳三嘯虎頭風欲生

絕句二首寫延福山中客況寄止庵長老

一榻清風偶借眠白雲長繞枕頭邊客來題徧芭蕉葉我亦留詩

謝老禪

風幡交動曙光搖蔬筍分甘到客寮最喜松聲秋瑟瑟月餘忘肉似聞韶

一般春

希希古高士詩言一般春以詩謚攸居夫豈尋常人一般春意何在莊生論天倪託物肆迂怪列子說混淪其言極夸大老夫請以理折衷慎勿謂我胡公之中庸古今先後無始終洪纖高下俱流通芸芸萬物生意遂盎盎兩閒和氣充鶯鶯燕燕妙歌舞花花草草紛青紅孤松或落幽澗底三秀多生冀壤中步伸尺蠖天運轉

戶啟百蟄雷音同鶴長鳧短分自一敢以私意窺神工一般春意如此朱絃嶧桐奏流水洋洋自入知音耳小車高閣邵堯夫隨柳傍花程伯子鍼芥相投肝膽合祇應絕倒東風裏白雲先生知不知同姓乃有此白眉老夫宿昔愛此詩四百餘載人無之頭髮雪白雙眼眇也來摸索珊瑚枝

風波詞

家住橫山古澗阿孰知平地有風波一壺爲濟中流急可奈無金報爾何

洪武十六年夏五余寓崑山延福庵蒙李無逸冒雨見訪且邀午酌以尋二十年交好之盟席中聞余茂本通政談玉峰志鏤版無逸能力爲之高義可喜別後作此詩以贊其美並致謝意云老夫著書雪滿顛秃筆埽盡松煤煙書成無人爲傳刻明珠暗投三十年玉峰有志今雕鐫公乃下榻邀羣賢魯魚亥豕盡滌濯銀鉤鐵畫森戈鋌婁江風物靡不載一邑快觀人爭先知公高風雅

量振頽俗令名當與書俱傳澗山湖邊五畝宅芙蓉錦城耕稼田
多情念我久離別風雨遠來書畫船開樽行館話夙昔屋角雨聲
飛瀑泉爛烹鵝肉輒炊黍特憐老齒令相便草堂之資送杜甫遙
知破屋窺青山別來東望澗山月再盈再虧今復弦鴻雛出穴皆
五色門牆桃李春俱妍無由縮地共攜手寄詩並送思賢編
自挽二首正余寓山或謂蘇東坡無改冒兩長句
齷齪龜巢翁飄蕭烏角巾干戈二十載幸爾全其身平生得三樂
此去棄六親青山爲我宅白雲爲我鄰寄聲謝相知毋勞爲酸辛
生爲無用人死作無名鬼生死天地閒區區等螻蟻商人自忍饑
楚人從赴水長鏡付兒曹持以字妻子將來事無涯且免聞吾耳
挽張溝南三首風吹六言言變
故人家住江之陰江城草堂花竹深紺杯喜作真率飲鳳管不殊
韶濩音中郎有女可傳業萬事無復榮吾心於乎一歌兮一悽愴
白璧如今空黃壤

故人墓在君山下黃絹碑辭更親寫風流不減賀知章軒昂有如
嵇叔夜秋風蕭瑟宿草青過客知名多下馬於乎再歌兮再思之
誰能爲我追騎箕

故人生來天骨奇抱才不試清名垂山陰道士寶遺墨雞林賈人
傳舊詩寒家夜夜屋梁月顏色宛然前別時於乎三歌兮三太息
歌聲未斷還相憶

次韻答張子才去秋見寄

子才名樸上海石浦人

懷哉博物張茂先淞江太湖煙水連舊藏篇翰合雙璧新發燄光
驚四筵菊花不溼重陽雨汗竹應書大有年教子一經還自讀林
居幽趣想依然

感年

咄彼新豐折臂翁偷生年與我相同世無兵革真難遇家有經鉏
未是窮兒子冷官成覆水老妻春夢逐飄風獨憐未畢全歸願兩
目昏盲耳更聾

天有眼

風波起平地胥溺無可援荆棘生大途跬步不得前清朝赫赫嚴紀律汗吏婪婪弄刀筆翻雲覆雨妙若神白日青天暗如漆天有眼視必明何忍覩此世人之不平轟雷尚擊黨碑碎炎霜豈不飛闐肩惜哉延陵好州邑叫囂之聲雜號泣龔黃卓魯幾時來解我閭閻倒懸急

天有耳

腹中或有劍對面難隄防笑中或藏刀轉頭多中傷人形獸心險莫測擠人火坑猶下石東鄰西舍若牽連爺娘妻子多狼藉天有耳聽必聰何忍聞此世人之不公恢恢天網或汝漏百靈未必皆癡聾嗟哉尼父無復見治長非罪誰能辨況有讒夫口鑠金將謂蓋高人聽遠

寄楚居處士

春風有花隨處看不勞快馬走長安春山有藥皆可采何用樓船

渡東海老生常談人所忽門巷蕭條青馬沒楚居隱者獨知言乃曰與我心同然垂簾丹室清如水賣卜君平絕相似得錢沽酒長滿壺談笑樂與親朋俱金谷飛蛟暫時聚靜遠何如楚居趣匣藏三尺古吳鉤幸無龍光驚斗牛焦桐絃絕挂空壁洗心只用牀頭易忘年之交三十春於我義同雷與陳千墩別來耳目疾兀如朽株門不出六經家業恨無傳教兒只讀原道篇有懷欲得語同志東飛恨不生雙翅牛鬼蛇神雖孔多青天白日奈人何願言正已斥邪說始終一念堅如鐵寸膠欲澄千丈渾厥功有無宜莫論

和任義甫重陽絕句三首

西風拂我菊花筵霜落蒲萄酒甕前弓勁馬肥煙瘴歇雲將士正開邊

題糕醉筆吐天花風景蕭條興亦嘉多少玉門關外客故鄉一望一咨嗟

休官陶令果何聊不赴江州太守招天上無人能送酒浮雲空作

白衣飄

九日志喜

黃花無雨笑相看青女初霜未覺寒天上編氓增負版雲南征士
解歸鞍市沽斗酒錢三百鄰送杯羹物九般最喜叫囂聲不到來
朝雞犬得平安

題松溪釣魚圖

看花不躍長安馬濯髮滄洲結鷗社千巖萬壑一絲風豈是尋常
釣魚者月滿船水滿川月在水中光不溼人於船上坐青天魚乎
魚乎自悠然只今吾亦忘吾筌

大林庵主真公往宜興參弘辨禪師回途跌傷其膝作此問訊

石頭路上悟玄機跌破泥丸一笑歸從此不須盤膝坐臥看來往

白雲飛

天界藏主銘祖心歸常州府護國院信至龜巢作此代簡

偶著青鞋出薜蘿竟參白足坐盤陀龍蟠虎踞江山好燕去鴻來

歲月多言別石城歸舊隱笑將瓢鏡爲重磨松枝東長煙霞喜我

亦滄洲舞釣蓑

題高士觀松圖

賢哉陶元亮休官撫孤松之人坐松陰高興將無同楚楚煙霞裾
澹然冰雪容安知洛陽道車馬正憧憧

尹泰春玉峰舊隱圖

春風夢破邯鄲枕三徑歸來掃白雲藏壁家書還自讀排衙縣鼓
不相聞內交林壑蒼髯叟比德冰霜抱節君熱客不來心似水滿
庭空翠落紛紛

王仲昭挽歌辭

千墩之陰益浦曲鬱鬱蔥蔥煙樹綠五陵豪氣適銷亡此地人稱
小金谷中有琅玕玉一株枝葉扶疏鸞鳳宿鶴鷗夜唳飛木上九
頭血汗玲瓏玉飛廉怒從天上來東走扶桑西若木埽除妖物靡
子遺玉株亦拔移荒服八千里外雲南地煙瘴偏方魑魅俗道經

七譚路幽險澤有神龍惡薰觸洪浪掀天霹靂飛幾作湘纍葬魚
腹丹旆歸來空鄉土華居高邱生死足縷麻痛泣桑梓悲淚痕多
似湘江竹嗟我東西南北人愛爾瑰奇曾刮目鄉無且評勿爲少
令名在我思賢錄嗚呼青山紅塔道鄉墳誰復相期薦秋菊

贈醫師張有成

嗟哉延陵古城郭舊家喬木秋蕭索先生眉壽氣如春借問平居
果何樂笑言吾樂得於天燕饗不勞鐘鼓作一從無夢見周公青
箱五經束高閣便便老腹只醫書頗學挂壺人賣藥藥囊得錢儘
沽酒兒舞斑衣我杯勺有時出郭看青山手策筇杖曳芒屨楊子
江頭瀟湖口晞髮滄洲吟杜若歸來一曲焦尾桐今古閒愁總忘
卻老夫喜聞心與同以言相贈仍相約東門之東劍井西蘿屋數
椽雲一壑肯爲雲山數見過樵飲漁歌良不惡人生百年能有幾
但看花開與花落世傳仙人上天騎白鶴荒唐謬悠言不忤請從
先生持筆削

崑山辛彬甫元夕前旅次岑寂作詩懷之

魯魚一洗版圖編徑著麻鞋從上天七里八岡風雨夜誰家燈火

對愁眠

贈呂克明

馬鞍之山玉嶙峋氣所鍾者德潤身古人已矣不可遇今人多躡
青雲去中有一人冰雪姿青雲垂翅歸故枝老夫識面三四載但
見才華發光彩去年訪舊山水鄉乃聞孝行非尋常兢兢持身親
所喜爲親不惜殘肢體親存盡權喪盡哀哀號淚溼三年縷嗟哉
天質美如彼移家恨不居同里歸來細與吾兒說檢身自謂誰優
劣縣駒處齊善歌東瞻玉峰奈遠何

寄耕學袁先生

新歲又人日故人無嗣音數詩曾倡和半載孰浮沈笠澤鷗盟在
蕉隍鹿夢尋吾今洗吾耳聽此絕絃琴

自和感年

軒軒黃鵠化鳧翁老態如今變亦同幾度出門遭鬼笑一生徒壁
坐詩窮埽松先壠清明日杭葦官河船趁風春怨忍聞嗚蜀魄旁
人爲我喜癡聾人無爾音樓詩曾外味半建時新水空帶鱗思空
逸庵詩代膠山徐伯樞作

士學而仕猶力於農三時服勤乃逸於冬當勤之時以稼以穡鹵
莽滅裂施報勿忒未勞而逸君子所憎勞而不逸君子不能於昭
令典致仕有期一日必葺罔敢或隨時之至矣銜恩遄歸逸於而
庵亦孔之宜其容舒遲其行逶迤含哺鼓腹樂乎雍熙莊曰大塊
逸我以老是用作歌以爲頌禱垂鼓韻姑蘇夫婿面三四建卧
清澹子詩王繼仙無誤香齋問史古人曰笑不可飲今人老
世味尚濃郁清澹獨有水寡慾養吾心汪汪亦如彼朵頤良可羞
菜根有餘美凡爲君子交當知肉食鄙

題趙典史家藏聰閣極所畫水仙天十里八圖風雨外銷燈火
有人宴坐風泉室水仙之花照佛日水鷗滌筆爲傳神不著纖塵

沈清質山礬是弟梅是兄涪翁品題非過情紅蓮幙靜簿書暇時
一覽觀心眼明

題松庵圖

吾聞張子房漢家初封萬戶侯便從赤松方外遊又聞陶隱居華
陽高住三層樓尚愛松風聽不休從遊松子或假託請聽松聲真
可樂古人今人同此心老去棲遲必巖壑白髮左司諫赤心天子
知君恩養老歸草木增光輝今觀畫史貌清致想像爲作松庵詩
青山崔嵬青松離奇三開辟蘿屋四壁莓苔衣前營燕雀來賀喜
中林猿鶴還相依山中服食何所有松根茯苓大如斗拂松輕於
白玉塵松醪香似黃封酒座有嘉賓樽不空每日共澆談笑口不
言不笑默相契平生久要蒼髯叟向來百卉腓且衰偃蹇不受冰
雪欺尼山聖者無復起歲寒後凋誰品題春風牡丹洛陽市華屠
金盤鬪奢靡車馬遊觀人似蟻但說姚家之黃魏家紫那知松庵
之樂清如此

送任義甫之京

放卻滄洲老釣竿送將圖籍上長安朝霞爛爛日初出熱客紛紛
路未乾七里八岡鳩杖去三山二水鳳臺看薰風解愠今猶古舞
袖歸來語所懽

辛彬甫自京城回過東洲田舍極言曾觀天顏之善舉酒送別詩
以賀之

一百十戶一版圖兩三箇月兩赴都親承天語拜闕下喜得風帆
歸海隅到家且聽華亭鶴斫鱸旋買松江鱸鄉人爲作輦脚局眾
樂不妨如大醕

悼護國寺昇東谷和尚

憶昔桑田變海時法幢扶起歲仍饑諸方乞食供緇侶十載開堂
響白槌香火石龕獅子像紗籠塵壁老夫詩客來今雨仍畱宿誰
向東園折露葵

六月初一日亡室初度感愴而作

白髮三千丈齊眉六十年今朝煮湯餅爨婢亦潸然

六月望自潞城回東洲書目前二事以示親知庶聞者尚有感焉
緹縈贖父謁天子聶嬰痛弟哭屍死親親義重不顧身千載流芳
著青史令人豈無骨肉親冷眼視同行路人朝家旌善作亭子誘
我薄俗令還淳吾詩相勸非相訐不信汝曹之心真是鐵

次韻錢彥學見寄七首

頻年歸計果何如九龍之山駒谷虛山中流泉若有語遲子續修
鴻漸書

三十年來山上山詩名流落五湖閒歸尋鋤斧南泉老隴有白雲
相伴閒

萍水相逢記昔年馬鞍山下屢周旋羊裘不脫魚竿老彷彿嚴光
也自賢
三榜三魁我舊都如今文盛說中吳詩窮不用論郊島風雅揚揚
有大涂

梁谿如鏡照羣峰勝地生才淑氣鍾想像鵬冠人未老金莖露洗
玉芙蓉堪好舊時味今文盡隨中吳轉不須餘寂寞風鏗
桑柘東風叫伯勞犁鉏南畝課兒曹一枝樂與鷓鴣並阿閣那知
有鳳巢豈有昔年馬山不鳳巢
春秋九十是明昇禮樂三千夙志衰訪戴未能移剡棹和陶猶欲
繼坡詩

題天葩雲液軒

識馬不須論牝牡相人但欲知賢否我愛天葩雲液軒中人賢在
一真無矯揉戴星出入公務勞退食從容樂詩酒紫毫之筆吐天
葩得意如看長安花白螺之杯瀉雲液破悶絕勝陽羨茶謫仙九
京不復作一半百篇誰共樂藍田哦松人亦好座無杜康殊落窳
我詩我酒興不孤風月溪山皆畫圖胸中磊塊盡澆去方寸炯如
冰一壺愚聞孔公醉決事勝人醒孔公何人哉希之即齊名期言
請爲座右銘酒德有頌政有聲詩聲更作韶鈞鳴

壽任義甫十月十日

曾看青海變桑田又歷黃楊厄閏年抱膝面山西牖下科頭背日
午簷前中郎有女能傳業僕射無兒不怨天八十春秋雙足健鄰
人喚作地行仙

次韻彭知縣以公事如宜興過瀟湖作

百川水溢東流急天風卷雲如卷席雄鳩呼雌鼓晴雨且喜人無
雨淫疾官船挂帆出湖去乘風破浪無衝激舟人笑指一足鳥也
作吟屣退飛鷁山無猛獸水無蛟陽羨往來人絡繹蓬窗拄笏看
青山佳句鏤成忘盱食令乎令乎匪遊逸聊爲湖山窮眼力瀟湖
飛渡不崇朝東匯沙湖又深入彼疆此界犬牙地概用朝家律三
尺人言行路古來難範我馳驅自無失寄言勒移署椽筆分我餘
光照鄰壁

懷吳中衡心友

老去多蒙故舊憐客來喜得信音傳書能教子醫傳業居欲依仁

宅屢遷赤米白鹽瀕海地青萍綠綺博山煙曾聞靈素多曾注好
擬詩家作鄭箋
代簡張子才

遐想張黎谷相望吳野居馬鞍長在望魚尺久無書七月陽來復
三年月閏餘芸邊生意動君子意何如舉火天
王有恆秋初貽書約食令平令平到
舊雨曾來今復來故人懷抱亦佳哉黃楊樹厄三年閏緹室葭飛
六管灰文有燄光皆李杜情如膠漆卽陳雷燈花有約鷗盟在莫
負柴門埽綠苔
龜巢彙卷六

龜巢彙卷七

詩

龜山祠詩

卓彼文靖公蚤立程門雪載道歸東南統緒賴不絕鳳鳴朝陽能
幾時朝棲瓊林暮棘枝歲晚空江卜居此毘陵草木爭光輝邇來
陵谷一再變煙滅灰飛舊書院殘碑斷礎落誰家應作寒礎擣霜
練南山北山禪者流鐘鼓雷鳴塔廟修儒衣儒冠亦不少孰謂好
賢無二周龍鍾老諸生不言忍包羞甘棠樹下吐肝膽愛禮可得
存羊不羊存禮亦存所願或可酬渠渠一畝宮依然對滄洲將使
邑人知有東家丘駿奔籩豆祠春秋

簡曹谷賓

往昔政和閒結交先君子時葉公子承蔣公子舟諸良友數嘗文
會於九華隱者周先生之家其書札之妙聲詩之佳今皆不可
得而見矣區區追憶故交輒成韻語寫去谷賓吟几爲後會張

本云

清交早結先君子博學自謂無恆師草堂詩史擬欲續蘭亭字書將並馳百年陵谷變更日四海弟兄生死時舊家南獻埽如電獨愛義之又有之

冬至日方欲以老況自述孫垣來侍傍說江陰陳庠仲袁仲徵二公倡和之娛區區坐馳用成足此詩以代折簡

耄矣又逢長至日悽然聊作短歌行一妻一子竟契闊兩目兩耳幾聾盲里中尙結雞豚社江上豈忘鷗鷺盟珍重暨陽雙白璧慎毋輕用易連城

江陽鄭教諭以詩見寄褒美太過且聞時赴京考績因次韻以餞其行

大君立極揚威靈麾斥百家尊六經出圖之馬出未已來儀之鳳來不停萬方皆效華封祝諸將已勒燕然銘化風覃被族麟趾聘物遠來監虎形雄州巨邑並庠序歌臺舞榭無優伶先生橫經虎

皮席弟子立雪梅花庭延陵躬耕地井井尼山聖父碑亭亭正逢海內興賢日豈使江湖老客星泮宮芹藻得佳趣鄰封草木沾餘馨龜巢一老辱篇翰鱸魚幾時瞻典刑趣裝又欲覲金闕飲餞愧無雙玉瓶淵清冰潔知者眾會有孫邕薦管寧

予以小鑪閣坐臥安煥名之曰熙熙甕天孫塏到江陰語劉小齋先生蒙篆書四字見其筆畫清勁可喜作詩報之乃翁澹齋先輩能篆隸而文爲鄉郡所稱詩中故追美之

昔在金斗城晤言卽相違今觀玉箸篆神氣不少衰澹翁心畫傳師承古人誰秦相漢中郎殆欲肩相隨舊家冠蓋里密邇延陵碑古意師聖筆真贗吾何疑正如善相馬而忘牝與驪懷哉揚子雲載酒當問奇奈無縮地術龍鍾空坐馳

周節婦陳氏吾甥也早寡賴其母撫恤之恩爲多母卒且以語付託吾夫婦攜之避兵居吳中十有餘年白首歸里一生艱苦老夫獨深知之故書此以紀其略云

五首

哭夫未了又姑嫜獨抱遺孤涕泗滂匳具賣來營葬具不憂寒餓
死空房

南山石爛海揚塵風雨飄搖笠澤濱嗟歎涓陽田舍老辛酸同受
十三春

狼煙未息歲仍饑蛟室相鄰地亦危長夜點燈機上織明朝換米
釜中炊

戰骨縱橫歸路迷烈塘疑是越來溪良人地下應憐汝不作王凝
斷臂妻

裙裾藍縷著簪折鄉井蕭條草屋卑節孝兩全頭雪白儁能說與
史官知

臘月十四日風雪極寒大林庵主僧以佛廬落成

冰雪堆中作梵宮磨磚布地與金同何當放下南泉斧坐聽松杉

萬壑風

悼熊元修處士

落落龜巢翁閒閒鷗社叟雷陳十年交雲水三江口在昔鷗沙結
社時盟鷗之詞我筆之吟風詠月意相得絕似伯牙逢子期朝亦
詩暮亦詩詩興動來忘渴饑松江太湖墨淋漓鶴汀鳧渚生光輝
毛髮雖秋霜光風自懷抱不虞白石爛但覺滄洲好一朝陵谷俄
變遷我歸耕我延陵田銜冤塞海笑精衛抱怨思家憐杜鵑鷗社
叟輒雙腳晏然不受功名縛社鷗尋盟還可樂第我途路遙來往
難如昨前年訪戴踐重約舟到山陰眼生膜黃庭不寫贈籠鵝蒲
萄醞醅旨且多船頭送別誦佳句且知步武追陰何音書從此不
復得我心孔竅皆茅塞清夜悠悠思故人夢裏依然見顏色客來
聞死半年久俚俚不能將絮酒悲歌爲探驪龍手三日悲風動林
藪

次韻答袁仲微見寄

大江南岸眾山蒼巖谷深藏寶劍光江上風波來衮衮山中歲月
去堂堂能承書業千金產喜有童孫咫尺長杯酒正須朝夕醉無

勞更覓解愁方

四皓圖二首

天風吹斷紫芝歌四皓皤然出薜蘿不用勒兵呼左袒安劉孰與絳侯多

飽茹山中紫玉芝姓名誰徹九重知濟時陰有回天力震器安然不動移

瓜隱爲崑山邵濟民賦

藥壺舊懸紅杏林瓜廬今住清江潯南柯太守了無夢東陵故侯同此心灌園自捧漢陰甕抱蔓別作黃臺吟老我坐馳三百里何由縮地重相尋

簡袁耕學先生

馬鞍山開龜甲屏皋比之席講六經一年不見朵雲字三月又看花雨零角巾小像固垂白野史巨編方殺青宜有詩筒繼前輩使我晉鄙沾餘薰

寄熊元修

操別廿五月昏耄而受罔於人者多矣詩言此謬餘從可知一笑之餘必蒙警教

愛子腹便便逢人問孝先誤傳烏鵲信剛道白雞年鷗社詩千首龜巢橐一編何時重攜手相恤語夔虵

次韻酬陳庠仲見貽二首

鳳皇阿閣自新巢鷗鷺滄洲只舊交百里雲山人契闊一簪霜雪髮蕭騷忍看雨溷階前蟻怕說風掀屋上茅樽酒談心宜有約誰家竹裏借行庖

春申港上老人村家有詩書教子孫白首竟能安菽黍丹心豈不台乾坤諸生問字車載酒滿地落花童掃門且喜年來亡世慮不時杯勺醉昏昏

又和袁仲徵陳庠仲去冬所寄之作

腐草煜煜螢火生枯梨紛紛山螿行可憐身病道亦病猶喜目盲

心不盲溪山相望數年別松竹歲寒三友盟何當相對文字飲似
昔盜簪金斗城
壽萬拙齋十首

蓬萊水淺鐵船歸城郭人民半是非且喜春秋今七十能知六十
九年非

天開壽域大無疆林下幽棲樂且康不須更覓長生藥昭代如今
化日長

芳茂山前種玉田芙蓉湖上采蓮船東鄰西舍連花竹渾是桃源
一洞天

一襟秋水心無競滿面春風唾自乾可惜時無吳道子畫圖傳向
邑人看

菖蒲花開香滿庭簷旌簾旆風泠泠高堂燕客作生日紅頰紫髯
雙眼青

今吾故吾知不同朱門無復挂桑弓但將一斛葡萄酒淨洗平生

磊塊胸

金作狻猊炳寶薰桃笙如水客如雲榴花不用纏頭錦也學吳姬
舞絳裙

燕雀歡聲新第宅溪山佳景古丹青琵琶自製玲瓏曲彈與龜巢
老子聽

拙齋之拙意何如天賦惺惚本有餘欲識顏曾愚魯地一鞭希冀
莫躊躇

舊家青氈什襲藏兩兒斑衣長侍傍人生可樂有如此一日可比
三十霜

昔人謂積憂成陰陰積成雨今陰雨之久且多竟不知何憂之積
以致然也淺陋之詞姑識歲月時乙丑夏五望後九日

常年五月衣輕葛今年袂衣猶未脫一天陰氣冷如秋溪山黯澹
煙雲稠有時雲罅曜靈出頃刻朱光暗如漆商羊飛來作人舞羣
鳩醉甚渾無語雷聲虺虺雨浪浪一雨十日夜亦滂人家屋壞十

八九牀頭泥淖生，蝌蚪疑是彼蒼媧。石裂天河水漏何時竭，補天無術正憂心。水鄉之田俄陸沈，常州地接蘇湖境。青苗在田知幾頃，農人惜苗如惜兒。苗死一時真可悲，全家老稚仰天哭。天若垂憐，天雨粟，不然歲饑方薦瘡，里胥催租將奈何。

贈時義夫

生民天降衷，所性無不仁。物欲肆侵蝕，乃底失本真。嘉爾鴻鵠姿，超然鷄鶩羣。里有賦蛇毒，比屋含悲辛。叫闐聲徹天，恩波沾枯鱗。老我無能為，喜此虛譽聞。願言一簣進，將來見嶙峋。

貽呂雋

人生異禽犢，秉德方寸許。一本推所尊，推恩篤諸父。嗟哉淳樸姿，片言不輕吐。去年赴叔難，代服徒役苦。橐篋復今年，赤腳走風雨。紛紛蕭艾中，薰然見蘅杜。願予子若孫，儔能類於汝。宜從竹林遊，氣習變齊魯。挽徐仲清

妙年博極軒岐書，晚景晏安閭里居。小山叢桂蔚如故，大兒一官清有餘。落成客散烏衣宅，送葬人來白馬車。安得並騎箕尾去，逍遙八極曳霞裾。

夏五卽事

貪墨何多禍，蔓延刮毛龜。背欲成甍千村，萬落炊煙斷。田舍逃亡犬餓眠。

寄王尚綱陳子儀諸友

起予每憶二三子，投老於今九十年。自是片雲相隔爾，如何尺素亦茫然。蝦蟆產竈橫山下，螭螭輸芒溇浦邊。若問龜巢舊風景，月餘鄰里斷人煙。

簡無錫華景彰

百書不如一見面，此語信然何未然。燈花有約半年久，桂子已落中秋前。東門種瓜抱溪甕，西齋爇茗剡山泉。少遊鄉里樂如此，應笑鳶飛瘴海天。

寄伯樞

東膠山人不出村南州高士之裔孫十年曾作螻蟻夢四壁祇有
莓苔痕松分女蘿補茅屋洞引乳泉澆藥園別來幾度屋梁月顏
色宛然清且溫

寄丹陽孫秀民

翩翩白雁秋風涼紛紛白蘋秋水香官河兩堰隔三舍旅次一違
今十霜菱芡練湖秋大熟莓苔劍井夜無光故人知我老痴否年
似伏生書盡忘

懷京口俞伯鎮

鐵甕新城舊隱居江山勝槩畫圖如五條街口多輿馬萬卷書中
老蠹魚道合不妨鄉土異情親可奈信音疏杜鵑花與人俱好珍
重題詩一寄予

洪武乙丑秋新鄭縣學以通經薦吾孫塏移文本縣徵赴吏部塏
於六經有望洋之歎且欲辭而不可得予以孔孟之書列乎九經

塏嘗受業故臨別示此數語勸之

猗與古聖賢遺言存簡編孝經及論語孟子書七篇載道繼六籍
煌煌日星懸斯文覺斯民千有五百年汝生家辟兵九經失青氈
借書二三策教汝朝暮間大哉孔孟學會如管窺天還鄉願卒業
奈汝多屯邅竭來誰薦鶚通經乃虛傳往哉詣春官從實吐肺肝
絲麻雜菅蒯博采豈舍旃天朝恩惠寬茅拔茹或連立身報君親
慎勿違聖言

送楊景子以通經薦舉之京

亭亭青玉桐孤生秀中林雨露得所養歲月亦已深良工拔奇才
獻作羲皇琴繫以朱絲絃鼓之丹鳳吟八風宣九垓令人格非心
鄭衛化韶濩太和無古今吾將洗吾耳朝夕聆遺音

和楊景子韻冬至

隱隱鐘聲出景陽陽生望闕賀朝忙勳名有日印如斗舞蹈今朝
靴滿霜咫尺天顏春色喜輪囷雲物瑞光長錫錢張宴宸恩厚一

舉真堪累十觴

冬至後五日承郡齋文會翼早賢長史置醴款洽且有贈言次韻
奉酬并謝不敏

文章太守誰同樂幕府賓僚如李郭坎蛙誰信有奇逢鼓吹敢隨
東海若枯腸喜得酒一澆枵腹毋勞篋三縛獨憐澗底老孤松春
風膏雨徒優渥

初度作

重光之冬湯餅客孟光相對頭俱白吾兒樵雪中歸來擔頭還帶
詩三百詩歌熾艾壽觴舉呼鶴階前舞瑤翮安知此後境多乖五
載家門毀雙壁行年今與伏生同兀若枯株雪霜厄樵兒遺孤主
黔簿四千里外勞相憶我昔蹉跎四方志每見桑弧有慚色願言
膏雨發孫枝先世衣纓復輝赫皇天於余賦亦厚才散如檇壽如
櫟高語言聲耳尚聞黑白分明眼猶識四肢百骸筋力微頭容與
心依舊直响噓素不學松喬逆理偷生正何益曹橫山下青松宅

含笑全歸待朝夕山瓶乳酒如蜜甜笊筍寒魚鮮可食家僮荷鍤
日息忙爲我插花且吹笛自今每日從歡伯龜巢瓊天適吾適斷
送子生真上策

臥雲歌爲華景彰作

我昔所喜青雲人雲梯登登上星辰餘如風花落藩溷伊人可仰
不可親只今老我成枯朽愛爾巖棲臥雲叟白雲一壑數千畝且
無租稅論升斗悠悠我如雲寂寂雲伴我雲無出岫心吾無洞門
鎖一榻偃仰得自如兩膝屈伸無不可布爲被非難能我被以雲
如白綾木爲枕我未曾以雲枕頭時曲肱牀無上下亦無客別有
意氣非陳登飛鷲跼跼自炎海夜鶴總帳清於水佳哉叟之所樂
者如彼今人古人誰可擬華陽陶隱居投簪謝朝市中作相心
未閑剛道怡雲豈無愧華山陳處士大笑脫塵屣鳳皇銜書空往
來熟睡雲臺終不起願言學陳毋學陶此身長與雲逍遙萬松嶺
上老禪衲形服雖異同清高況有煎茶好泉水活火煎來味無比

詩腸搜出煙霞語不異不同人共喜老夫耄矣少筋力尚欲去著
遊山屐細啜月團雲滿甌分臥石牀雲半席幽懷爲我一宵傾免
使相望兩相憶

郡侯以蘭行年九十以詩見贈敬次韻歷敘平生以鳴謝臆

延陵野老家業儒舊壁頗有先人書童年愚鈍不努力涉獵五經
多缺如二十而冠三十娶取友必端無佞諛春秋四五十餘髮
猶未白顏猶朱才如韞綬不知恥光範門前曾自譽六七八十成
潦倒興來尚復歌吳趨今年九十常晝寢誰敢效尤扳宰予雲山
萬疊作圖畫松風一壑鳴笙竽雙眸漸昏耳漸聵面壁寂寞如僧
居焉知府公特尚齒贈以大篇明月珠老夫得之感勤渠雀躍拜
起不用扶合室稚老俱歡虞

十一月廿七日得埧口信以詩志喜并記臨別祝規之意

賣橘人從采石還口傳家信報平安路經湖北雖云遠天近雲南
不甚寒佐令謹持三尺法尊君長秉寸心丹驛橋臨別叮嚀語應

念貽謀作鏡看

自和同前詩於次年正月十三日寄黔陽

四千里外之官去百丈牽江舸艦安新沐恩波從日下舊家門地
不冰寒洗心正在詩書澤換骨毋勞內外丹新歲僕歸正二月家
書細寫阿翁看
簡陳子章先生

身不封萬戶侯眼不識千金裘深衣幅巾避戈矛往年零落崑山
州兵餘還鄉理西疇臺笠播種穰穰收今將蓋棺萬事休但欲服
飾如前修先生舊衣巾暫爾可借不縫人合古制素願吾乃酬飄
然長裾泉下遊藍縷免致先人羞生前相往來二老亦風流

橫山歌壽萬拙齋

橫山之巔青入雲冠冕一邑無與倫山南風景最佳處隱居豈是
尋常人此山鍾英三百載素封不乏青氈在向來吳下辟煙塵恨
不移山東入海還山喜得無崩騫種玉舊田耕紫煙雲屏正設後

堂後空翠直灑前塋前觀雲每日烏皮几灌關有時龍井水人家
雞犬寂無聲宛若桃源畫圖裏山中羽人王八百昔日仙宮今佛
宅丹砂未必駐童顏把酒看山真上策山乎山乎德不孤靜而壽
者山爲徒美哉山禽知此意石榴枝上呼提壺我歌橫山歌未了
拙齋爲我開懷抱移宮換羽作新聲彈入琵琶歌更好百斛葡萄
爲傾倒

屢年作小詞或詩爲萬拙齋壽癸亥夏五予以鄉人嫁禍兒輩往

崑山救之時有詩曰

予懷紫髯翁新作綠塗堂常年初度日嘉賓四筵張虛左待老夫
酌我九醞觴甥孫舞鶴鴒絲竹鳴鳳皇情與酒俱深飲量非汪洋
今雨獨不至應憐走他鄉我我馬鞍山絕頂遙相望橫山一髮青
漏浦西日黃想像祝眉壽有如賦高堂

留別永懷寺長老暨袁子英余茂本通政

歸吳十載前一宿永懷寺龍鍾今雨來鹿苑廢如此佳爾山中人

法幢扶欲起清風方丈室白日靜如水門迎老詞客問我來何自
忘形亦忘年相見卽相契坐啜趙州茶並隱維摩几爐薰清我心
乳供便老齒鉤簾看玉峯山色亦爲喜新知多邂逅咳唾珠玉美
白首莫逆交獨有子袁子德星聚叢林草木亦韓韓我思古先輩
支許或可擬兼旬數相過倡和不知幾庭前石榴花半落蒼苔地
長揖謝山靈歸袂沾空翠

陳德廣知事以自壽之詩見示予以其炎字韻險不和乃效唐人

和意以壽之故落句如此云

哦松未了險官去隨例放閒恩更多父子一經傳有自桑蓬初度
樂如何門栽彭澤先生柳籠養山陰道士鵝最喜孟光眉案舉捧
觴嬌女把香羅

德廣喜予詩和韻見貽予復答之卽三月十一日繁霜異於領聯

書之非虛語也

繭紙寫來詩句好雞林傳去古人多花開三月春如許霜落五更

寒奈何留客正須沽綠蠹引年何必餌金鷲六街車馬紛馳逐自
喜蕭齋雀可羅

次韻答華以愚見寄

九龍山東舊宅遷一瓢齋裏曲肱眠賢如栗里陶元亮閒似香山
白樂天倡和正須歌白雪丹青何必繪凌煙竹林諸阮多才俊文
會何時共酒船

哀詩

鐵船海上遠移家金斗城中蔗境佳我昔頻來桃竹杖公方新種
木蘭花書因教子時常買酒欲娛賓夜亦賒春夢一場隨蝶化老
夫三歎立鷗沙

東西家

東家賣兒哭幽咽西家鬻妻含淚別形容總覺瘦如柴肝膽那能
硬如鐵低田水沒欠秋租今年夏租麥更無妻兒舍我莫怨呼我
亦忍饑朝暮殂

重午日小酌

青年自是好遊者白首始知行路難一寸芳心徒似鐵數莖禿髮
不勝冠匏樽偶有菖蒲酒菰黍香於苜蓿盤莫笑貧居輕速客餘
生能得幾團圓

五月望日寄江陰陳庠仲

一別半年久相望百里閒陽春知寡和落月見清顏醜酒澄江上
題詩小石灣龍鍾還念我時復夢追攀

同日寄袁仲微

申浦水東頭悠然客馬周焦桐絃白雪芳草席滄洲昨夜三更雨
今朝五月秋有懷飛不去煙樹鬱相繆

曹文質自金壇來云費延年教諭傳語且知告老而歸閒居可喜

因作此詩代簡

我思故人松柏顏客來寄聲蓬藿間鱸堂講學竟將老鳩杖拜恩
今樂閒清風枕簟五柳宅白雲圖畫三茅山雲舟未得見安道乘

興豈無詩往還

鄭朝宗教諭以予去冬初度自壽之詩次韻見貽予復和而贈之
憶昔予爲廣陵客兩頰丹砂眼青白蕃禧觀裏看瓊花坐列羣英
杯飲百無何陵谷忽變改塌然斂我扶搖翮此花天下更無雙獨
手誰焚夜光璧先公舊物廣文氈家傳喜得無艱厄抱琴來坐杏
花壇洋洋古操令人憶青氈坐久琴愈清君山草木皆愉色老夫
今春辱佳句轉眼炎曦又隆赫郢斤非不妙彫鏤奈何吾衰腐如
櫟生平甚愧性聲齟老去偏懷舊知識孤舟野渡豈長閒一壺會
有千金直合懽杯酒細論文恨不能飛見三益江流南匯春申浦
海門東入陽侯宅河鮑江鯨鬪鮮新苜蓿之盤自朝夕鬻舍安如
廟堂坐脫粟甘於鍾鼎食睠我郊居樂亦然朝聽樵歌莫漁笛忘
機相與白鷗眠送窮不效昌黎伯假令秋至轉饑寒亦不題詩寄
高適賢哉子淵可矜式陋巷安貧載方策
六月初八日雨晴懷毛伯尚

去年五月涼如秋今年六月寒颼颼重雲晝暝雨連日田家復恐
沈西疇朝來日出溫風起歲不薦飢人共喜貧家四壁屋漏痕彷彿
篆書千百字忽憶山中人讀書兩眉白能負仲由米曾漂高鳳
麥高堂養親侍親側我衣斑斕親喜色有時諸父竹林遊彈琴詠
詩尊俎席人生此樂古人少今乃熊魚兩兼得老夫每問書帶草
鄉里小兒渾不識但道墨硯池水漲苔衣碧苔衣碧池水香思若
人兮不能忘長林豐草春茫茫青松礪底舍冰霜鯉魚不隨白石
爛鳳鳥有時鳴朝陽停雲之詩歌未足玄蟬爲我聲相續
哀詩

鶴長鳧短總非悲聽我山陽笛一吹黃耳再無前日信丹心獨有
上天知送行南浦成長別歸臥東山誤有期吾老未教僮荷鍤劉
伶應笑阿翁痴

讀大誥作巷歌二首

天語諄諄禍福靈風飛雷厲鬼神聽挂書牛角田頭讀且喜農夫

也識丁

一天風雨洗塵昏日月恩光及覆盆雞犬不驚田舍樂叫囂人不
到鄉村

贈陳棲雲

鶴溪之水瀉浦分一灣繚繞梅花村窮冬萬木凍欲死此花歸若
靈光存清如西山采薇孤竹子白於華陽洞口嶺頭雲隱居者誰
希夷後人持一編種樹書戴一幅漉酒巾有時醉飲肱作枕老瓦
共眠梅樹根有時不醉百事理可與孔公同出羣青鞋布韞駿奔
走今年早春朝至尊紅雲殿前三舞袖歸來滿腹懷絲綸諄諄語
鄰里切切教子孫子孫不能力耕稼徵輸能爲公家勤編氓租斛
足萬計雞犬不驚安我親短檠燈火讀大誥喜色夜夜燈花新甌
簍滿篝秫田熟熟釀百榼醪春親朋簪盃坐常滿湖鮮日日擊
豐滄胸中不著愁半點雲夢八九能鯨吞東鄰西舍靜如水夜無
催科人打門安居樂土有如此何異武陵人說桃花源老聃戒止

足願言尊所聞濁水膠可澄清鏡塵乃昏秋風挂席一相見此意
吾將三復論

贈周彥美

象賢有子付青氈家住城西綠水邊門柳數株同舊日公租萬斛
喜豐年試聽濯足滄浪曲應笑然臍郿陽煙朝夕酒杯長在手優
游身在飲中仙

簡王尚綱

不笑皤然謝九流牽車服賈思悠悠醉吟人老香山社詩到雞林
價重不

贈詹伯遠

西北風高寒露零牽蘿補屋樵柴荆看雲長日烏皮几夜夜教兒
讀孝經

示孫塏四首

龍門一躍去年秋徑著青袍赴遠遊半部魯論堪輔世政須忠盡

繼前修

黔陽江水不勝清喜得居官濯爾纓秦鏡照人肝膽見邑民盡在鏡中行

黑頭勳業志方雄黃耳書歸見面同斷織機中垂白母抱孫時復倚門東

春雨秋風歲又寒翁年近百足蹒跚橫山菽粟東洲水多在行窩樂考槃

初冬感懷令垣書所居屋壁

在昔陵谷變海上十五霜歸棲失故鄰乃落劍井傍百指薙荆棘
履鉏破天荒東洲釣月磯橫山樵牧場一葦去復來十月新稻嘗
攜幼入寢門淒然北風涼吾兒婦嫠居我孫官遠方筠籠鶴何之
盆菊花自黃跛倚赤藤杖終日徒俛俛

初度蔑以爲樂杜撰古樂府三章而令諸孫誦之老夫聽之比之
挽歌者歌蒿薤於柩前豈不樂哉

龜巢老人忘食貧歲時強欲娛賓親賣琴沽酒作生日蹲鴟爛蒸
鮭菜新承歡幸有斑衣人君不見古人云酒杯不到劉伶墳杯行
莫厭頻

龜巢老人貌不揚觸邪之性如神羊生憎巫覡煽妖妄疾視聃竺
隳綱常毫無能爲龜穴藏滄浪曲窈窕章有時擊節呼兩郎男兒
當自強

龜巢老人年紀多雞皮鶴髮背橐駝金丹自古無足信鐵硯如今
亦不磨坐待蓋棺歸薜蘿春有相巷有歌此時不樂成蹉跎殘生
有幾何

樵海歌爲秦文仲先生作

出山志云遠樵海名非誇老夫素相知高風真可嘉早年欲伐廣
寒桂增月清輝燭天地又欲會稽雲夢伐箭竹人無戰鬪遭鋒鏃
汗青六經天下讀此志適蹉跎陵谷俄變改青山樵侶集如雲一
笑飄然東入海任公舊日釣魚處樵屋相鄰蛟室住扶桑若木有

餘薪且喜路無荆棘慮水底珊瑚樹亦多尤物不堪開眼覩樵擔
弛樵斧歇濯足滄洲弄明月興來擊節和龍吟唱我海樵歌一闕
也不學負薪讀書朱買臣也不識臥薪嘗膽是何人白螺爲杯大
如斗青苔席地輒如茵有時獨酌爛醉枕柯斧睡到日高三丈猶
醺醺夢魂不到長安市長安市上多羈旅米珠薪桂莫能賒多少
伯桃寒餓死孰知海樵之樂有如此

寄溧水開福寺長老源別流

客有溧陽雲水僧相逢曾得問南能九重日月恩光近一壑煙霞
道氣增龜紐肘懸新賜印塵談語續舊傳燈別來老病時相憶欲
覓金篦刮兩瞽

悼徐孟銘

讀盡軒岐上古書幡然讀律應時需一官再調炎州幙二豎交攻
瘴海隅賴有故人收白骨歸來鄉國瘞黃壚杏林花落紛如雨何
樹哀嗚五尺孤

臘月十六日夜篝燈作兩書言不盡意夜半後敲枕對月口占言
懷命兒輩錄上耕學伯齡元修三先生南澗海萃二講主清真
一鍊師暨諸吟友

照天蠟燭徒明月縮地神仙是子虛九十一年殘臘盡二三百里
故人疏詩成唐律傾懷抱書託吳儂問起居老我形容都變改依
然貧似馬相如

任義甫生日作絕句四首以鰥居無子貧病爲憾予乃以理釋之
誠如吾言則不必怨天尤人而處之泰然矣

兄有遺孤骨肉親階庭玉樹一株春駿奔籩豆非無主傳襲箕裘
未是貧池有紅鱗堪入饌杯浮綠螿可留人高年已過磻溪老每
日懽娛莫厭頻

贈蔣居士

全家欲學老龐禪木榻蒲團夜不眠誰信室中靈照女出門先上
渡頭船

贈袁居士

羹牆欲見老瞿曇貝葉書中日夜參布鞵棕鞋門不出一盂疏食勝肥甘

正月既望予奉陪邑長貳置鄉先生之祠於學釋菜而歸兒輩謂夫故人楊澤耀過訪臨別作長短句貽之余因口占以紀鄉校中盛事并寄楊爲後會之約云

喜聞邑有絃歌宰哦松之丞更文采翕然敬我鄉先生祠諸學官儼如在區區後學尊前賢駿奔執籥忘耄年深衣幅巾拜祠下鐙月交光星滿天扶憊歸來語鄉曲此事真能厚風俗安知好客過柴門載殺問字成虛辱吾兒不識冰玉壺但言此客從前無醉墨淋漓贈佳什沂雩興與曾爲徒老夫此興亦不淺尚怯落梅風翦翦少頃一百五日來蘭皋蕙晦光風轉三山湖頭舴艋舟百花莊上逍遙遊朝陽碧樹自鳴鳳湖海詩盟尋白鷗平生頗恨少知己晚有奇逢寧不喜朱絲重繫焦尾桐請爲鍾期奏流水

水田歌歌農務也郡縣之政租賦爲急然農乃租賦之所自出可不急乎首言三山書所見也一府四縣意在其中惟當道父母官念之芻蕘有詢更當面陳其詳以備采擇

三山湖頭白水田頽岸不修年復年田家豈不憂卒歲十室九空人索然饑腸雷鳴狀如鵠春來怕聞嗚布穀願言州縣父母官喻令蚘足憐夔足古云民事不可緩桃花雨晴春正暖文移動若風有聲畚鍤如雲集不斷三農吠晦合羣力四邑溪山增喜色麟史重書大有年官無負租民足食龔黃卓魯政績成一日九遷皆上卿天子萬壽黃河清聽我老農歌太平

無錫昇佛像由暨陽而來鳴鑼鼓豎旗蓋儀從僭侈家至以禍福惑人取粟帛無算東洲任耆老沮之巫不孫被毆且以杖撻木偶幾躓而後去鄰莊有王氏者撻而逐之子聞而喜乃力病援筆書此以美任并異其義理之勇云

梁公毀淫祠真是霹靂手胡公能打鬼近代亦希有區區辨惑編

或有蒙醬瓠潦倒東家巨忽爾發哮吼老拳毆妖巫拄杖擠木偶
西鄰一丈夫怒挺擊羣醜捐袍偃旗蓋脫網兔疾走時子病中聞
病去什八九勸哉爾東家內省宜勿疚報本理所崇毋落豺獾後
一正勝百邪昔賢同不朽

題打毬圖

擊鞠流風自李唐官家占作狀元郎科場廢盡毬場在芳草淒淒
幾夕陽

清明後一日邂逅薦福寺長老源公話舊論詩意甚相得明日作

此詩代簡

貧如南阮甘投老喜得西枝近贊公白足有僧聽說法紅梅無閣
坐觀空詩成芳草斜陽外道在殘山賸水中一笑相忘今古意清
明時節舞雩風

沈德麟母哀詩

怪底吳霜三月繁一朝摧折北堂萱母儀表表真堪畫吾輩區區

豈易言斷織機中多教子分甘膝下並呼孫慈顏最有難言處獨
立蒼茫日暮門

洪武丁卯年詣烈塘祖墳祭埽恐朝暮卽世子孫不知所葬者爲
誰且追念墓松在昔爲邑里諸宰木之冠感愴寫情並圖葬穴
以示兩子及孫使識之以永其孝思

百年兩度桑田變三世十年蒿里同華表前時曾駐鶴長松何日
再蟠龍情鍾寒食蘋蘩外淚灑春暉草莽中老我客鄉歸不得空
勞杜宇喚誰儂

次韻答江陰鄭教諭見寄

揚子江南山水奇杏花壇上晝陰遲魯魚亥豕讐經史江鯨河鮪
閱歲時兩邑相望三舍地九年凡寄數篇詩恨無縮地仙人術把
酒論文醉不辭

葉道士遊仙詞

海變兮揚塵折若木兮風斤翳拗拗兮寓世仍猿鶴兮同羣冠切

雲兮霞佩雜三秀兮蕭艾從喧囂兮萬籟聊遊戲兮方外混混兮
和光忽蟬蛻兮坳堂凌虛空兮轆渺茫一瞬息兮三千霜吾不知
其果何適兮祇死守乎康莊

挽萬拙齋

曹橫山下萬家莊喬木陰陰夏亦涼法曲琵琶彈鐵撥高堂窈窕
捧瓊漿素衣忽被青蠅污赤手幾遭猛虎傷賀客未還來弔客老
夫雙淚灑淋浪

閏六月廿九日飄風動地自黎明崛起破屋拔樹眾皆驚懼至夜
方息次早余追念疇昔憮然作歌

三家村裏老詩翁獨木橋邊一釣蓬敗壘曾聞屯狗寨荒湫猶說
是龍宮勢傾東海前年雨力撼南山昨日風可笑生來誇壯膽兩
番如阮哭途窮

葛節婦

葛節婦家住崑山陽芳年二十良人亡呱呱兩兒泣蘭房一在襁

褌乳口黃塵昏破鏡無復覩孤燈相伴慰淒涼霜風自冷木自落
辟纊不知秋夜長重門深閉四壁立猿麻淚溼三年喪維時率土
皆戰場疇能訓兒知義方熊丸在篋螢在囊呼兒叉手立侍傍魯
論二十篇孝經十八章阿母授讀聲琅琅母不姑息兒能自強從
師不出鄭公鄉腹笥有書牙頰香朝夕悅親萱草堂母今年踰五
十霜菽水可歡時且康觀風使者恐未知邑有野史揚芬芳玉峯
父老來比德衛共姜我言共姜無此兩兒郎哲哉此母非尋常盍
亦作歌與史相激昂

寄清真觀提點余復初

祖饒昔年詩最好客來今雨話玄都步虛壇上三花樹讀易窗前
九節蒲恬養氣同龜息靜清修容勝鶴形癯儒林老友袁徵士曾
道區區折簡無

代簡吳中衡

一夢今年一去年兩番相見兩相憐牽蘿補屋仍徒壁賣藥修琴

又斷絃漏浦夕陽紅樹下淞江秋水白鷗邊何當載酒乘秋興來
往風流似雪船

寄題詹伯遠蘿屋

大車方檻檻小隱自寥寥門掩牽蘿屋溪懸挂樹瓢一從滄海變
屢卻小山招漏浦居相近城闔路匪遙洗心常翫易忘肉似聞韶
苔徑春風埽瓜田夏雨澆姓名編令甲蹤跡混漁樵蝌蚪藏書種
蟾蜍作研僚訓兒燈火夜飲客歲時朝清白真能守緇黃不妄交
苟焉田野樂老此聖明朝寄語青雲士巢由不見堯

雪中遣興

橫山鶴髮翁小巷龜頭舍一鑪置中央四壁塗縫罅晨粥食近午
晝戶閉如夜舉足手扶杖縮頸頭蒙帕拔木飄風靜宜麥大雪下
公家租賦畢農圃犁鋤暇沽酒黃公壚分肉陳平社有時聚親戚
談諢弄杯斝有時呼子孫舞蹈歌風雅舊竹幸平安孤松正蕭灑
一笑謝梅花騷無補亡者

贈張鍊師 名善淵

我昔諦觀韓子詩春秋書法風雅辭九流百家蘭鮑雜直筆貶褒
非無之嵩山道士姓張氏大篇春容獨稱美嘉乃丹衷獻赤墀欲
撻羌夷安晉鄙天顏咫尺千里同母氏連環來夢中忠孝並存方
寸地翩然歸袖舞春風淵今同姓復同道愛親又與同懷抱靈修
未得一品題蕭施竟混金光草嗟予學韓年近百吟骨冰清頭雪
白內交豈無黃與緇轉首多成兩塵隔淵乎淵乎識道理潮州老
僧差可擬敬留依山靈起舞煙霞喜

悼大林庵主日公四首

三光掣斷駕三車一笑今朝喜到家方外且評喧眾口淤泥藕出
白蓮花

熊耳峯頭有客歸相逢還著舊禪衣五山十刹都傳語莫遣閒雲
出岫飛

憶昔雲林訪舊遊空堂六月靜如秋焚香坐說西來意門外青山

亦點頭

一住橫山二十年山中木石盡通禪老夫載雪重來日誰折梅花送上船

輓無錫王友人

門無車馬送迎忙身混泥塗寵辱忘沈火有時持鼠布濯纓何異在滄浪九龍山下青邱舊雙鯉池中碧草香生子賢如黃叔度牛醫千載共流芳

感事二首

草暗日欲落山迴路轉賒叔敖呼不起誰擊兩頭蛇
蹊田牛奪去立仗馬令肥安得春秋筆公然決是非

邀野文允小酌

春秋連兩年喜事忽今日佳期一百五有菜二十七呼孫貰酒尊
速客聚圭華風迴落花舞雲開遠山出鷓蚌自相持雞蟲誰得失
鄉無月且評世乏春秋筆長揖謝知己永言保貞吉

題秦仲陽雨竹

湘山之陽湘水陰鷓鴣聲中雨潞潞此君一別知幾載別後桑田
變滄海客來今雨重相看歲寒風節依然在餘事不須多感慨
送徐士方之登州黃縣學教諭

世態趨炎素所憎校官應喜冷如冰絲桐聲續龜山操膏火光分
海市燈大釣六鼇將有兆高堂三鱸豈無徵寄書黃耳還家日莫
惜題詩貺剡藤

觀音柳

肉髻珠纓自在身何緣化作柳中人三眠未足風扶起似怯春寒
翠黛顰

羅漢松

余素拙詩至詠物則其拙尤甚故昨效諸公賦觀音柳俗陋可笑
今又聞羅漢松可配前題再用出醜蓋欲求刻畫無鹽變惡爲
美勿徒笑其醜云

十八羅漢十八公前身後身將無同一行九里西湖路應供誰家
去雪中

次韻答鄭玄齡見寄

青年肥遯方求志白首貧交獨念予開徑埽花童起早敲門看竹
客來疏匣藏神物蛟龍劍架插古文蝌蚪書風雨一春門不出門
前車馬自紛如

宿僧房澹泊齋

鐘鳴雨樓風滿天金猊吐盡旃檀煙誰知林下一宿覺我有石上

三生緣

懷郡城諸友

余生篤親友平居數相顧老去筋力疲此心尚如故年年二三月
晴暖入城府沂雩童冠俱所樂隨所遇安知今年春十日九風雨
甚疑媧石漏無石可修補一榻高堂氏四壁蝸篆古牀頭丹茵出
青苔灑庭戶羣芳狼藉盡來牟半紅腐我耳未全聾聽之亦良苦

賴有二三子時復共尊俎或歌竹枝詞或賦梧桐句鏗鏘迭唱和
所樂勝鐘鼓歸舟挂晴帆快若馳馬去圓天炯青銅新淥漲南浦
侯門童穉奔滄洲舞鷗鷺戢戢屋上山厯厯山上樹白石喜不爛
且無泥滓汗不見黃初平散臥羊無數尸坐對煙霞神交憶支許
何時松葉酒薜蘿德星聚瞻彼片雲內援毫抒情愫

賀太平寺講主

生公坐擁點頭石坐老來聽焦尾琴祇樹獨園春又夏雜花千界
古猶今壁無畫水傳奇跡塔有風鈴作妙音安得刮除雙眼膜時
陪杖錫一登臨

感興

四月初九自城中抵家得
前四句後旬日足成之

兩目眇昏耳又聾僅存方寸古秦銅忘機自得親漚侶含弩從教
伏射工百越溪山詩枕上四時風月酒杯中惜春無奈春狼藉頻
遣蒼頭埽落紅

端午日懷古

五月五日追前賢九歌九章鳴素絃蛟人應泣魚腹葬龍伯合贈
龜毛氈招魂感舊痛梁壤反騷美新圖瓦全楚天盡處臥遊去艤
舟酌月羅江邊

西塘詩爲郭尋倫作

具區北東三十里家住西塘水之涘滄洲不浣輒紅塵一鏡波光
照窗几西塘本無風物奇有功於民民稱之旱田霑溉數百頃苗
無槁死年無飢非湫非壑非瀚渤不爲蛟螭作窠窟輕舟往來快
如馬撥棹人如執鞭卒東鄰西舍雜漁樵朝出暮歸歌且謠白紅
荷葉紫菱芡萑苻蘋蓼蒲蘆芡高齋讀書歲年久鍼經一編常在
手客來問疾或問奇拄杖挂錢船載酒人生有此林塘幽不妨未
老先菟裘地因人勝從此始千古萬古芳名流

端午後雨阻過詹氏蘿屋卽事賦絕句二首代簡

風打船頭輓不前船回雨點大如拳請看六日蟾無用且得爬沙
手腳全

瀕溪數家風景幽溪流過門東轉頭黃梅雨少麥大熟買布輸官
可不憂

人面獸懲元惡也惡不可縱天不可欺故作二詩以懲之

人面獸長七尺人衣冠人飲食面有七竅皆人形猛獸之人心莫
測生來害物固不少羣居猶自藏牙爪一朝忽欲咬殺人豹麕熊
文皆驚倒

又

人面獸聽吾語一人受害一家苦爺娘妻子令失所殘忍胡爲至
如許人言汝性多陰毒中汝毒者悅汝目快汝腹汝心方饜足嗚
呼馮婦或再生獸乎獸乎勿橫行恢恢天網布八紘莫道網疏可
漏天聾盲

追悼諸葛用中

諱端幼年能寫大字既習舉
子業學琴袁子方先生之門

揚子江南疇曩日呂蒙城裏一文星科場早試程朱易玄學旁參
道德經愚與通家心甚赤賢能知己眼常青草生若帶人皆喜竹

作詩筒使不停著處溪山朝載酒有時雪月夜揚舡卜鄰晚欲從
王翰分席尤加敬管寧一旦谷陵驚變改十年兵火苦飄零扣門
幾語風敲竹泛宅長如雨打萍天上玉樓俄有召月宮娥藥竟無
靈細君冠佩全貞節先世箕裘祝靈馨名溢東吳滄海國魂歸北
固白雲屏兩家相去百餘里一老今踰九十齡聯句每懷吟石鼎
聽琴頻夢坐分亭柱題應有能言鶴擬蹋秋風去一聽

寄鄧秉文二首

曹橫山下聲叟呂蒙城中放翁何夕舉杯邀月中秋鼓柁乘風
鐵柱碑硯二老璿霄沆瀣三更絕口不談時事掀髯聊敘平生

寄陳彰遠明遠兄弟

金牛臺下帶經鉏長鋏無聲食有魚兄弟五人雙壁在箕裘三世
一廛居中秋明月最端正長夜浮雲或卷舒覓得筋梯上天去同
將物理問何如

寄辛至善

青年卽著遠遊鞭白首仍居小市廛寂寞蓬蒿三徑在辛勤父子
一經傳奔牛堰下水到海射虎亭西山插天我欲抱琴尋戴去中

秋相近月將圓

寄清微觀周石泉

塵揚滄海廿餘齡真館翬飛壓慶亭風埽劫灰南土樂天開圖書
北山青丹砂九轉龍蟠鼎玉漏三更鶴聽經諸葛仙翁呼不起正
須金石播遺馨

三笑圖

簡寂先生五柳翁襟期適與遠師同過橋相送忘相別千古風流
一笑中

風雲雷雨畫四首

芸芸萬物生蘧廬盎盎元氣橐籥吁偃禾拔木未有會請君細讀
金滕書

漠漠閑雲淡淡容不爲蒼狗未從龍直須霖雨功成後依舊還山

伴赤松

金電光中霹靂飛殘臣膽落震驚時雲收雨散青天出能聽無聲有阿誰

誰挽銀河沃太空恩沾赤地洗熾熾陰陽變理天家喜都在丹青筆意中

野雲歌爲王元一羽士作

山中之雲斂蹤跡空谷深藏伴泉石從龍之雲雷電俱四方行雨勞馳驅飄然一片雲在野看來最是悠悠者或舒或卷無朝夕南北東西隨所適道人含笑松下坐我卽是雲雲卽我

買臣讀書圖

噫子會稽守素行何卓絕采樵工或餘誦讀聲不輟青柴擔頭春赤腳林下雪富貴知有時妻子從改節高風一如此後世誰可埒吾將訪遺蹤更得探禹穴

薦福寺紅梅詩并序

紅梅閣事見毗陵志等書庚溪詩話載程致道詩有春風日浩蕩醉色回冰肌之句元末兵燬今本山釋源公竺淵恢復舊刹重植茲花丐子詩記之

紅梅閣下梅花樹陵谷變時風拔去堯峰老禪歸故山覓得孤根栽舊處年年春到花時節一株玉出臙脂雪春風笑面歲寒心光塵混融風韻別老禪道服忘妍醜品題假我扶犁手黃州定慧海棠花可與齊名傳不朽月香水影象王宮雜花世界將無同幾度拈花有人笑吾將請問瞿曇翁

源竺淵以道西傳等和子詩亦蒙見贈且云臨字等韻難和子因復次韻酬之

支許論交世所欽昌黎亦聽穎師琴深山大澤多遺逸明月清風無古今閣下梅花桃杏色庭前柏樹海潮音寫容代有丹青筆電目誰能一照青

獨孤公檜詩

唐獨孤憲公爲常州刺史時有手植之檜今見諸郡志等書元末
樹毀於兵至此二十餘年爲州民者宜再植以寓思賢之意況
有周鍊師爲松菊主者乎率爾口占呈乞諸縉紳先生更倡迭
和相與贊成亦庶乎厚風俗云

憶年十五六好古尊前賢初聞獨孤檜快覩曾爭先蒼然一株枿
舊根皴皮錯節枝葉蕃適逢夜雨半身溼疑是往年甘露痕孔明
廟前柏相似乃在陳司徒廟之後園嚮來陵谷忽變改化作劫灰
飛入海神焦鬼爛救不得桐鄉自此無光彩幸存一曲闌干石題
公姓氏畱遺跡石苔爛斑土花碧相伴銅鈿臥荆棘予從海上避
兵歸幾度摩挲長太息懷哉古之人好賢意無窮詠甘棠愛召伯
賦棗竹美武公憲公此樹堪比隆後人寧不仰高風玄都道士桃
千樹一檜區區豈難措龍鍾野老及羣英亦愧因循坐遲暮檜乎
檜乎重培植風枝相樛霜幹直邦人具瞻仰遺德見樹猶如見顏
色六百二十五年如一日

題牽牛圖

爲丁學古作

不放桃林不飲河牧童牽去意如何南山石爛今非昔甯戚無勞
扣角歌

題鷺鷥便面

爲丁學古作

潦倒滄洲客蕭條白鷺詩牧之呼不起此意少人知
出門

老去多懷舊興來時坐馳出門窮鬼笑罄室少人知野飯新菰米
詩囊古竹枝諸孫溪上別矻矻問歸期

題僧房澹泊軒

我愛澹泊軒山居城市中雲分半閒許雨潤四壁同風林金石聲
道人冰雪容澹然味無味泊然空不空露坐點頭石雪立摩頂松
吾徒幸相與吾道喜不窮一笑兩忘言落花舞回風

江山漁樂圖

數口妻兒網一張船爲家舍水爲鄉江南江北山如畫欸乃聲中

送夕陽

崑山王有恆以書附常州天寧寺長老寶公問予近況作詩答之
并索諸友賦重植獨孤檜詩

客從笠澤來常郡書到橫山問老夫哭子哭孫家已破賣書賣劍
酒還沽千墩每入龜巢夢十月應開獸炭鑪支許舊遊煩寄語肯
題唐檜和巴歛

黃林屋許贈阜布巾不至戲作此索之

霜倒蓮葉巢老龜寒縮首欲裹緇布巾并籠瓦盆酒此酒今已熟
此巾曾製否抱膝梁父吟炙背坐南牖老況知音誰橫林隱居叟
贈天寧寶滄海

臨濟雲仍幾代孫猊牀說法象龍奔庭前銀杏西來意陌上銅駝
東郭門四海共沾新雨露一舟能泝古淵源畱衣人遠衣何在別
有伽黎遺後昆

悼城西周彥美二首

七十六年事梨花夢裏春家傳三代禮身作兩朝人負郭田園樂
連雲第宅新

麒麟

三槐堂上客

最青春吐酒常憐我弈碁多勝人

竟作白頭新醜酒橋玄墓潸然爲泣麟

龜巢稟卷七

龜巢稟卷八

詩

寄饒州鄱陽縣唐生

千七百里鄱陽縣外孫書來如見面九十三歲龜巢翁中宵夢得
重縫綾詩瓢山人來上游吾將結社招馴鷗延陵昔日繼三讓野
水何處無孤舟貧家幸爾年穀熟買書教兒耕且讀梅花無恙竹
平安歲晚無勞念窮谷

和舒文允見貽

冬至經旬久朋來喜踐長市沽雙木榼踞坐一藜牀小酌成歡洽
閑愁付杳茫山無白石爛谷有紫芝香澹泊聊相與辛酸已備嘗
盡消湖海氣莫放斗牛光所貴心能直何慚貌不揚聽冰狐自惑
吠雪犬何狂歲晚鷗盟在生平蟻夢忘酒堪澆磊塊袖莫舞郎當
西崦黃茅嶺東洲白水鄉漁樵同此樂吹笛送斜陽

夏五訪一舟禪師臨別立銀杏陰中謂予曰山中舊物什喪八九

惟此木幸無恙也宜蒙品題爲天監勝概使居山者亦預有餘
光余謝不敏然心嘗許之故茲口占以頌人物具并之美
一箇虛舟渾不繫千鈞重負力能任金園地湧靈光殿銀杏天生
雙樹林佛印衲裙坡老帶昌黎詩句穎師琴禪林勝事無今古況
爾庭前好綠陰

輓曹子毅大使三首

早歲輕肥試采榮一官三載繫塵纓解龜便作幽棲計瓜圃東門
學邵平

桂子初生折輓枝青氎舊物遂陵夷竹林小阮親調餽何異慈烏
返哺兒

生來不鑿混沌竅此去竟作逍遙遊回頭一笑看鷓蚌未到金鶯
誰肯休

洞庭胡敬之以予父執之友歲饋新橘凡十有餘年感無以報是
用作歌

湖山清氣鍾而翁生兒亦有古人風年年送橘拜牀下甚愧我非
龐德公今年霜落洞庭早橘熟先於封田稻青衣童子黃金丸樹
頭摘來霜未乾儂家食指百三十分甘喜得皆波及嬌癡堪笑兩
曾孫手弄金丸口欲吞阿翁老饕三嚥畢教孫食之還自喫一枚
一枚復一枚翁有笑聲孫亦哈枯腸久似長卿渴甘露適從仙掌
來楚江萍實不可得華峰藕亦無人識冷比雪霜甘比蜜此句真
堪題此橘韓子之詩今代無借作報章揮我筆懷哉故人家洞庭
七十二峰環翠屏洛陽秋風塵滿城莫能汙爾雙鞋青南山不爛
黃河清正須坐閱三千齡山中舊識諸耆英煩道老夫多寄聲
紅梅

前代支郎亦異哉白雲堆裏植紅梅樹經劫火多番換花向春風
二月開鄰舍杏桃渾赭色禪林草木絕纖埃一時想像題詩去別
日尋芳載酒來
歲旦言情二首

去年元日兩眉攢懷抱今朝頗覺寬一夜雨聲曾不絕五更天氣只微寒

曾孫杯捧屠蘇酒豕婦廚供粬粒盤最喜催租人不到田家雞犬得平安

寄盧長嬰次農

我思東吳諸故人二難青年才出羣爛爛眼如巖下電英英氣作山中雲一經旨趣熟儀禮六書偏旁宗說文無由縮地卽相見晉鄙亦得沾餘薰

寄辛彬甫

五鳳添修助益箋雙魚書尺竟虛傳桃符忽爾三年換木榻如今兩膝穿南國鶯花春甚早東洲雞黍約如前好來同賞元宵月莫返山陰訪戴船

和毛伯尚雪中登塔

一夜雪深三尺許江南江北久無之躋攀雁塔最高處想像洪荒

未判時光動山林搖玉樹氣涵湖海湛瑤池僧房或擬天花雨田舍皆占隴麥宜黃竹無歌良可喜清河有頌不妨遲八千里外多遭貶十二樓中欲訪誰白戰正須逢敵手長吟聊復解人頤憑欄細聽風鈴語似亦知音說好詩

壽諸葛節婦

憶昔梁鴻歌五噫挈家避兵東海涯玉樓有夢上天去孟光無復案齊眉旌旗滿眼愁滿腹抱兒日夜吞聲哭沙湖岸竹似湘江淚痕斑盡猗猗策呼天顛地吐丹衷柏舟之誓共姜同桑田變海得歸路慶亭故園榛棘中教兒服勤能構穫青氈舊物兒堪託星冠霞佩蕊珠經萱草堂前樂吾樂春秋六十有八年時人喚作女中仙麻姑送酒作生日雙成獻桃紅且鮮高堂長夜照明月何異常娥廣寒闕不勞白兔擣玄霜真修自有長生訣仙家歲月我不知我來爲作節婦詩他年烈婦傳中寫千古萬古芳名垂

子前謂獨孤公檜在陳廟蓋圖經所載及余親身見之一日郡人

徐孟曾問曰唐刺史爲一州之主手植之檜宜擇公廨美地表
而出之眾所共瞻何置諸陳廟之後耶予曰按唐書德宗朝徙
公爲是州刺史去梁公毀江南淫祠之日未久無陳廟也唐衰
禮廢淫祠浸興迨五季而禮法大壞叢祠之神類加尊號陳廟
或肇於唐末而盛於斯時今荒園廢沼安知非昔日驛亭傳舍
樵夫其意不以此木爲不幸而反以爲幸也可勝歎哉孟曾然
子言遂植檜舊所子恐前詩爲人口實因復作是詩
獨孤之檜化烏有庶士重栽倚碧潯遺德一州人眷眷流芳千載
樹陰陰霜根蟠入龍蛇窟風葉響成鸞鳳吟願若甘棠無翦伐報
公疇昔愛民心

寄聰上人嘗託補楞伽經脫簡就用索之

杖杜之歌落九天石尤風轉送歸船長洲茂苑渾無恙翠竹黃花
總是禪眼孔不教迷土苴耳根常得洗風泉貝多葉上楞伽語脫

落應能爲補全

題顧師道樓居晴空圖

山屏顏雪爛斑飛樓縹緲倚層巔水晶榭題白玉闌樓居之人應
列仙金鳥出海飛天上藍田瑤草煖生煙誰家馬上郎意態清且
閑旣非謫官遇雪阻藍關又非春風得意游長安摩挲老眼仔細
看乃在櫟里先生圖畫間

碧桃贈呂城壩官應孟恭

猗猗谷中蘭鬱鬱澗底松我愛之二物幽尋處亭東路逢碧桃花
澹然無冶容吾知所笑者羣芳鬪青紅本來天上種有此林下風
老況

哭子三年孫兩年一孫戎服又西川秋風茅卷藏書屋春雨苔荒
負郭田堪笑平居能蠖落誰知末路竟屯遄空林樹折鳥巢毀奈
爾孤雛失所天

雨中期辛彬甫不至兼憶兒子林孫塏等一時口占二絕句

雪尋戴逵興不遠雨過蘇端意甚濃若使兩賢生並世浣花溪上
我遊從
一雨能生五月寒三杯欲釋兩眉攢那知酒入愁腸去化作潸然
淚不乾

謝饒州周氏甥孫女惠鞋

并序

昔領軍一屋之鞋未聞有惠人者今唐伯亨室人製雙鞋遺我
於一千八百里之外其親愛之心可謂篤矣然則苟非伯亨之
真其室中之人安能遂其心哉區區報章豈忘所自故首其說
如此詩曰

濯足洮湖寂寞濱寄來雙履藕絲新何當化作飛鳧去謝汝殷勤
念老親

贈盧長嬰次農

憶昔盧兗州生有古人風病世禮俗壞或與禽犢同遺經授子姪
世業令專攻騎箕去不返象賢躡孤蹤平居送師友砥礪相磨礪

東海雙南金豐城兩神龍含光若暗投天將振儒宗叔孫自縣最
制作成治功潛心對黃卷儼然見周公妙理析秋毫百世開羣蒙
追攀大小戴旁參鄭司農復看書帶草市地生婁東顯親垂令名
永言報而翁

寄南宗僧綱

太空寥寥雲自浮驕陽熻熻金欲流白生一室靜如水清坐六月
涼於秋陽羨好茶畱客共獨孤名檜賦詩不官樣文章祖蒲室正
須述作贊皇猷

寄一舟禪師

蔥蔥雙樹林井井百丈規欽欽響鐘鼓棣棣慎威儀空庭苾芻草
淨瓶楊柳枝滿眼皆祖意此身丁盛時熱客不相過清風堪自怡
或翦葛藤話竟織駢驪詞陵谷變未久山水知音希我本六日蟾
眎同五總龜儒墨各有趨支許交忘機眷言獨孤檜曾覓一二詩
禪縛想自急詩筒來乃遲南風非不競北山何用移請拈木毬子

聊作逢場嬉

寄講主法師西傳

懷哉久別廬山遠奈此相望去路賒
屢夢丹梯同上塔每畱清話
竟忘家芭蕉手種繙經葉
菡萏池開結社花三伏不嫌人
褊穢一肩偏袒佛袈裟
竺書自早探三藏細帙如今載
五車方寸靜涵滄海月文章光
炫赤城霞尚憐老馬能知道更
喜神羊解觸邪早晚蓉湖秋水
碧定期濯足過漚沙

懷詹伯遠

蝌蚪殘書補未全齋居一榻坐來穿
稻花遶屋白如雪溪水出湖
青接天冠蓋不來騎馬客
漚鳧長傍釣魚船多時欲問
平安信伏日題詩寄竹邊

寄贈岳陳齋二首

一書曾寄訪行窩百里相望阻
瀾波陽羨溪山無恙否延陵
風俗變來多鴝鷖夜集連雲
廈荆棘叢生駐馬坡尊酒欲
懷千古意中

秋蘿屋候經過

南山爛石無多在東海颺塵又
甘霜奇字盛傳揚子學德門
誰表鄭公鄉秋高丹桂花纔
發閨後黃楊樹必長會有龍
蛇生大澤流芳竹帛繼先王

寄薦福寺源竺淵

青門薦福東堂老白首默誦
西方經有時適興倚梅閣無
復談禪坐柏庭解夏欲隨雲
水散立秋忍聞風葉零老禪
心性一如此說頂會有伽耶
鈴

寄贈呂城羽士周石泉

仙風飄飄天骨奇不皤爾髮
黃爾眉兩沈海上鐵船渡九
折道傍金狄知松花釀酒常
畱客竹籜裁冠自賦詩不解
腰纏要騎鶴道人應笑俗兒
癡

索居無聊自七月既望至中秋前九日腹
稟得小詩十首不追琢不銓次大率皆眼前
事無遠興也然胸中芥蒂有消釋未盡者

或見於詞可笑
我愛青山爽氣增
青山似我骨稜稜
半年不蹋山前路也學禪居
結夏僧

一昨病暍思清秋
秋來兩旬熱未休
堪笑荒唐野人語
天公不遣

火西流

詩腸頗饜木雞肥
老齒方便豆粥稀
今雨客來如舊雨
多情獨有兩烏衣

蚊蠅屏跡去何遲
烏兔循環度不移
一雨夜來涼可喜
家家水滿

養魚池

十里山開翡翠屏
三家村裏老人星
無塵竹徑風還掃
徒壁茅齋夜不扃

魚自浮沈水自流
釣船閑繫小溪頭
朝來賴有杯中物
忘卻連年

日夜憂

阿翁眠食龜頭舍
兒子耕耘犢鼻褌
記得孝經刊誤本
尚能口授

教曾孫

牀頭鬪蟻取人憎
壁上黏烏蝸失懲
螢火光殘小兒手
誰憐堪作照書燈

涼風騷騷草木黃
初月皎皎更漏長
洛陽有夢忽驚覺
鶴唳聲中人斷腸

稻花雨外紛如雪
桂子風高香滿天
誰信一雙多病眼
餘生重見太平年

暨陽沈德鄰氏徙居郡城名燕處之室曰咬菜根處昭其儉也龜巢老人謝子蘭謂之曰夫人以儉德立身惟窮達不變者君子韙之拙詩效顰亦曰備薑桂之用云

士方窮居舍糗茹草誰無菜根知味者少
睠茲小物大道可擬淡而不厭斯為君子
鮭菜自珍龍根自奇我菜之根朝斯夕斯若決濡肉或如齧骨左車有聲宮商彷彿賢相脫粟聖相齧匏顧予何人口腹敢饗吾愛吾廬蔬畦遠屋盤有餘滄鼎無覆餗窮達百年

始終一趣明月清風咬菜根處

輓管伯齡二首

先生多才德與俱崑山之玉滄海珠玉華忽作白雲散珠光竟隨清夜徂青青書帶巾里閉纍纍筆冢成荒蕪雞林客來歎且泣欲覓好詩還有無

憶昔狼煙兩袖黃斷蓬飄泊鄭公鄉金龜換酒邀明月玉塵論詩說盛唐百年往事陵谷變通家交情江海長騎箕先著祖鞭去且夕吾將與頌頌

陳存心先生挽辭

代黃仲器作

蒲石軒中山澤曜出門戎馬卽長驅欲騎東海金鼇去竟作西風玉樹枯化鶴還家人想像義烏銜土子號呼恨無老杜揮椽筆寫入哀詩比畫圖

鶴鶉圖

不作巢居與穴居鳶飛魚躍不相於平坡淺草幽閒處宿食飛鳴

得自如

題清微觀并小引

蘭嘗考慶亭乃孫仲謀射虎之地今爲呂城橋名密邇清微是爲清微勝概也不揣言耄表而出之并爲燕廈之賀云

阿蒙之城何代傾玄元闕宮無與京英雄射虎陳跡在咫尺奔牛古堰橫鯉魚飛去石盡爛桃花種來蹊自成華陽福地一如此何用山中宰相名

懷袁耕學諸故人六首

夢裏忘子兩目盲馬鞍山下訪羣英詩容總似山容瘦道氣多如海氣清皎皎白駒方屏跡嚶嚶黃鳥未忘情呼兒早起題書尺十日新年雪乍晴右寄耕學

一昨吳淞十二詩清真道士獨委蛇梨花春釀適來熟頻遣青衣送酒資右寄清真觀道士俞

鋤斧單提不暫停黃花翠竹總忘形問渠送米盧全意也愛茶歌

有可聽

右寄延福庵主

雲峰毳子逢場戲一笑春風舞袖歸從此晏然門不出忍看沙界有危機

右寄僧綱長老

崑山絕頂立浮屠海闊天高氣勢孤莫道八風吹不動八風吹動有人扶

右寄勝上人

玉峰巨邑冠東吳在處金園似給孤手把竺書朝夜讀此心能轉法華無

右寄僧善性空

送郁友文之京

揚子江頭春二月送客登舟赴天關男兒生有四方志莫作尋常黯然別憶昔孺子歌滄浪尼山聖人曾激揚我賡再歌呼索郎子其洗心宜勿忘

次韻奉答瓢齋先生見寄二首

齋居一榻坐來穿腹笥羣經老欲眠夢裏亦行端正路醉中常造渾涵天春光荏苒無多日天氣濛濛近禁煙舊雨不來今有約虹

光遙望載書船

子家經亂離蕭條無六親遙憐竹林阮中有白眉人高詞吐白雪逸氣凌青雲榭榭豫章下灌木無足云安知射工弩中厥父子身問疾數往返先生同五倫奈何日夜下覆盆茹艱辛惟天降炎霜清飆灑冠巾一朝禍根拔戢穀乃薦臻孤鶴還九皋飄然離雞羣吾將問玄機載酒過子雲

僧綱贊公和尚以疾得告而歸善權舊隱橫山老樵謝子蘭效劉賓客竹枝二首為臨別贈

維摩牀上遣文移治績垂成竟解龜僧史有如班馬筆絕勝州里去思碑

瀟浦飛花送客行善權耆舊出山迎問渠那得真消息摩頂松枝喜鵲聲

過無錫醫士徐士廉別墅

棲神山在屋西頭寶有寒泉帶錫流山近杏林煙樹接泉香茶鼎

雪花浮蜚英早歲肱三折樂道清時號四休堪笑興來忘潦倒尚
能攜酒過滄洲

寄楊彥澤

逢人屢問平安信有子亦如郎罷賢萬石矇矓輸賦足九重閭闔
奏名先未論烏鳥能含哺且喜黃楊閱閨年我昔與談忠孝事阿
戎詞色兩忻然

次韻送秦文仲歸海上

溧水先生挽不畱故山回首鬱相繆落花飛送九年客行李歸來
一葉舟勳業鏡中成白首耆英會上冠清流獨憐詩社今寥落無
復尋盟集舊鷗

送秦文仲教諭歸老崑山

盛代垂新統斯文續斷絃青山溧陽縣白首廣文氈唾視鉛刀鈍
心持鐵硯堅蓬麻扶盡直茅茹拔相連頒印恩殊重明倫教欲專
諸生皆鼓篋三物屢興賢美績經三考英聲徹九天晚成真大器

幽谷擬頻遷

命以菟裘老榮於晝錦還黃河清有日白石爛多年齒德身兼備
文章世自傳本來天下士且作地行仙鷗社詩盟在鱸魚斫鱸鮮
寄聲袁處士雙璧喜俱全

次韻寄薦福寺東堂長老三首

坐斷根塵知幾年逢人猶說未生前有時觸背都忘卻笑指扶桑
尺五天

家山不見舊忘年重植紅梅慰目前樓閣大開彈指頃香風應到
率陀天

莫笑黃楊厄閨年枝枝葉葉不如前姓名畱在香山社也愛吟詩
似樂天

橫山白龍祠

神母何年生白龍曹橫一墓遶龍宮蜿蜒靈物塑如在寂寞古井
清若空山川每見出雲氣鄉里競得行雨功府縣官曹走籩豆質

我識字田家翁

簡沈時敏二首

往予入城府筇枝扶踣蹠故舊驚骨立兒童嗤貌寢時子適見蔑
爲我言責沈心持一寸鐵詞吐五色錦所喜得三益豈料別數稔
嗣音竟茫然屏跡疑遠甚近從支遁遊因聞許詢吟家住洛陽橋
窗含瀉湖浸煙波隔紅塵雲樹幕清蔭安得忘年交時能邀月飲
文章論大雅酣適就高枕人生貴佚樂此樂真絕品

一昨觀李杜詞場車並馳追蹤三百篇齊名盛唐時杜詩多與李
李與杜者希當時豈偶然意或有隱微復觀杜憶李首陳褒美辭
其閒方庾鮑微意若少之樽酒欲細論諒非談笑嬉迄今千載下
疇能發玄機區區蠡測海敢告新相知秋高金氣清桂子香風吹
虹光書畫船雞黍或可期合歡杯勺閒評此兩白眉況有古經史
相傳更多疑朝聞夕長逝九京含笑歸

憂夏旱吟

吾聞東海殺一孝婦三年乾天人感通非浪言又聞長平坑卒四
十萬天胡爲兮竟舍旃古人讀書貴窮理此理未明堪汗顏竭來
一旱月再圓老農多憂良可憐青苗蟲生食欲盡赤地龜坼生炎
煙龍祠巫祝環玃擲羽士醮壇鐘磬喧妻孥踣車或抱餒牛犢賣
米供社錢盲翁夜來亦不眠追思直從三代前堯湯水旱皆數年
必能有以扶顛連當今聖明君咫尺九重天有能爲鳴玉陛前天
恩不日瀾九川一夫罔令溝壑填耕田鑿井仍熙然
示豕子及孫

曹橫山下小菟裘某水某邱堪釣遊四世團圞非易得一窩安樂
比前修家庭惡有司晨牝江海憐無結社鷗我子我孫宜克念莫
將肝膽作仇讎

又自述同示

搢搢劬書覲有成區區沒世恥無聞七情欲斷氣未斷兩目欲盲
心不盲白練製裙蠅點汗青鏡照榻鼠縱橫家聲埽地綱常在未

許兒曹學倒行

祭禰忌日詩

投老龍鍾日思親長養時羣咻憎陋俗四遠擇名師夢有生花筆
才非脫穎錐庭闈歸定省翰墨作遊嬉鄰舍三元日桃符七字詩
柏臺驄馬過茅拔鶚書馳氣色生逢掖光華照屢屨亨衢雖不到
大道頗能知黷舍分甌坐儒冠廩稍糜中年逢世變濱海避時危
骨肉能相保肝腸固有私尚蒙先子澤不受外人欺栗里歸來廢
龍山下築遲頽然窮谷叟援乃落巢兒子愛非姑息孫謀有厥貽
牝雞良可惡烏養本相宜昔怨何三失今逢此百罹雙親應念我
鑒此蓼莪悲

雲林書舍

爲徐孟容作

東家領軍鞋一屋西家買妓傾珠玉寂寞南州高士孫燈火小窗
書夜讀羲皇畫卦龍負圖科斗此時無簡牘神農本草軒岐語爲
是傳家先爛熟唐虞三代二千載六經聖賢常在目牙籤插架日

益多蔗境漸佳心未足便便腹笥貯琅玕齒頰霏霏吐珠玉鍾期
骨冷呼不醒誰復賞音聽此曲青林不著輭紅塵祇許白雲簷下
宿雲乎雲乎知不知封胡羯來森如竹白眉之良眾所稱能繩祖
武棲幽谷清河有頌泰階平應著先鞭駕黃鵠

賀潤天澤住持保寧寺

橫林之東橫山西孤村流水古招提青苔一徑童不掃白雲半閒
人共棲松枝甘露落塵尾桂子香風吹麝臍我來欲問點頭石道
價孰與生公齊

南宗僧綱和尚唐允明吟友倡和見贈

支許久不作緇林景清德適見雙南金裒嘉豈容默新詩倡且和
字字皆惻惻挹此沆瀣秋注茲雲夢臆大道本平平中庭宜殖殖
九品蓮華臺毋容論西域

豆腐詩

并序

凡人年老者以肉食養之古今一致然老而無齒則肉林之盛禁

鬻之供其如朵頤何求其甘輒若豆腐者真可謂養老之善物也但名不著乎六籍品不列於八珍鐘鼎之家咸藐視之予過僧房學舍連得食其佳者歎賞不足發於詠歌是猶爲冰壺先生立傳也博物君子宜蒙品題吾言固無足取重於人庶不爲嚇腐鼠於鴛鴦者耳

誰授淮南玉食方南山種玉選青黃工夫磨轉天機熟渣滓囊傾雪汁香輒比牛酥便老齒甜於蜂蜜潤枯腸當年柱史如知味飲乳何須窈窕娘

唐允明以吾孫垣自成都府巖州衛公差過常鎮等府因得觀省賦詩見貽有情兼悲喜之句可爲知我者矣次韻示垣并謝允明

數千里外公家事七八月閒行李歸搖尾門迎一黃耳傷心客散兩烏衣穿楊自可成勳業擢桂從他赴禮闈多謝故人能警策好鑄肝膽莫相違

袁耕學先生以陶詩集句十五首見示心賞不足以辭答之

先生山澤癯遊戲詞翰中生來愛陶詩白首情所鍾集句成大章一氣春混融纍纍九曲珠蠅絲貫其中嗟予目無見擊節歌玲瓏竊比蔡中郎以聲識焦桐卽物因有感懷賢仰高風孤竹首陽餓五柳柴桑窮窮非餓死比方寸將無同史稱晉徵士直哉考亭翁風俗今變改草木亦豈從黃花朱紫貴青松大夫封邪蒿市地生指佞草絕蹤何當過橫山班荆坐孤峰先生口懸河洗我芥蒂胸風帆早乘興我耳猶未聾

弔薦福竺淵源公

滄海塵生罷遠遊紅梅手植繼前修雲開樓閣人彈指風振簷鈴我掉頭十萬里程天竺國一乘車駕雪山牛客來舊日喫茶處煙冷薰鑪憶趙州

寄南京僧綱并寄唐允明二首

雪竹霜葩歲晚時袈裟逢掖往來嬉著書應笑龜巢老刻畫無鹽

醜不知

詩滿簞瓢酒滿船時人喚作地行仙抽絲適有冰蠶繭好為焦桐續斷絃

東洲觀音堂贊瓦歌

七佛之師觀世音十方化身無古今補陀金刹南海現無價寶珠龍女獻東洲築堂五六春茅茨乃作有漏因珠冠白衣漬泥潦龍王女兒應笑倒豈無坊者善安排不堪空打赤白崖鴛鴦瓦合數千百通圓大士若安宅眾毛集來成一裘震風凌雨更無憂青銅錢與珍珠粟今生布施來生福

松竹梅三詠

歲寒松柏冠山林論語垂名照古今韋偃畢宏俱即世傳神賴有草堂吟

淇策猗猗比武公清風本與首陽同六經湮滅秦坑後嘉爾雲仍紀載功

吳王醉處十餘里僅得晚唐人一詩不遇西湖林處士暗香疏影有誰知

寄習訥二講主

南山北山兩浮圖東家西家皆給孤塵世換來風景別上堂鐘鼓似前無

寄辛彬甫

長短句分三四聯聖賢經訓數千年吾伊聲裏工夫熟萬象森羅月滿天

寄性空山主

住菴家法似南泉鋤斧單提十五年歲晚閉門渾不出忍看霜倒佛池蓮

寄呂克明二首

生不封侯向酒泉筆耕東郭太平年鄰居適與僧廬近也為招賢種白蓮

客來曾得問林泉書帶青青倍昔年且喜時人多未識楚江萍實
華峰蓮

次韻自述二首

兩目塵昏淚迸泉春秋虛度伏生年滄江歲晚龜藏穴依舊巢居
一葉蓮

雪水煎茶勝惠泉茶經重著兩三年夜來明月梅花下又擬濂溪
說愛蓮

感懷

生來迂闊從人笑老去盲聾祇自憐紅杏殿春能幾日黃楊厄閏
又三年簷風卷我蚺蟻幔夜月窺人蠅蝨甌江夏黃童能扇枕當
時太史豈虛傳

敘譜

東謝莊西謝莊奔牛東北十里強先人痛惜家譜亡能言其略忘
其詳高曾本住開封府紹興之先亂離苦隨龍渡江寓茲土以謝

名莊似韋杜後來一派分烈塘華屋高邱乃吾祖季父咸淳中甲
科封胡羯末皆簪組宋曆已矣元曆新竟作遺珠沈合浦我祖佳
城宰木拱家庭玉樹遭斤斧我祖我伯我父兄青冢纍纍續遷祔
轉頭滄海又颺塵十年逃難歸洪武昏鴉滿樹雀無枝結巢乃在
橫山陽三子六孫中子殂長孫又隕黔陽簿黃茅嶺畔作哀邱昭
穆按圖無牴牾年年寒食春草長橫山烈塘連謝莊一盂麥飯一
壺酒老淚觸處皆淋浪於乎豺獾猶能效烝嘗何況人爲物靈知
義方我今諄諄語兩郎子子孫孫宜勿忘

冬至前一日寫懷二首

龍鍾去年冬修書辨魚魯吾兒念吾衰勸吾勿自苦吾嘗責吾兒
曾讀孝經否聖人教斯民揚名顯父母窮達固有命劬勞何敢負
芟夷免園冊於道或小補方誦蓼莪篇安知又初度存順沒吾寧
全歸冀朝暮

今年盲且聾狀若霜木槁齒牙脫兩齶涕淚出四竅獨存方寸鐵

自謂無價寶異端屢排斥淫祠絕祈禱喋喋非好辨倦倦衛吾道
一陽葭欲飛九土荔將出家人忽起早爲我作生日沽酒斗八升
有菜二十七北風非不寒南簷益如春都排眼前事且漉頭上巾
巢居烏返哺拄杖鳩祝噓橫山薺瓊冰東洲釣船月窮鬼莫見笑
老夫甚爲悅寄語撲燈蛾少頃燈自滅

寄朱季明

客來曾說問詩癯西郭梅花玉一株朝日尋常照苜蓿春風次第
到屠蘇通潮港淺潮田熟捍海城高海寇無珍重歲寒門不出催
租吏卒競喧呼

寄題讀易齋

爲辛彬甫作

讀盡諸家卜筮書義經日夜卷還舒數椽茅屋婁江上一樹梅花
臘月初童子研朱頻露滴客來買卦或潛虛珠璣咳唾琅玕腹何
患家無擔石儲

王達善母挽詞

阿母穆穆林下風生兒彷彿晉阿戎起家讀書眼如電闕闕衣冠
俱一變三從無違四德全月且有評無閒然萱花堂上安且吉分
甘抱孫長在膝風含夏葛并刀翦雪護寒筍充廚饌兒能苦學夜
不眠不勞母作熊膽丸客來治具兒不乏毋勞母翦青絲髮升堂
拜母環佩鏘慈顏怡愉春滿堂希年厚福有如此千萬中人能有
幾兵餘重見太平時蓋棺應喜得全歸諄諄有命提兒耳不以浮
屠廢喪禮素車白馬紛如雪閭里光輝人共說我歌薤露聊云云
宜有張林之碑傳後人

塗謠

新年騎竹走兒童兩月甘棠憩召公大誥奉揚天子命崇文絕與
昔賢同閭閻四邑歌謠喜囹圄羣縲剖決空魯泮芹香沾教雨孔
壇花暖鼓春風投膠澄水真難事覆簣爲山必奏功早晚璽書嘉
政績東關劍井氣如虹

和王有恆野步二首

芳草青青路欲迷
白頭有客共扶藜
吳田半沒桃花水
辜負春風布穀啼

雨雨風風一夜春
惜花愁殺少年人
青山不管人間事
也學吳姬翠黛顰

和王有恆見贈

客來欲與問天翁
鳧鶴奚爲脛不同
一代衣冠更變後
五湖風月笑談中
脫巾醺酒畱知己
擊節哦詩和送窮
窗下小桃嬌欲語
錯教童子喚紅紅

糟邱爲鮑思文作

諸公搢搢營菟裘
何如將老我糟邱
杯餘鼯睡儘落魄
堂上肉食從伊優
酒泉不作二千石
醉鄉宜封萬戶侯
幕天席地燭明月
日與麴生同宴遊

攬翠軒

昔人車載葡萄酒
區區爲覓西涼守
山川信美得專城
能有幾時

權在手何如白駒在空谷
四山空翠皆吾有
非煙非霧非塵氛
鬱蔥蔥藹林藪
雨閒清氣相混融
若有人斟西柄斗
繫我南州高士孫
說項求詩半年久
老夫平生愛蕭爽
一笑相逢敢多口
山靈望子早歸來
相伴雲林猿鶴友
朝飡青霞夕沈瀟
攬翠軒中可兼取
何異商山茹芝叟

端午

家居州縣似新豐
不作偷生折臂翁
蒲歎尚能邀客共
榴花堪比舞裙紅
三年艾老蓬蒿下
六日蟾遺坎井中
世事古來多可笑
陶然且臥北窗風

窮快活

示二子

春風嫋嫋花滿林
花閒鳥有快活吟
吾生天與窮快活
一鳴可不如春禽
憶年十八正月旦
薦官船泊西湖岸
東鄰西舍看桃符
適然有喜邀相見
時子纒經淚淋漓
鶚書不作令待時
丁寔郡守養寒峻
月支學廩供慈闈
窮快活從此得
鄉黨州里皆喜色
六經如

天從管窺一方寸地開茅塞破竹方知迎刃解啖蔗漸能嘉境入
看花不上長安道桃李家山春正好馮驩有缺不曾彈乘車食魚
鐘鼓攷充間有子燕雀鳴打門無吏雞犬寧阿婆含笑歸九京遺
澤使人呼寧馨塞翁之馬無得失四十年來如一日南山石爛莫
奈何移家東海避干戈蛇無橫道虎入窟隱然若有神撝訶入吳
首謁三讓廟感古傷今發長嘯三高祠下斥鴳夷邊豆忍覩吳爲
沼雲門先生鐵笛老傾蓋相知皆絕倒老性尚存薑桂辣不隨蒲
柳秋風掃玉山玉泉膠漆促顏公智公支許遊墨名儒行一年少
宅我闔閭風雨秋中吳偶作鵝雛穴越鳥喧呼來不絕熊袁盧殷
吳趙許相伴滄洲弄明月華亭清唳真可聽獨憐士衡呼不醒鱸
魚斫膾新釀酒坐客有無杯不停逃生十年聊自足不知蘇臺有
麋鹿大明赫赫照中天東風送我還鄉船昏鴉占盡故林樹老鶴
孤飛無宿處東門種瓜官道邊菟裘擇鄰遷復遷大兒橫山薜蘿
屋小兒東洲稊稗田耕桑汲汲養吾老晨昏定省俱舍旃每逢暑

月多晝眠小窗看竹風冷然風來扇枕竹磬折使人若見黃童賢
窮快活年近百懷哉古君子鐵面金榜客知己宜有報終身竟無
策作詩示我子若孫勿言儒冠多誤人讀書萬卷百俺低當時杜
老乃云云人生苟不識義理馬牛襟裾真可恥銅山餓死黃帽郎
莫信有錢能使鬼吾今兩眼暗如漆尚喜一襟澄似水曾聞聖人
言孜孜斃方已家僮荷鍤好相隨速埋願與劉伶比黃茅嶺畔青
松宅松聲爲我鳴綠綺更莫用伽佻作步虛汗吾耳
王有恆以畱別其詩有鶯花落老淚之句予乃效唐人和意而不
和韻送其行解其悲兼簡吳中行心友

丈夫不灑離別淚杯酒堪澆磊塊胸勳業連年雙鬢雪歸舟此日
一帆風身居畎畝宜爲樂腹有詩書未是窮寄語雲閒吳處士好
將安信慰盲翁

茗溪獨釣圖

吳興山水清且妍茗溪之名天下傳鷗鳧相伴一釣者風雨不歸

三板船駱駝橋上人如蟻看花馬去長安市滄浪古調不欲聽
簪小鮮何足睨溪流入湖青接天鳶飛魚樂兩悠然休寧挂冠歸
故里丹青想像玄真子漁童樵子俱不見雨蓑煙笠真乃爾嗟予
經鉏老窮閭文章書畫愛猶兼茲圖若以文並覘必須一字酬三
縑

寄劉小齊先生

延陵季子耕田處太乙老人藜燄明動筆卽摘蒼頡字著書重草
太玄經古苔門巷車無轍修竹堂階夏亦清一別數年三舍近斗
城猶望聚文星

簡張履道三首

代蔣以誠作

虛名不託爛柯仙斫雪青山不五年一曲樵歌人未識瑤城江上
獨先傳

客來東里過炎霜老卻瓊林樹一章賴有麟膠絃可接焦桐流水
發鏗鏘

雞林近有賈人來不向何樓買韞材坐待春風吹鐵笛筆端還有
鐵花開

寄宜興教諭

人言陽羨溪山好溪山好處能多少山無猛獸水無蛟且喜祇今
逢盛朝竹姑堪入風土記茶歌可比康衢謠巖宮倚長橋高堂鳴
講鼓新除學官教雨滂坐令巖邑成鄒魯老夫一昨覩星鳳別來
隔邑遙相望山如硯屏空翠溼溪作墨池流水香火星西流拂新
日暮收行秋掃餘熱堂階滿地落槐花衿佩詵詵立黃雪鄉無三
害風俗美賓興名賢天子喜予有一言請試聽丹梯拾級徐徐升
地因人勝地必靈邑里草生書帶青鄭康成齊令名
思賢錄元末爲宋先賢鄒忠公祠墓而作也洪武壬戌會崑山王
仲照語及之慨然有鏤版之意後果如其言蘭初意凡遇郡守
及府教到任各送一部庶有所觀感而不廢其祭掃之禮今蘭
於垂死之秋追念疇昔乃口占以抒其情曰

故人家住千墩麓爲儂版刻思賢錄祇緣見說道鄉翁傳道程門
能慎獨刻書未了謫炎荒寄聲龜巢事宜速乃將楮幣折青蚨七
萬五千錢數足不要譽不求福高義景前修遺風振頹俗惜哉時
無鍾子期聽我焦桐彈此曲

送之歌曰

吾聞西方教無相無住著單提了無礙羣居亦同樂大林新法幢
天盃古道場屋皆雲半閒庭各月一方不縛肚上篋不舐瓣頭蜜
何以養幼軀自種還自喫蹋翻生死海坐斷聞思修獨園銀杏樹
應作石點頭

寄南京僧綱和尚

去年同看中秋月東閣開窗夜賦詩閣下桂花無恙否秋風又到
去年時

八月旦辛易齋書來知耕學先生客死秣陵以詩哭之

吳門山水隔東雷魚雁依然數往來秋晚書題霜後橘歲寒詩寄
隴頭梅但知抱道貧非病豈料生兒禍有胎嗟我淚從枯眼出秋
風遙灑鳳凰臺

感物三首

眼昏不見中秋月疑是重雲障碧天眠到夜深方自省莎雞鳴我
枕頭邊

廣寒宮闕吳剛斧桂子天香總浪傳古意正須人默識華峰絕頂

藕如船

青蠅晝集汗衣巾白鳥雷鳴夜嚙人安得天教生處樂百蟲俱蟄

四時春

秋興七首

臺笠朝京天下同楓宸頒賞不論功人才列郡三英粲歲事連年
百穀豐村鼓蓼蓼喧社日酒旗獵獵舞秋風螭坳誰秉春秋筆爲
祝皇家紀治隆

涼颿微起早秋初炎宇蠅蚊未盡除歷代興亡聽燕子幾家慈孝
學烏雛面皮寧受人人唾頭髮還教日日梳堪笑六經俱忘卻夢
中猶讀啟蒙書

大暑方徂火始流絺衣遽易木縣裘穹林木落風猶怒破屋茅飛
雨未休虎豹九關冠有豸華夷一統佩無牛願言耕鑿終吾老老
瓦盆邊擊壤謳

疇昔愁聞爛石歌并愁無地避干戈如今喜有清河頌更喜橫山
得薜蘿旅雁帶人家信至霜楓似我老顏酡紛紛紅紫時爲貴老
圃黃花變易多

矮窗兀坐嬾擡頭劍氣依然射斗牛石作文人渠自拜木稱居士
我何求看花儘有長安馬橫渡渾無埜水舟尊酒欲論今古意叔
牙何日過林邱

橙擣金齏紫蟹烹客來投轄坐飛觥一時酒興兼詩興半夜風聲
雜雨聲人事盡隨高下手世情多作短長檠賣薪童子歸來晚但

說街頭米價平

蓮巢老我穴藏龜幸爾餘生際盛時九土方輿歸禹貢三農風物
在幽詩蝸黏壁上涎何竭草出山中志不移獨有緇黃畏羈束遷
居城郭半攢眉

周可大新充糧長二首

千里長江萬里船飛芻輓粟上青天田家歲晚柴門閉熟讀天朝
大誥篇

租吏毋勞夜打門桃源風景烈塘村好將擊壤歌中意寫作丹青
獻至尊

初度言懷并序

昔人以大塊勞我以生佚我以老息我以死今吾勞且佚者三萬
餘息之宜矣

天教兩目電無光百物無勞覩短長大塊今朝能息我奚奴便作
輓歌郎

二周詩 并序

橫山謝老過烈塘而作感今思昔挂一漏萬以元吉可大爲周之
白眉使先過目轉示族人大意念先世一邱之土望爲保障至
如吾族之微意在言外聞之者亦必有感於斯時洪武二十四
年十二月朔日也

東西二周烈塘曲世與吾家鼎三足東周阿婆吾女兒西周阿婆
吾女叔百年世事一再變遼鶴歸來無處宿蝦蟆之陵幸然在煙
慘雲悽寒篠綠吾祖汝曹尊外翁數豕纍纍列昭穆年年黎雪落
清明藐子來作孤孩哭周宗奕葉半憔悴遑恤蕭條渭陽族東枝
祇今春意多西枝亦復花如簇有能銜土作義烏無患觸松來埜
鹿篤親苟不負前言高誼真堪振頽俗莫言古道獨行難天將照
汝光明燭

示二子自烈塘還橫山而作也曾子曰人之將死其言也善吾於
此亦云

羲皇未造書契先二五渾淪無可甄勳華繼義立人極三代典禮
星日懸人之有生必有死養生送死理宜然一從楊墨至聃釋異
端邪說多乖愆我生賴以讀書力破浪飄我中流船蒼頭荷鍤日
隨我死卽埋我橫山前毋勞沙門送作佛毋勞羽客送登仙漆鏝
不必照長夜宰樹不須纏紙錢椒漿或醉寒食雨麥飯或灑清明
煙謝莊西頭烈塘口高曾祖禰上畱田年來岸谷復變改瓜瓞幸
爾猶縣縣微如豺獾知報本汝曹慎毋忘所天
賀西傳和尚爲僧司副綱

大鈞巍巍立人極緇流亦須方寸赤選佛場中選厥官提挈綱維
揮判筆龜巢老人盲且瘥刮眼欲覓黃金篋黃河水清一快覩更
看鉢羅開盛時

崑山辛彬甫夏初以人才見上奉旨還家教諸生讀大誥限以十
二月五日師生赴御前試讀如期而往受賞而歸蘭甚以爲喜
作是詩賀之

白袍鶴立蓬鴻行青佩鳧趨被寵光大誥三編建瓶水春風兩袖
御鑪香賜金堪比燕臺聘抱玉仍歸下匱藏試看明年書帶草崑
山多似鄭公鄉

長洲劉衡來云無錫徐伯樞縣丞重過衍慶院有詩題壁予乃次
韻敘別并寄題膠山幽居各一首

朝陽鸞鳳失巢時獨集叢林枳棘枝坐客一甌曾吐酒過橋三笑
共哦詩長洲茂苑多年別野水孤舟到處移重搗清流弄明月秋
風禪榻鬢絲垂

西日長安多看花東膠故邱今種瓜問奇每卻人送酒養老喜有
兒當家一襟清氣比肩少七言長詩適與賒暖香不熱古銅鼎雪
梅應作先春花

送丁敬止攜室人奉母往西流乃翁寓所完聚

風雨舟車涉路難爺娘妻子聚團圍七千里外桑蓬老十二時中
菽水歡楊柳小詞聊送別蒲萄斗酒莫求官過庭煩說龜巢老新

結松蘿亦問安

伐簡陳子章先生

屋山日高三丈餘盲翁負暄頭不梳客來長揖道傳語宛邱先生
今寄書開緘爲我一再讀數行報到平安竹雞壇歃血闔閭城三
十六年如信宿象賢無人固可吁玉潤之壻亦可娛韓子文章妙
天下李漢掇拾無遺珠嗟予經鉏付中子書田未熟身先萎孫枝
一翦一飄零戎服西川八千里阿翁偃偃無所之況聞路難多瘖
黎閉門縮首如凍龜墮甑不顧從人嗤大兒力田供菽水小兒蒸
嘗伯爲禰此身幸無寒與饑祇欲全歸未能爾每憶梁溪邂逅時
買花載酒畱人嬉元龍豪氣除未盡傷春猶賦杜鵑詩一別十年
今若此此去浮生知有幾車輪從教生四角是非毋勞辨三耳我
峩陽山煙樹綠皎皎白駒在空谷太湖流水清於玉雲影天光常
在目焦桐絃斷麟膠續彈我風雩詠歸曲詩筒不時頻往復要見
珠璣咳唾琅玕腹彼此相看如鮑叔

和鄒士文與陳子莊會飲
不談黃老不談僧不憶鱸魚似季鷹行到古人清絕處今人能有
幾人曾

水獺氈帽

代曹元度作

蠻溪水獺雪毛氈帽屋蒙戎載渾天濡首墨池頻脫去不妨草聖
繼張顛

林塘幽為鄒士文賦

林塘幽在何許梁溪之東五十里宛若浣花流水西頭住滄洲繚
繞白鷗沙青山隔斷紅塵路幽棲人似鹿門龐耕耘時欠妻孥助
清時固難遇生處聊自樂閭巷絕車馬階庭可羅雀門前芳草不
教鋤爨下焦桐亦高閣排衙不聞官舍鼓抱關那知兵戍柝催科
吏不打吾門知我家無田負郭穿窬盜不入吾室知我帑無金可
摸烏衣喜得客居安黃耳且無家信惡愛酒愛詩愛親朋此外物
情俱澹泊鄉來無錫山中泉潺潺日夜流青鉛三吳化作百戰地

草木血腥人亦然殘山賸水本落寞地因人勝佳名傳老夫獨恨
傾蓋晚枕書方作邊韶眠清晨曹劇過空谷一鼓撼我龜巢踰時
予春秋九十有六年訪人嬾上山陰船臥遊賦此林塘篇

謝府學教授縣學訓導見訪二首

杏壇遺曲三千齡彈與龜巢老子聽賴有青松知曲意掀髯爲我
舞階庭

灞橋詩客蹇驢馱同策吟鞭過薜蘿老病送迎門不出楊花飛雪
奈寒何

別後數日知途中值雨再此謝不能固留

鄰家借酒過牆頭楓火新鑽且易裘風雨不留佳客住溪山應爲
老夫羞一甌冷暖忘木榻四月清和宜麥秋珍重沈腰圍革帶先
鞭何日上瀛洲

詠懷詩奉府縣訓導

蚤年豪氣慕元龍今日窮途作嗣宗夢斷春風金駉裏情鍾秋水

玉芙蓉春秋魚魯渾多誤河洛圖書豈易逢四海白頭兄弟少懷
哉澗底有青松

寄樵海教授老先生洎諸故人

室移懸磬三家墅身作爬沙六日蟾生死固知天已定盲聾可奈
日相兼桃花笑我頻辭酒燕子瞋人不捲簾吳下友朋春夢裏休
官多喜似陶潛

寄集公詢公二講主

吾聞西方教教人無住著桑下一宿去信步恐顛錯嘉爾兩尊者
高風素相若出世扶法幢功成竟忘卻掃除煩惱魔灑脫禪律縛
不隨法華轉亦不觀日落千墩片雲閒臥遊當行腳日來崑山縣
山靈有佳客欣然爲彈指又見此樓閣人皆詩乎時吾亦樂其樂
老夫數年別每憶霞上作含吐海潮音因風寄寥廓

寄陳明遠兄弟

先世多遺澤清風並絕塵門前馳驛路林下讀書人龍澤靈湫古

牛臺佛樹新盲翁飛不去徒憶外家親
懷辛至善

通江橋下別小海醉中聽玩世頭俱白逢人眼共青溪山三舍隔
風雨百花零賴有忘憂物千錢一巨瓶

素醜酬

楚江萍實本烏有童謠浪出詞人口社園菜根非不佳老饕可奈
無齒牙世傳淮南豆爲腐山僧野人嘗饜飫誰信窮居寂寞濱街
頭買來如八珍金莖無露石無髓眼前蔑物堪爲比吾兒捧持供
老親乳姑何異唐夫人我非曾啗嗜羊棗樂與參元同一飽淡而
不厭知者誰中庸君子古來稀腐兮腐兮能養老濟世之功不爲
小淮南此術昔未傳食貨志中斯闕然前時雍公贊三德吾亦題
詩三太息易名今號素醜酬質諸庖丁易牙僉曰都
次韻答臧尚迪先生見贈二首

延陵埜唱風吹去曲誤誰知顧且聽湖海臥遊春晝靜一簾花雨

集中庭

生兒喜有凌雲志補屋能牽帶雨蘿春水自流魚自樂笑人濠上說無何

又答毛伯尚二首

白石南山無復爛朱絃流水正堪聽斗城東北柴桑里書屋三閒草一庭

嘉木天生古喬梓故山月照舊藤蘿壽觥頻捧梨花酒莫問東欄事若何

憶昔行

憶昔父子生別離濠梁流血人正苦一聲哭斷九迴腸化作瘴煙生阿堵當時見而知者誰西門橋畔柳攢眉從茲失卻巖下電欲送孤鴻煙障迷天教兒歸養郎罷一語不聞相慰藉有時摸索案頭書手澤未乾多羽化去年秋初至今日白日青天暗如漆下牀寸步莫能移食飲不分朝與夕蒼天蒼天宜蒙見憐早入鬼錄如

令登仙區區有一語請與親朋言生兒可愛儘教愛畱取眼光終莫年

楊文靖公祠堂詩

立雪程門道學傳東南瓜瓞遂縣縣置身方到賢關地隻手將扶杞國天豺虎跳梁非偶爾鳶魚飛躍自悠然常州舊宅今焦土宜有烝嘗似昔年

送垣戍蜀屯所

七千餘里孫屯田九十六歲翁勉旃人心堅與鐵石比天眼明如日月懸赤甲山川皆勝境黃雲隴畝正豐年漆鐙照我青松宅別後全歸自宴然

卽事簡毛伯尚臧尚迪

噫吁戲癡翁百拙盲兩眸好古之人念不休睠言文靖祠舊在城東頭桑田爲海岸爲谷祠亦化作濟河伐楚之焚舟文靖早從伊洛遊伊洛一派東南流時方薦賢拔其尤遽從天上落常州至今

羹牆閒儀刑見前修移文宜託北山靈作室祀我東家丘二人同
厥心眾毛成此裘冠冕斯文黼黻皇猷光生劍井衝斗牛照人駿
奔蘋藻羞鳳兮鳳兮兩悠悠高岡一鳴三千秋昔聞吳興沈東林
隱居收書散黃金長洲同姓今好古散金收書同厥心老夫書癡
年近百尚欲旁蒐二三策客來說項似楊源又說識韓如李白孫
枝璀璨珊瑚樹襟度汪洋雲夢澤區區瓣香客懷去借書數篇謄
竹素高人若問欲何爲欲使迷塗人快覩天倫道在科斗篇朝聞
夕死勝登仙譬若丹梯借我升華顛太藕移來鄉井傳饑渴可療
疾可痊藕絲織縑顏色鮮孤寒總得衣褊褊客歸爲我謝一言陰
德濟人知者天

寄呈崑山縣學訓導三首

崑山學舍玉峰前王氣氤氳煖坐氈絃誦聲中和樂意浴沂童冠
暮春天

一株銀杏倚齋廬長夏清風喜穆如試問西湖林處士梅花誰與

歲寒居

鄴架牙籤古典多桑公鐵硯少年磨借書莫笑人癡絕矻矻編蒲
老薜蘿

屯田歌

衣布襦食菑畝服勤犁與鋤三餘涉獵兵農書惜居諸範馳驅秋
秋渥注千里駒時來躡雲衢

道旁語

盲翁坐南簷炙背日將午兩耳未全聾猶聞道旁語一言賢郡守
愛民若慈父一言江陰丞心若秦鏡古鮑老本郎當不覺雙袖舞
安得普天下州縣皆樂土人無笑中刀物無射工弩不憂歲年晚
不畏冰雪苦春從天上來百草沐膏雨

新新堂

猗歟隱君子城市山林靜方寸秉彝天若對古秦鏡妍媸照人面
肝膽見人病朝朝頻拂拭塵尾犀角柄秋風塵自多不到靈臺境

湯盤九字銘宜加日三省

椿萱堂

將軍大樹從錦纏高堂椿萱香靄然昔椿壽閱八千歲今萱德薰三百篇分甘稚孫遶膝下承懽萊子舞階前雙親之樂有如此虎頭應作畫圖傳

上李太守

龜山先生之學伊洛傳道鄉先生與此肩熊魚慎獨各有省同在中庸書一篇後來出處固不同晚復同此終餘年當時州人買田宅楊乃宅居鄒贍田百年世變厄兵燹宅爲焦土田荒煙府公去春下車日蘭以缺典曾敷宣還家薦欲去專對目盲耳聾身莫前願言一祠尊兩賢歸存若魯靈光然斧工毋勞巧節稅畫史亦勿丹青妍潏湖挹水注壘爵泮池采藻供豆邊風行四邑草必偃續成三考蒲無鞭斯之熾而昌劍井光燭天瑤琴斷絃續金榜三魁懸甘棠遺愛歲百千不須龜趺石立如峴巔邦人去思肝膽鐫

老蠶

老蠶不眠食日夜作繭忙繭成上繰車雪色藕絲香垂衣美絨冕在上供皇王衣被普天下其功實難量蜘蛛巧如之結網能高張蠶蠓可欺者罹致日充腸子生勉力學歲月九十霜爲蠶不爲蛛賦善賴彼蒼雖無黃絹辭裴然成厥章小則效裨補大則繫綱常制度苟無違尺短寸有長願言後之人緒餘毋或忘

負暄

峩峩芳茂山爲山遮朔風南陸日杲杲兩簷煖融融盤殮豆粥輒箕踞橐席重追思古羲皇首出開鴻蒙宮居食而衣生民賴軒農勳華教明倫三代禮樂隆尼山集大成斯文萬世宗蘭也幸如此不與禽獸同年紀近百歲心孫有四通三字四字句經訓授蒙童七言五言詩大音鳴寸衷時無雞窠兒自號龜巢翁負暄樂有餘人言少如儂儂心亦知足作詩謝天公

代簡高彥述

長安道上人如蟻澹泊齋中香自凝金匱早傳先世業玉樞誰授
道家經梅花立雪應含笑麴蘖流霞可解醒莫訝盲翁詩永訣又
從追蠹一撞筵

懷詹蘿屋

烏石岡頭送上船黃楊厄閭又三年煙蘿小隱三家墅霜稻豐收
負郭田置酒待賓常擊缶買書教子不論錢盲翁恨不能飛去永
別歸來赴九泉

和遊大林庵韻

石頭數里橫山路丹井多年羽士家聖代重開新宇宙禪林乃易
舊煙霞沿階細草龜毛綠護竹疏籬象眼斜更有庭前松柏樹潮
音也似學楞伽

龜巢彙卷八

龜巢彙卷九

詩

和趙朋南春詞四首

落梅風急綺疏寒簷鐵鏘如響八鸞堪笑嬌癡兒女子折花騎竹
繞長干

多謝提壺不住鳴杏花枝上月三更銀罍瀉盡葡萄綠祇爲傷春
醉不成

小閣鉤簾待月時燭花頻翦夜何其惜春不奈春宵短翻憶秋宵
玉漏遲

花拂盆池入鏡光柳搖臺榭弄鵝黃晚來頗覺東風惡分付薰籠
熱暖香

遊南山和徐伯昂韻

諸君南山遊豪吟氣憑陵惜無龜巢老拄杖攜赤藤俛觀陳湖水
一盤秋露澄吾兒躡吾屐樂與君共登坐花藉苔茵尊酒空十朋

垂楊細腰舞不費纏頭綾羨君方妙年文章有師承譬彼學佛者
當爲大乘僧滂沱夜雨來紅日喜彩升楊花飛渡江茫然白雲騰
晨看有聲畫妙若曹不興茲山賴有傳詩名與俱稱

和林寒食有感五絕

何處登臨散客愁千墩浦上聽漁謳清明落盡梨花雪能得春風
幾日遊

憶得少年寒食日落花塵上馬蹄香六龍城郭春如畫那得旌旗
帶雨揚

烈塘墳上樹如雲一掃東風十五春不信令威歸不得竟移華表
屬他人

一徑落花春晝靜四鄰嘉樹綠陰繁兒曹忘卻懷鄉意浪說春風
似故園

白髮蕭蕭客未歸淒風緊雨禁煙時青苔白骨尋常事堪笑田文
爲客悲

遷居

逃難居頻徙幽懷孰與論崑山一舍地溢浦數家村老去仍爲客
朝來又抱孫雨餘春草綠生意滿東園

聞玉山顧隱君以賦役入城負疾而歸區區懷思寄詩代簡

聞道龐公也入城還家風雨近清明催租人去詩仍好市藥童歸
病已輕尚喜竹林青荀出不嫌花徑紫苔生野夫得此平安信訪

戴姑遲數日程

哭杜玉泉處士二首

每憶城南杜今爲地下郎好詩留巨帙遺像在高堂濯濯孫枝秀
離離宰木長可憐桑與梓春雨竟淒涼

東郭溪山勝南園花竹深平生多樂事之死遂關心挂我客中劍
撫君牀上琴迴風吹柳雪和淚落衣襟

四月二日林自瑤城歸寫呈遷屋詩四首和以述懷并記時事
鶴長鳧短世難齊滿眼風塵客路迷竈突未黔居又徙兒曹況在

兩湖西

六幅蒲帆帶雨開，瑤城艇子過湖來。老妻正倚門前樹，雪色楊花覆綠苔。

傲得山居鑿井新，客來不厭煮茶頻。屋頭鷲地顛風起，狼藉桃花

滿樹春

鬢絲垂領白毵毵，老我身如作繭蠶。午夢忽驚飛礮響，狼煙祇在

澗湖南

余往哭杜處士過松江問途乃知其弟玉溪亦殂去兩月追懷宿

昔作詩悼之

往歲畱三宿，今晨哭二難。榻懸無復下，琴斷爲誰彈。溪竹春雲散

庭花夜月寒，悲乎浮世事，長夜雨漫漫。

答徐伯樞見寄二首

十載風塵走朔南，白頭如雪面如藍。借車載具家頻徙，應俗爲文筆大慙。茅屋雨添苔上壁，竹籬煙護筍抽簪。別來行路難行甚，何

夕挑燈與細談

杜宇催歸不絕聲，知君歸計正畱情。東膠茶焙春煙煖，西堠花村

夕照明，音信尚煩黃耳寄，交情不負白鷗盟。明年築室相鄰住，兒

輩求田與力耕

邀管伯齡鄧宜之許君善端午小集

十年端午長爲客，一笑今朝有故人。江草碧搖書帶淨，石榴紅摺

舞裙新。潮生小港通船路，風掃幽軒振席塵。酒禁未開罍爵恥，茶

鎔爛煮兩旗春

邀月田上人

借得沙鷗半席沙，相期來喫趙州茶。渡江賸有蘆堪折，日落潮回

卽到家

次韻答許君善見貽

憶昔平居頻會友，家有秫田供釀酒。安知今日對端陽，無酒可澆談笑口。客來置茶聊解羞，強將車轄井中投。清風綠樹北窗下，時

聽一聲黃鸝畱西山雲起日將暮斯須雨暗橫塘路銀鐙纔點卽
生花爲我喜君青眼顧我心如醉顏如酡憂時未盍奈老何明年
此日復此會此詩當遣玲瓏歌

卽事

黃梅落盡雨初晴客舍青苔四壁生鐵礮打城聲動地老妻猶訝
是雷鳴

代簡大雲講主

天竺之書五千卷吾師以之全藏轉蚤年手握摩尼珠飄然擲錫
遊天衢歸來濯足太湖水從此一龕兀坐如枯株有時忽作獅子
吼狐貍野牛顛倒走有時閑寫山水花花光之梅作清友近聞有
約過貧家家家埽門迎象車欲知老夫何物作清供湔陰小圃自
種崑崙瓜

朱公路縣丞和徐伯昂詩見示不爲險韻窘束余甚喜之故復和
一首以寫起敬之意

瓜廬淞水西溪山勝東陵玉立開徑竹纓垂賴簷藤善養氣不餒
靜觀心澄澄白雲少人和青山與誰登稽古蓄萬卷問奇來遠朋
顧余憤鼻布不識馬眼綾來詩清可喜玉露仙掌承想當締思時
寂如禪定僧詩成掃巨筆墨汁飲數升干戈有時休雅頌當復興
願同杜拾遺一代詩史稱

壽張實甫

我愛龐德公躬耕亂離日以安遺子孫此計真第一君今牀頭金
有餘傳家之計乃亦如況入東林遠公社每誦天竺空王書幽棲
久矣機心息鷗鷺相知俱莫逆獨憐丹穴一鷄雛偶爾西飛歸未
得願言晚節金石堅河清復見昇平年明年之日壽觴舉三鳳聯
翩郎罷前

闕人呼父爲郎罷

寄贈勝無能上人

雙林舊宅今蘭若百丈清規老作家鐙燃佛龕無晝夜榻畱禪衲
共煙霞屋頭青覆娑羅樹池上紅開菡萏花六月香風清似水野

夫曾此坐鷗沙
丁未夏六月寓真覺菴數日日賦小詩以寫目前之景適大雲師
遺雙清圖足成十首

祇樹園林舊雨荒僧廬今喜近滄浪我來一榻南窗下分得溪風
午夜涼
臨溪照見影稜稜老我頭童狀若僧堪笑讀書心未死夜來猶對
佛前燈
燭龍銜日出東溟飛到天中落火星莫怪懶慵門不出一林翠竹
風泠泠

荷杯飲露比名酒松塵生風無俗談日落清蟬吟未了雨來白蟻
戰方酣

高堂無塵清晝遲山僧持鉢未歸時白衣仙人坐相對淨瓶楊柳
青垂垂
客來自汲煮茶泉蹙足浮屠亦可憐借我石牀箕踞坐有時閑說

趙州禪

襪鞋不韞苧衣輕好客何妨日送迎試聽礮車飛霹靂將軍觸熱

正塵兵

雙林一室養微疴列坐羣緇問若何不用散花天女輩儼然無語

老維摩

芭蕉葉上徧題詩更覓吳牋寫竹枝過客莫嫌人寂寞鬢絲禪榻

正相宜

生愛梅花與水仙故人摹寫寄林泉披圖淨拂燒香几何異長齋

繡佛前

普講主過千墩偕余訪許溪西出普公曩歲所作水仙花求題普

為重記歲月俾余題其左云

梅兄礬弟總不見邂逅獨睹凌波仙雲翁指點笑相語我為傳神

三十年

簡蔡君立從事

齷齪布衣老生無晉人風杖藜相訪不相見興盡適與王猷同出
門喜清颿天氣涼蕭蕭重雲忽迸日六合如洪窳東屯行行且
止賣藥人家杏林裏蜚廉意若迎我歸南薰轉從西北起快哉一
披襟長詠出舞雩老夫此興君必知黃金不用鑄鍾期歸去來兮
溢水西

與諸友論詩次朋南韻

每見故人詩不俗恨不移家與連屋人生有詩可傳世萬事無成
心亦足嗟哉風雅絕遺音斷絃未有麟膠續三經三緯機軸在文
士疇非賴私淑屈原吐詞蘭蕙香能襲餘馨唯宋玉兩京豪華六
朝靡聲律由唐轉羈束草堂先生獨冠佩進退委蛇氣容肅孔明
廟柏一品題儼然棗竹森淇澳要之鍊詩如鍊丹九轉功成龍虎
伏秋高當約許玄度妙法參諸老尊宿

次韻答朋南重九之約

重陽無酒不須賒看菊柴桑處士家祇恐滿城風雨到客窗岑寂

對簷花

贈筆生王伯純

時方用武我業儒王生賣筆來吾廬生承世業雪溪上製筆特與
常人殊宣城阻兵十三載猶喜山中老魏在拔來秋穎帶微霜縛
得銛錐含五彩昔年草創供玉堂玉堂仙人雲錦裳三縑一字不
易得筆價亦與時俱昂莫怪年來棄如土埽滌風塵必斯斧生今
賣筆我賣文何異適越資章甫呼兒亟用買一束爲我寫成懷古
錄吾兒作字三歎賞八法以之隨意足我有好音生可知用筆將
見文明時諸公筆諫佐明主老我筆耕箋古詩逝將重作毛穎傳
爲紀頻年遭薄賦牽聯爲生書姓名守業不隨陵谷變中秋適逢
酒禁開椰瓢酌生新潑醅酒酣仰視月中兔長嘯一聲歸去來
盧志道馬公振以滿城風雨近重陽爲詩首句各賦二絕同日見
寄要余和之

滿城風雨近重陽一望蘇臺百感傷臺下伏屍多濺血秋花不似

舊年黃
滿城風雨近重陽門巷蕭條草木黃茅屋破來天更雨誰能補石
繼媧皇
滿城風雨近重陽籬菊花開酒未嘗四海兵戈無了日十年書劍
客他鄉
滿城風雨近重陽猶喜觀山目力長風雨晴時山更好也須攜酒
掛車傍
兩年九日晴景不同口占二詩聊述梗概
去年重九日烽火接三州黃菊無心看溪山滿眼愁風霜新鶴髮
塵土舊貂裘爲覓桃源路拏舟到海頭
今年重九日兵破闔閭城紅粉娃宮毀黃金郿塢傾老懷多感慨
歸思轉縱橫賴有茱萸酒開軒看晚晴
旭齊劉先生四明隱君子也客吳數年日以詩酒自娛特與余相
友善丁未秋年七十有六自謂不久於世爲志墓之文及賦詩

自挽其詩曰知非纔戒酒送我但吟詩且邀余以辭挽之余既
爲贊小像後五日乃攜酒詣崑山勸飲故有是作

天生劉伶愛杯勺杯餘更以詩爲樂有時痛飲發豪興徹夜長吟
追古作胸吞雲夢氣崢嶸筆吐珠璣光錯落知心每恐化渴鳥見
面俄驚作癡鶴爲嫌八達太疏狂乃效獨醒甘寂寞高陽人笑老
癡漢杜舉身遭束高閣我來黃菊似含喜坐對青山論酬錯舉觴
一笑口復開蓋棺百年心不怍金龜足可換新菊玉兔無勞擣靈
藥偃月堂前丞相死齊雲樓下降王縛眼前事事真蟻夢身後虛
名等螢燭何如閒策鐵拄杖時復醉傾金錯落吾詩便作薤露歌
活挽先生薦清酌

張伯庸在郡城被圍數月閒道而歸賦詩賀之

雁書到手人方喜虎口脫身君已還難似上天行蜀道險於中夜
出秦關柳營鼓角邊書遠萊子衣裳喜色斑百斛葡萄新釀熟歌
童莫放酒杯閒

方池詩爲馬公振作

攜我方竹杖看君方池水宛然俯中庭照影月明裏清風生蘋末
素練吹不起魚樂魚自知主人亦應爾

和許君善郊行十絕

秋色蒼茫日落斜鯉魚風起荻飛花先生晚酌依稀醉吹笛漁童
恰到家

書畫船頭吐白虹談玄塵尾灑清風繞籬種得陶潛菊時復看花
酒一中

階前幽草比琅玕屋上慈烏卽鳳鸞老去山林友麋鹿不知貔虎
尚桓桓

流水柴門不厭貧古今曾見幾何人山中松菊陶元亮谷口犁鋤
鄭子真

怪底深秋氣候溫野花成子竹生孫數椽衡宇清溪曲風雨蕭蕭
晝掩門

竹有幽軒水有渠閉門不出十年餘一編修得梅花譜又注神農
本草書

朝野新聞總闕如經鋤甘分老迂疏客來畱喫雕胡飯旋斫溪頭
出網魚

窮到無錐累始輕黃金何用苦畱情姑蘇臺榭新如畫又被西風
一夜傾

不見魯山元紫芝干戈滿眼少陵詩采樵何處青山好逢著仙人
且看棋

一雨洗兵秋可憐東吳香稻熟紅蓮許家墩下斜陽外無數饑鳥
落晚田

淮夷篇

大邦浙河西吳郡稱第一淮夷著柘黃來作豺虎窟交鄰無善道
西顧距勁敵一鶚撻網羅同氣頓蕭瑟正朔仍奉漢天恩滿牀笏
賦粟歲倍蕞郟隰金日積非無船舫風海運不挂席包藏狼子心

反覆莫可測臺閣兩重臣忍爲梟獍食井蛙自尊大出入復警蹕
愛弟寵且驕開府門列戟提兵幾百萬勢熱手可炙甲第連青雲
圍溷亦丹碧瑤池長夜飲天魔舞傾國帷幄皆面諛忠鯁便麾斥
權門競豪奢婪婪務懷璧淮南舊巢穴坐視城棄擲出師理侵疆
所向輒敗績鄰兵賈餘勇一舉數州得羣兇納降去孤城獨堅壁
奈何圍數重樓櫓比如櫛礮車拂雲漢晝夜飛霹靂寵弟旣齎粉
左右皆股栗短兵屢相接苗獠與戮力南濠百花州流血水盡赤
閉關甫期月人面多菜色蔬食猶入珍骸骨爨下折眾叛已不知
豕突猶親出前途忽投戈回騎不數匹一炬齊雲樓紅粉隨煙滅
縛虎送臺城咆哮氣方息嗟哉爾淮夷亡命起倉卒橫行十五載
富貴亦已極雕牆底滅亡斯理信弗忒

十月過吳門

無數雲梯盡未收髑髏如雪擁蘇州僞王守死空遺臭降將偷生
忍負羞鹿走荒臺千載後烏啼野樹五更頭篙師也爲愁無寐不

待天明已放舟

過無錫書所見

朝發吳門東暮宿錫山下隔牆語嗚咽云是流移者生來本村居
白首事耕稼居城僅期月區區避兵馬狂奴稱老虎啞人空四野
城降人出關方幸虎遭剛里胥俄捉人負郭一網打監官驅上船
寸走不少假不知遣何之骨肉忍相舍語罷哭聲悲涕與淚交瀉
同行十數人瘦骨皆一把鐵索連繫頸俛首若啞天高恐無聞
爾悲知者寡

歸故里

憶昔走避兵棄別鄉井去意將朝莫歸行行重回顧安知今一紀
方蹋去時路四郊皆蔓草白日暝如霧披榛訪閭里隔水拜先墓
傷哉脊令原黃蒿走狐兔別墅破垣在郵亭乃新築鄰兒二三輩
茅茨畫局戶相見不相識熟視肖厥父坐久泣且言爲我話親故
什九死兵戈餘亡不知處其詞吐未終我淚已如注對食不能食

相期歸蟻聚吾將語吾兒賣書買農具歸耕瀉上田宜若鳥返哺
吾其正邱首此心庶無負

戊申歲訪朋南執中二趙君皆連牀夜話極談今古時朋南以草
亭自號工詩有唐人風致不苟作也越信宿作詩眷留臨別復
有魚米之遺執中亦和詩示余意皆有餘而不盡也後十日次
韻二首其一寄題草堂兼謝所遺一以寄執中以述交契之厚
云

圖畫蘭亭跡甚陳谿山何似草堂真晉人標致清談妙杜子詩篇
下筆親客至合歡常盡醉我來畱宿豈辭頻還家飽喫魚羹飯更
喜瓶儲玉粒新

經歲離懷得具陳酒杯深淺兩情真老夫生賴詩書力良友交同
骨肉親楊柳錦溪春尚淺綺羅鐙市雨何頻別來十日牛衣臥世
事如今又一新

和施天明卽事二章章五句

吳儂頭白雙眼昏夜逃淞土煙水村老妻翦紙招驚魂問之不說
苦徭役但言入地恨無門

吳儂十年遭亂離飛芻輓粟筋力疲哀哀婦子皆瘡痍春來破屋
雨連日疑是淚從天眼垂

戊申春浙西僧尼道流凡主寺觀者皆集金陵蘇州萬壽寺長老
愚隱師亦在焉僕嘗夢寐中與談今昔且問及剛中毅公故賦
此以寄二老

夢繞鍾山訪舊遊共看江水話閻浮隴西鸚鵡金籠閉海底珊瑚
鐵網收刀尺尚須成妙用瓶盂未得賦歸休別時問我雙峩老爲
道身如不繫舟

寄姪僧德無言二首

時在金壇西
謝村菴居

紅梅閣下夜連牀一別今年十二霜爾父爾兄俱卽世吾孫吾子
未還鄉西林卓錫青山好東海垂綸白髮長何日與言生死事更
論松菊故園荒

嗟我成童卽棄家住菴鈍斧老金沙篋藏林下緡經葉瓶養山林
供佛花浮世本來同一宿歸途必合駕三車白頭癡叔遙相憶
下修書字半斜

馬公振以久雨懷思作詩見寄適干墩諸友朋爲謀道旁之舍因
和及之并發巨浸之歎云

二首

芳草萋萋春復春桃花應笑未歸人數椽矮屋清溪曲一箇扁舟
綠柳津且與往來成款段從教圖畫上麒麟老妻頗勝劉伶婦不
惜春衣典酒頻

吟罷秋風破屋歌不堪春雨復牽蘿無人爲補青天漏滿眼愁看
白水多階下縛橋兒渡蟻門前換字客籠鵝可憐豪氣三千丈方
覓堯夫十二窩

公振和許溪西韻并簡老夫次韻答之

世亂已如此年饑更奈何城池百戰後風雨一春多有酒客同飲
耽詩病亦哦老懷聊自遣頭髮未全皤

和周明府留題趙靈寺

大澤水環金刹地小樓簾捲玉山煙桃花雨濯江邊錦榆筴風飛
地上錢世界屢驚天柱折佛光還自月輪圓衲僧會得頻伽語也
學詩人拜杜鵑

田家謠

花朝一雨連寒食水沒吳田深三尺田家壁立杼軸空逃亡半作
溝中瘠農官令下星火飛勸農蹋車農苦饑產蠶之竈斷煙續藜
莧煮茶青葉肥商羊舞如獨脚鬼天瓢倒傾恐未已水車恨不化
渴龍一口吸盡西疇水我謂爾農毋怨天堯田水溢亦九年但有
人能拯饑溺卽令四海無顛連請君試聽蹋車鼓蓼蓼聲中含疾
苦天門九重路深阻此聲何由徹明主

趙貞白輓歌詞

前代衣冠族先生山澤癯淳風振薄俗高誼藹中吳舊債焚餘券
凶年振餓夫紅塵無足跡白雪滿髭須鐵硯磨未磷簾金視若無

蹇余牛馬走愛爾鳳凰雛卜宅來依倚通家學步趨玉枝纔有汗
瑤草遽成枯敬下墳前馬仍瞻屋上烏典刑無復見老淚落鮫珠
寄謝朋南執中中行諸友兼簡楚南滄海二禪伯

錦溪水流無住時我思故人心如之扁舟來繫溪上柳六月初三
新雨後常年大暑金欲流今年天氣涼於秋故人相見不相舍水
竹軒亭榻俱下東家談笑復西家西家碧筩瀉流霞醉抽吟卷看
珠玉夜窗翦盡如椽燭明朝竟日復畱連月在柳梢方解船瀕溪
更有好僧舍古木陰森正宜夏龐眉兩僧亦可人茶鐺長煮小園
春但候移牀就泉石共聽松花坐終夕

簡熊元修

憐君苦有輭腳疾愧我貧無挑藥錢此日尺書重問訊何時杖策
與周旋湖鄉地溼黃梅雨舍館窗含綠艾煙猶喜東家人好事銀
瓶長送酒如泉

贈吳逸菴

先生頭髮烏如漆上壽明年八十三豈有神仙傳祕訣尚看孫子
著朝簪燒香看畫湘簾捲畱客題詩綠酒酣堪笑野夫扶醉別出
門更與阿戎談

寄張伯祥兼簡顧玉山

尺書曾去墮沈浮嗟我懷人意未休兩地共看千里月西風又換
一年秋牧羝飡雪猶歸國買犢耕雲且素侯暇日煩尋顧文學爲
言相送愧鄒游

石箭頭歌

并引

丙午冬吳人自望亭驛鑿渠通漕湖深丈餘乃得石箭頭長州徐
伯昂氏以所得之一見遺一以遺倪元鎮各賦詩

南山爛盡蒼雲根飄風勢欲傾崑崙何年老砮作遺鏃神劔鬼削
秋無痕沈沙不隨戈戟折太陰玄精壯冰結五丁假手出重泉猶
帶堯時九鳥血羶羊肝膽破尼子走折足獨有老於菟坐嘯風滿
谷猿臂將軍骨已枯蒼頭盧兒金僕姑時平時乎奈爾砮

次韻集講主見懷
君今風北我枝南
燈火餘輝借佛龕
老去著書酬素志
客來揮麈接清談
遠公沽酒能相引
中散鳴琴豈不堪
且喜早秋頻得雨
襟懷無復鬱如惔

偕大雲大成二講主及學上人宿聖像寺詢無言山房作

西晉招提屋半摧
江流依舊碧縈迴
黃楊偶厄今年閏
青海曾浮古佛來
明月一庭僧下榻
清風四座客銜杯
石闌點筆題詩處
池上藕花秋正開

次韻答許鈞善

滄洲濯我足
白首事經畬
幸作依劉客
難忘薦禰書
病聽驚螳鬪
守拙類鳩居
長日思君子
新詩忽起予

早秋寄悅堂長老三首

雙徑人來候
起居山林想
亦問何如煩
師爲覓龍潭
水洗眼將看
後世書

秋陽皜皜火雲騰
未有天風洗鬱蒸
珍重毗耶方丈室
一壺寒露置清冰

我愛青山冷澹交
吳淞江上寄龜巢
秋來翦得芭蕉葉
欲借楞伽手自鈔

閏七月七日許徵士以詩見招適余有毗陵之行不及赴次韻答之

西風時節大江秋
明月江行倚柁樓
一路看山三百里
桂花時節到奔牛

過無錫梅村口占贈俞子英

梁鴻山下碧溪灣
落日蒼茫客度關
秋色已催紅日老
人生何似白鷗閒
危橋跨水苔痕滑
折戟沈沙血點斑
奇士相逢忽相別
相知祇在片言間

中秋三首和易九成韻

中秋無客夜相過
落葉衡門感慨多
明月幾回懸似鏡
浮生百歲

去如梭誰家桂子香如許我屋茅飛冷奈何猶勝去年連日雨吳
兒苦織覆城蓑

海門潮上水西流白兔蟾蜍出海頭洶洶有聲驚雨至囂囂眾口
說天愁楚氛已覺三邊淨湯網終當四面收自惜金陵多王氣如
今重作帝皇州

玉人攜手步凌波憶昔南樓載酒過樓上管絃長夜沸座中賓客
少年多按歌自擊鐵如意呼酒滿傾金卷阿堪笑餘情忘未盡中
庭舞月影婆娑

為許君善題竹石圖

竹君骨清奇石丈貌奇古誰其為寫真中吳馬振父吾生兩眼多
閱人此君見之情甚親尋常老膝不易屈此丈拜之心莫逆可憐
君家萬竹遭斧斤石亦去作飛將軍齋居此日空對畫目前所喜
無風塵凜然清氣秋滿屋六月不知天暑酷我素賦詩重品題此
石真宜如此竹勿為葛陂龍勿為金華羊徵君與爾作三友老夫

亦得時與同徜徉

聽秋軒詩為開元寺方崖長老作

一龕禪寂照蘭膏四壁涼生襲楮袍落木有聲頻到耳學人無語
自吹毛鶴鳴夜半露初下雁拂月邊風正高怪底塔鈴饒舌甚亦
如九辨繼離騷

韓仲禮官家子也工寫大字終日矻矻子甚閔之賦此為別

君不見韋仲將能擒大字三尺強懸空高寫雲殿榜鬚髮頓令成
雪霜君今捉筆長於帚作字繼之千載後非顏非柳筋骨殊大如
車輪小如斗知君欲與韋為儔韋所苦者君知否青雲有路去亦
好只恐君年未老先頭白願言投筆勿浪出菽水高堂永朝夕樂
莫樂兮親俱存畫餅功名總何益

九月四日過許君善家觀睦溪長老與朱公潞縣丞等倡和中秋

吟君善索和一首

老禪吐詞金石聲中秋浩歌蟾兔驚哦松人歸與倡和筆力可扶

天柱傾惜哉未草金鑿詔但說三杯通大道舉杯此夕問姮娥百
歲幾回開口笑天風泠泠洗炎熱炎熱洗空風未歇西齋一樹紅
木犀且喜看花眼如月

喜薦嚴希長老自金陵還山作此賀之

京洛多塵土天風爲振衣山中流水在林下白雲歸不說前三語
惟尋第一機古藤師子室燕坐寶花飛

楚南藏主來詢知元明師居義興中山附詩問訊

十年不喫陽羨茶山中舊宅還幾家道人今歸臥煙霞石池手種
青蓮花青山且喜依然好蛟兮虎兮跡俱埽客有放槎東海頭安
書好寄龜巢老

感物二首寄珪玉田書記

矯矯千里駒英英五花文鹽車太行路汗血亦滿身嗟爾本龍骨
誤隨凡馬羣何當一變化翩翩籟青雲

樞官降精英爲象純玉色誰令耕舜田乃負烏犍軛豈無金羈絡

錦蟾爲爾飾鼻吸酥酪河歸來梵玉宅

和靈巖虎邱感事二首

娃宮無復有樓臺佛刹而今亦草萊衲子盡隨飛錫去將軍曾此
駐兵來青山銜日猶前度滄海揚塵復幾回霜落吳天香徑冷斷
猿啼月不勝哀

兵餘重到古禪關無限傷心四望閒林下點頭皆礮石門前戰骨
似邱山劍池屢變珠光赤盤石猶沾血點斑白髮破衣耆舊在獨
憐靈老不生還

次韻答因了菴

重經喪亂勞相憶多謝將詩問所居鄰有國朝新定律家無屋壁
舊藏書月明江海魚龍伏歲晏山林草木疏堪笑出門多滯礙兀
如禪衲坐僧廬

普講主哀詩六首

前代王孫錦繡腸中藏萬卷佛書香一鞭竟著三車去不作修文

地下郎
自喜年來兩耳聾不聞今古鬪羣雄每逢林下三生石只說尋常
萬事空
長把吟毫貌水仙梅兄礬弟亦牽聯如今收拾歸何許兜率宮中
別有天
瑤林自有鳳凰枝枳棘叢邊翅偶垂鴟嚇不知緣底事赤霄飛去
竟難追
茶毘煙斷蛟龍浦舍利珠藏窰堵坡從此不沾陶令酒藕花零落
奈秋何

天台一曲繼天泉獨抱瑤琴二十年古調不隨陵谷變麟膠誰續
斷頭絃

寄孫彥民

讀君吳儂詞如讀春陵篇惜哉未作郡手拍元子肩玄髮亦已華
鐵硯亦已穿秋蘭抱幽馨奇寶橫道邊詩以白雲曲載理朱絲絃

勿論聽者希我心自怡然

題水仙山礬梅花圖二首

綽約誰家女子依稀水府仙人莫怪無言脈脈正須頻喚真真
紅杏碧桃春煖梅兄礬弟冰清會得生花筆意隱然金石詩聲
已酉元日漫興

四國山河喜莫安一年時序又更端醪酥春酒到手煖楊柳曉風
吹面寒太史始行新律曆齊民俱易古衣冠故鄉只在停雲外可
奈親朋欲會難
簡曹仲絃

東海歸來塵自颺一竿西日釣滄浪州人尚說家聲在沙鳥皆知
世慮忘竹筍滿林冬入饌梅花繞屋夜生香吾兒學稼書仍讀應
喜分鐙過短牆

送贈題日本

吾聞東南有國環滄溟龜峯雲接扶桑青白梅花開作絳雪佳實

亦比蟠桃頰珊瑚出水光奪日老蚌吐珠皆夜明山藏水產足珍
怪惟人尤得鍾其英釋門龍象獻寶出眉目秀異風骨清錫花一
萬四千里欲以佛法中華鳴首探天目師子窟酷肖厥祖天人驚
三吳百粵小盤礴王公下榻爭趨迎大哉禪月古叢社正法眼藏
轟雷霆思親要織睦州履春風穩送歸帆輕老夫扶憊走相餞事
有干請煩留情往來爾國遠秦火六籍不隨埃燼零願言傳寫遺
全璧一洗魚魯開羣盲上人名亦垂不朽能使舸舫爲馬馱吾經
張伯祥自濠州惠詩且相傳有還家之喜卽事口占聊抒情悵
春風濠上來家奴寄詩親朋及老夫微詞周折出肺腑蟻絲九曲
穿遺珠神龜脫網曾有夢靈鵲報喜窳虛孤大鈞播物各生遂忍
使鳳凰長在笈羣兒覓竹跨爲馬吳淞江上迎歸艫南堂花竹春
正好玉芝粲若珊瑚株老夫亦作輓脚局典衣沽酒黃公壚
賀陳思忠自濠州歸
南山石爛海揚塵播物依然出大鈞坡老豔爲僮耳客謫仙豈作

夜郎人歸舟帆卷桃花雨家宴杯傾竹葉春雪髮巢翁癯似鶴也
隨漚鷺去相親

老病

乾坤如許大老病此江濱無酒可留客青山應笑人幅巾方竹杖
青草落花茵賣得門前賦相如未是貧

水村歌二首爲趙朋南賦

我愛水村好爲作水村歌君家水村二百載閭里向來冠蓋多銅
駝巷陌自荆棘滄洲依然皆煙波牆花巷柳接葭蘆荻蘋蓼芡
蒲荷澱湖噴礴東岸曲陳湖繚繞西邱阿前看震澤後笠澤青山
數點堆青螺錦溪橋頭魚米市亦有朝鼓鳴如鼉市聲豈不傾人
耳先生閉戶雀可羅筆牀茶竈漁童釣蓑人稱陸魯望自比張志
和兩賢當與作三隱過也亦宜呼少坡長安道上人擾擾奈爾水
村安樂窩

我愛水村好作歌仍和之水村之樂能自得水村之號真相宜齋

居隱几白日靜門外繫船青柳垂讀書雞窗亦解語忘機沙鳥皆
相知葑田種秫足爲酒草亭對竹長哦詩平生自是愛結客況多
載酒來問奇清談閒揮玉塵拂高會醉傾金屈卮飲牛有渚蓄魚
有池老夫願卜鄰矮屋與隔籬分鐙紡績兒女共曳杖往來鄰舍
嬉從此水村作土著與君說詩時解頤

次韻答許君善

小徑迂迴草欲迷村居如在灑東西爲煎新茗頻敲火自掃殘花
恐汗泥白首十年吳下客傷心千古越來溪羣賢何日能相顧重
爲湖山一品題

次韻答焦任道

誰越誰秦自瘠肥別來十載電光飛尚看書帖題青李未掌絲綸
對紫薇老我襟懷寒古井憐君氣宇盎春暉石川古柳清陰好且
繫書船莫賦歸

次任道韻贈朱公路贊府

清濁無論涓與涇請看流水悟浮生莫憂白石南山爛且喜黃梅
細雨晴石几題詩焚艾衲水亭酣酒臥桃笙瓜田不理春來草怕
有人呼作邵平

謝任道惠畫

焦君青雲器不減阮仲容飲酒五六斗卓然猶祖風髯龍吐醉墨
逸氣超鴻蒙騷雅靡不作無聲詩更工淋漓練裙幅遺我龜巢翁
翁老如兒癡嗜詩羊棗同層崖飛瀑泉撫玩意不窮何以報夫君
秋江待芙蓉

答馬公振見寄三首

燭龍銜日火雲迷飛到中天不肯西安得天瓢瀉涼雨仍看地裂
補春泥兵戈不到王官谷煙樹相望罨畫溪莫笑老夫多古意露
筋祠廟要君題

經鉏初不效常林安我貧居未死心江上小山堪入畫門前新柳
未成陰斷編重緝忘年老險語孤吟到夜深毒熱甚於中宿酒我

頭連日爲涔涔

賴有酒船堪拍浮何憂蓬鬢不禁秋卜鄰老圃今瓜及借榻僧窗
喜竹幽老大正當秋近熱微風可奈晚來休能騎款段來相顧惟
爾同鄉馬少游

次韻寄野舟長老

舊雨別來陵谷變新秋又見火流西黃楊樹厄重經閨白藕花開
不染泥千古長洲連茂苑一湖香水似曹溪支郎愛馬情還在念
我鹽車老月題

橘隱軒爲鄒仲謙作

愛爾林居物色幽茅齋橘樹對滄洲添修太史木奴傳合比列仙
松子遊冰雪杯香蘇井水霜風簾卷洞庭秋小山叢桂遙相似只
恐招賢總未休

和紀叔維中秋

清夜尋常秉燭遊況逢明月桂花秋君吟梨谷揮椽筆我泊楓橋

倚柁樓白雪似添雙鬢老青天不著片雲浮老夫酣適遙相似座
有潘郎便善謳

題王叔正江村讀書圖

紅葉江山村青燈案頭書長年門不出吾道竟何如

叔正過訪恢傳書記寄聲作詩寄之

余澤歸來王子猷問君知與對滄洲一灣流水市塵遠兩岸人家
煙樹幽客至白雲分半榻興來明月載孤舟如何不到淞江上我
看蘆花雪色秋

和馬公振江上早行

聞君拂曉度婁江解得江如玉佩雙旭日曠曠初挂樹浮雲變化
忽成龍路傍客蹋前車覆天上人遭怒杖撞俛仰古今成一笑春
風賴有酒能降

和衛澄遠雪詩

洋海冰寒若凌陰坐看飛雪積來深出門總是瓊瑤地遶屋皆成

簷蔔林爲說擒吳今李愬因評怨筆古羊斟兔園詞客都澆去何日移封共酒泉

劍井

余家劍井邊不飲井中水要令生瑞氣藹藹見多士古瓮暗莓苔羸餅委泥滓黃河今復清豈獨長已矣

獨孤公檜

珍重前賢手自栽無情斤斧忍相摧專車載去蒼龍骨竟作誰家爨下灰

惠山泉

此山一別二十年此水流出山中船人言近日絕可喜不見流船但流水老夫來訪舊煙霞僧鑑試淪趙州茶惜哉泉味美如故不比世味如蒸沙

陽羨茶

南山茶樹化劫灰白蛇無復銜子來頻年雨露養遺枿先春粟粒

珠含胎待看茶焙春煙起籊籠封春貢天子誰能遺我小團月煙火肺肝令一洗

歲朝示三子

我生老筆耕齷齪不自羞教兒復爲之能識此意不爲農或逋租服賈亦遠遊非才苟祿仕往往遭愆尤先師有明訓富貴不可求兒能負米歸老父百不憂日高三丈餘睡起梳白頭藜牀草氈氍布冠木棉裘比屋吏叫囂吾廬自幽幽食粥了餘年死卽埋高邱今晨捧椒觴復喜歲一週一倡三子和聊作擊壤謳

寄徑山顏悅堂長老二首

每憶城南隱者家崑山石火徑山茶年年春晚重門閉怕蹋階前落地花

兩耳垂肩雪滿顛維摩一室小林泉白雲窗下黃楊樹且喜重經厄閨年

懷許君善三首

別後逢人問薜蘿打門時有吏催科消磨舊日耽詩癖春興吟成
恐不多

桑扈催蠶桑葉肥麥田唯雉麥花飛春餘閏月無多日鄰舍逃亡
歸未歸

昨夜龜巢酒半醺春風吹夢去尋君落花芳草千墩路攜手斜陽
不忍分

寄趙朋南二首

狂風黃雨去年時大廈難將一木支最喜草亭修竹靜催科人去
復哦詩

石首魚來金色新桃花酒熟獲頭春急須秉燭遊長夜莫遣山公
冷笑人

寄趙執中二首

案頭花落硯池香庭下草生書帶長黃卷青鐙風雨夜更和熊膽
付兒郎

一見相知二十春交情無愧古雷陳如今漏上龜巢遠不惜書來
雁足頻

寄吳中衡

老我誰知已端人最憶君常談無鬼論不作送窮文藥杵三更月
萊衣五色雲桑榆春自煖蘭茝發幽芬

芙蓉城仙人歌寄贈孫大雅

仙人家住芙蓉城芙蓉爲冠結蘭纓飛車去作蓬萊客玳瑁筵開
麟脯擘八暝揚塵一轉蓬扶桑厭倒東王公仙人手策青玉龍翩
翩歸袂飄天風華亭之西玉山東羣仙挽留鸞鶴從雲牆霞壁五
畝宮金花翠葉九粒松雙眸點漆顏如童瀛洲再看蟠桃紅蔡經
家藏老姑酒能爲仙人集仙友琴高醉歌輕拍手要我龜巢老人
來和不

寄黃宗禮

星槎池館東牀客冰玉襟懷我所知百榼葡萄春灑灑一欄芍藥

晝遲遲門前送卻催租吏枕上還成夢草詞只恐繡幃人起早又
催京兆畫蛾眉

冬至和陳縣丞韻

玄機妙斡無古今一陽來復消羣陰聖人灼見天地心贊易乃鳴
金玉音蘭也朝來新盥沐三復韋編謝庭毒卿雲燦爛彌九天旭
日瞳矐出暘谷丞哉丞哉初下車踐長之喜當何如絃歌化行風
俗美寒谷春生自茲始

逸菴詩四首爲吳子明賦

我愛逸菴叟有時能養生百事不挂懷三樂殊稱情行年八十餘
白髮無一莖每聞責子歎嗟我如淵明優哉復游哉笠澤山水清
日高三丈餘先生睡初起雪屋燒煖香行庖膾冰鯉逍遙白氎巾
傲兀烏皮几鉤簾對青山倚仗看流水世事了不聞無勞洗吾耳
客來兩忘情不復事迎送有酒卽盡歡當杯笛三弄羲黃敢云傲
周孔亦無夢眾口縱雌黃我腹自空洞行歌山澤閒斯樂誰與其

人生老而逸伊誰無此心惟翁適所願林居小湖陰或持無餌釣
或抱不絃琴山水古名畫所得趣尤深長歎康樂公木屐費登臨
送李彥明歸高郵

老夫歸從東海頭春風送客過秦郵出門復覩雁北鄉物我喜得
同悠悠吳船鼓櫂渡江去烏輪政挂扶桑樹桃花倚岸笑相看杜
宇催人啼不住征袍十年塵土多濯纓今作滄浪歌一百五日寒
食雨三十六湖春水波文游臺榭荆棘繼美前修集佳客誰能
喚起老龍眠重寫耳孫湖上宅

王松溪知事別兩紀陵谷旣變復會常州年皆七十餘喜各無恙
又喜松溪別第失而復得觴以賀之詩紀歲月

年來兩度塵生海二老重逢雪滿顛杖履荒城寒食後琴樽別業
舊堂前桃花含笑似欲語燕子飛來絕可憐此日爲君歌此曲雨
蘇春草午陰天

後數日松溪見和二首予復次韻送歸華亭

放舟東郭語長年喜見春風不放顛三月鶯花詩卷裏五湖煙水
柁樓前青山司馬如今老白木長鏡祇自憐歸到鳳山門不出北
窗真是小壺天

宜山謠

并序

廣東南丹諸州民獠雜居素號難治洪武初朝命設官置司安撫
之山東尹明善實任其選凡所司事知無不爲爲無不達莅官
再期多善政後四年有客自廣西來者傳其事甚詳余乃摘其
大者作宜山謠七篇以著其美云

苗獠地連交趾咸籍爲民且爲除其凶號人悅之作椎結舞

椎結舞擊銅鼓淺蠻深蠻皆安堵賣刀買鋸犁銜恩人鳥語獠俗

馴惡名去豈弟君子吾父母

沿邊舊置七十五屯以獠爲長每羣聚爲諸州害今罷之民乃安

作除虎窟

除虎窟虎皆散亡龍睡穴湖南海北廣東西千里如今無白骨無

白骨人何憂每每舊屯田年年稻花秋我所思兮龍江水流

兵後薦饑發官廩活宜山數萬口民德之作枯桑

枯桑枯桑徒爲吾薪煮石弗糜曷以食人廩發於官我命乃續誰

其主之伊人如玉伊人如玉孚及豚魚詔我婦子償粟勿渝厥粟

固償厥德靡忘我懷伊人於羹於牆

覃國大韋仲海等世爲土豪與溪蠻洞獠相表裏反側不一公以

計禽殺之民大快作霹靂斧

霹靂斧行天誅百靈奔走羣醜除磔獠獍醯猓招徠角觴舞騶

虞日月兩山明畏境成康衢

宜山莫天護虎踞一方公言諸方伯徙和州民樂之作坎井蛙

坎井蛙今渤澥偷生蝦蜆門怒腹氣何在長魚跋浪欲吞舟竟作

任公雪花膾蛙乎幸偷生有愧輸芒屨前度放蛙人今日恩如海

蠻獠負固稅久不供而良農病於重斂今均之視前賦減什五六

恩不能忘作生子以尹名

生子以尹名有田須力耕昔憂公租重今喜公租輕窮閭杼軸具
當路鈞衡平焦冥覆盆下覩此白日明

革命之初公以安邊事宜屢白相府民懷之作鞍馬勞

鞍馬勞肉消髀廣西一去三千里借箸籌邊丞相喜兩年單騎八
往迴青草黃茅瘴煙裏鞍馬勞有如彼不負公不掠美一寸忠丹
報天子

送陳漢德員外徙居臨濠

憶昔吳鈞斂霜鏑歐台已知蛟可斲窮探虎穴走山靈勇撤蜃樓
招海若三台分照紫薇垣一蜚徑入經蓮幕安知滄海忽生塵乃
見巨魚今縱壑攜家春雨赤城還揚舫秋水濠梁約老夫白髮三
千丈別來幸有琴書樂羨子青雲二十年此去亦無軒冕縛故鄉
相見恍如夢往事重論成大噓呼兒解我鷓鴣裘離亭飲客鷓鴣
杓南薰穩送渡江水西笑遙憐好城郭莊生臺上看魚儵彭祖山
中拾靈藥平居襟懷本瀟灑在處林泉可盤礴有時回首望江南

題詩好寄雲間鶴

次韻贈董明府兼贈陳縣丞尹主簿

綠莎聽事灑清風四野遺黎集澤鴻佳政總堪書國史丹心曾不
愧天公橫琴坐對中秋月援筆詞傾百步洪僚佐粹然連白璧有
時來我讓西東

寄錢夢弼并爲乃翁宣慰公壽

門對青山畫掩扉家居身著老萊衣嬾于日下看雲去贏得街頭
負米歸一笑觥船香雪美百年城郭昔人非高堂秋爽而翁樂稻
熟湖田蟹正肥

送虞長史歸閩中

卓犖青雲器淒涼白雨秋棄官辭傳舍昇疾上歸舟岸有吟蛩送
牆無語燕留七閩天浩浩兩瀨水悠悠親舍孤雲影山城大海頭
倚門勞遠望脫屣得長休金榜聲名在斑衣志願酬猗蘭重製曲
護草足忘憂丹穴生鷓鴣龍光射斗牛此心能自足餘物更何求

老我三家墅憐君百尺樓相知稱鮑叔遠送愧鄒游海上多靈藥
山中儼素侯家園紅荔子能寄故人不

楚人居短歌三章爲吳中衡賦

楚人居住何許屋頭東近扶桑樹三江五湖在庭戶身著老萊衣
手攀龍根脯賦歸來兮謝簪組

野人居誰與論芸夫蕘子皆同塵朋來遠訪多搢紳焚香據槁梧
持杯岸綸巾睠魚鳥兮情相親

楚人居書滿屋神農本草僅一束用之可比連城玉菊潭秋水香
杏林春樹綠樂吾親兮忘啜菽

過馬公振南江草堂

南江草堂人白眉湛書成癖復湛詩千金買書讀未了化作劫灰
飛海涯國風雅頌三百首愛入骨髓淪膚肌兩京三國六朝下驅
駕直與唐人馳老夫一別再寒暑重覽碧海珊瑚枝溪西隱者亦
好事白首苦吟忘渴飢逢人往往誦佳句況此酒邊逢項斯歡然

共醉成夜宿石銚煮菜焚玉麈諸家風月談未了老蟾已墮西山
陲盍簪此夕復何夕一庭寒菊花離披

龜巢集卷九

龜巢集卷九
龜巢集卷九
龜巢集卷九

